

萬 有 文 庫

第 二 集 七 百 種

王 雲 五 主 編

元 文 類

(十)

蘇 天 爵 編

商 務 印 書 館 發 行

類 文 元

(十)

編 爵 天 蘇

書 叢 本 基 學 國

編主五雲王
庫文有萬
種百七集二第

類 文 元
册 十

中華民國二十五年九月初版

編 者 蘇 天 爵

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

沈

*D五二三八

(本書校對者 秦泉聲 曹灼石 黃逸之)

元文類卷之六十四

神道碑

鄧州長官趙公神道碑

姚燧

有虞臣栢翳。佐舜調馴鳥獸。賜羸姓。其後費昌去夏歸商。爲湯御。孟戲中衍爲大戊御。至周造父爲穆王御。服盜驪騶。驅綠耳之驥。西巡樂而忘歸。徐偃王反。復御日馳千里。破徐。賜趙城爲趙氏。其子孫散居何望。傳次幾何。至公者不可稽。然由所記憶。其先家代之繁時。金亡去其鄉。凡再徙。始爲冀之衡水人。又爲蔡之平輿人。天興癸巳之棄。返播蔡也。公以善射足力材兼衆難。倡義兵數千爲帥。聞天兵圍蔡。急城中糧絕。乃率部曲發平輿富室藏粟。負擔疾戰。百死突圍上餽。召見行闕。嘉其忠勞。勅銀符提控。復潰圍還保平輿。明年甲午。金亡。將戲下步騎數千。下宋。時襄陽開制閫。改信効左軍統制。制閫後厭降將多。恐聚此叵測。謾爲受犒。欲致盡阮之。太尉江海策曰。且人窮而來歸。誅之不義。又吾閫所節度四十五軍。半北人。今此加誅。則吾軍北人各有心矣。徒足啓猜長亂。漢北之州。獨鄧近。去吾閫程再日耳。北與敵鄰。乘彼虛棄。未戍。盍遣是衆先之。在彼有生降之德。在我有復地之利。一舉而得兩者也。閫然之。別遣路鈴呼延實。將若干千人爲監。來戍。至則與實不相善。益憤前吾所好相下而顧不容。將以計誅。又一軍譁。諫皆言制閫不足爲盡力。會明年乙未十月。天兵略地漢上。集將佐南門。商戰守宜。公扼劍前衆曰。始吾下宋。正

求活。我戲下數千人。與若妻孥。而制闔欲一切以計殲之。情露而事迫者數矣。今幸出戍。不獨任吾。別將監之。一旦誣以他辜。盡無吾噍類。覆掌不難爲也。誠不忍與若泯泯膾脯寇手。必歸皇元。後應者斬。統領徐海。獨辨不可。立斷其首以徇。一軍皆呼拚受命。馳造實營。執以出盟。令呼宋兵。投仗脫甲。吾不犯若一人。盡歸之襄陽。如輒肆動。皆誅死。實駭汗失常。目眙。舌橋。然不能下頃不得已。乃親呼其軍。如所教者。於是皆受命。復與將佐爲約。是州生齒十萬。今日之事。將求生之。非固苦之。將思完之。非固離之。衆曰。生完之耳。離苦何爲。公曰。若旣相許矣。其無殺人父兄而臣妾其子女。以利貨財。與懷復私怨。衆又曰。不越公命也。乃開門納吾元兵。事成。終朝肆不變市。爲具車馬。遣實令將其軍。盡還之襄陽。少不怨制闔。昔者圖己而甘心此軍也。居再月。太宗爲太子。南征遠過。教以是城。甚近襄陽。虞力孤不能自完。且歲荒。與均唐三州民。徙雒陽之西三縣。鄧治長水。均治永甯。唐治福昌。許公權宜行省事。乃先勞分苦。佐乏藥疾。剪棘墾萊。府寺田廬。於粲一始。明年丙申。襄樊亦徙雒陽。其年。公入覲。特賜金符錦衣。許出戰督軍。入守字民。別降銀符八十金符八。以酬從公將佐同力者。奏雒西歲又荒。乞歲得大名軍儲米。爲石四萬五千。陝州鹽爲斤若干萬。以廩餓人。制可。如是資食二州。三年後歲登。乃止。辛丑。授鄧州長官。奏以弟將州兵。亦可。而是州兵民始分。後十二年癸丑。在先朝。今上以太弟之重。命故丞相史忠武公經略河南。始屯田漢上。張平宋本。盡還爲徙鄧均。唐襄樊五州民。實南公始復鄧。時宋已築襄樊均。皆宿重兵。徙民各歸其州。惟是二州。還者無所於歸。襄樊僑治州北。均僑治西。皆倚公爲援。南州數十里。淪爲盜區。戰外耕內。四年之閒。積穀石七十餘萬。丙辰。乞骸骨。不報。明年疾卒。實丁巳。春二月十有四日。年六十有一。其月二十有

四日肇瑩州東南之曲專里以葬。自喪及窆。祭哭聲振城野。數萬人。昔受公生之死地者。公諱祥字天麟。魁貌碩躬。望之威如。孝親友弟。及有地方數百里。秉鉞垂符。常布衣韋帶。纓冠弊鞍。江漢大都督爲言。衣冠貴賤章也。何乃爲是過儉。下自同庶服邪。不恤也。與將佐言。公府則吾節度。汝不可不嚴名分之守。私處則汝皆少所從起。相習者。豈可遽修邊幅。改度平日也。必齒坐序飲。其疏簡自節。直坦與人不疑如此。考贊妣李生子二人。長公弟彥。卽將州兵者。大考仔。曾大考康。三世連不仕。饒贊樂施。夫人霍。以賢聞。子一人。昭勇大將軍保甲萬戶侃。今鎮衢州。男孫三人。伯元。仲亨。叔利。女孫四人。適耶律弼。李友端。劉仲溫。季幼。概公之始。遭金季年。出無受知託援之臣。入無素助可藉於家。奮其孤身。百戰前驅。積勞而加數千。健武之上。亦何壯也。且人之才。相爲十百千萬。不能齊同。以一人當一人。爲衆人以一人。絕出千萬人之上。是曰俊傑。方天定命昭昭。而昧者疑所適歸。彼千若萬人。奔走爲依。求以自全。其受是依者。內揆無可出險反正之才。豈以一身貿買先衆。徒死則依人者。猶不難於爲人。依而受者也。金旣隕祚。而後將十餘旅之衆。下宋。其志仁此人也。及宋不察。將快其肆毒。已乃北戍鄧州。爲置監將。防虞而戎備之。其伺釁竊發。不保其終何如也。非公謀斷灼知。改玉安能轉禍爲福。侯食此州哉。然由公而上。不仕三世。潔實儉勤。積累悠長。能散宿居。芘後之功。旣碩旣豐。而始大興。此勢之必至。理之固然者。今侃也。卽基堂之龍盾虎符。列名平宋功臣。非公作則之報。而誰諸孫繼繼修偉。則是澤也。夫豈一再傳而可遽艾之邪。後葬三十年。有二年。至元二十五年。戊子。侃自衢遣叔利。五千里持衢學官鄭怡所譔行狀。走鄧請述墓碑。燧哀其志。在揚厲先烈。又嘗家雒西。與我先人居相邇而游相好也。故不終辭。銘曰。

穰之南東有堂其封下爲平輿趙公幽宮返是之年周甲子一束髮樹名古人自必翊將衰祚偶方興時如鬪孺子貴獲是支金鼎沈淪提是窮旅曰犇與國涉漢南驚來成是州始脫危阨乃棄衆星日月載瞻甫少康蘇煨蠡荐沙徙北就豐于洛之汭雜凶亦然移粟大名以及還南保甲戰耕與是州民耄稚十萬形影相附千里往返厚深之仁崇阜增川宜是州民戴爲二天朱邑桐鄉古弗是過卜置冢傍萬家且夥有子將軍方燿烈光虎節斯皇孰曰公亡匪銘伊白匪石安邈我筆載茲後來者頌

山南廉訪副使馮公神道碑

姚燧

公以至元二十八年年五十九九月六日卒官朝請大夫山南江北道肅政廉訪副使于襄陽燧遊吳會還過行臺廣陵得訃於枚御史中丞魏初所遂出涕相弔後三年始拜其墓指桓楹誓曰公平生交友間文惟我怡者它日當銘是爲報子休復亦已敍所履歷見求因記前卒六年嘗敍馮氏三世遺文有曰以中議年五十九卒官同知山東西路轉運使故中順方年六十以同知臨海軍節度使致事至通議亦以同知集慶軍節度使六十致事三世皆止同知亦理之不偶然事之可異者公抵掌曰若是同知不善吾家耶吾它日有避而不爲耳今公之壽僅齊中議校所卒官廉副班序正與轉運節度同知者等六命四世卒致皆不逾六十嗚呼造物之迹人果可以意智闕耶中議中順通議爲高曾祖諱仲尹子翼璧考中書右部郎中諱渭世稱馮孝子公之先諱由通議築松庵崧山曰崧後更帖字壽卿童子聰警於書博觀彊識賞於中書忠肅公許妻以季之子闕幘由貧試吏征商屹屹自飭不盪華墮中統建元時年未壯入掾中書職奏事曹策識沈明得失先事日從丞相造膝清光右部爲郎自丞相辯章而下皆友謬之父子

並政法制未苛不嫌也。人榮耀焉。或讒禁中省曹多徒顯庸在列。庭加汰擢。公以風度修凝。數對有次。留後一故相。長左右幕。喜氣排人。諸曹蹙縮。公不下之。故事諸曹出皆總管判官。獨抑公。真定轉運經歷。換衛輝總管。經歷官承事郎。令真定之無極。事治考最。換令洛之曲周。狀其簿貪懦黜之。圍襄陽急。發民益兵河之北。公惟視丁地入中甲者。戶抽一人籍之。請託不行。苞苴不入。形勢富室。施計無所。凡竄名它役者。皆出僚吏。無所姦利其閒。江南旣一。陞奉議大夫。僉山南湖北道提刑。按察司事。換僉嶺北湖南道提刑。按察司事。二境皆錯壤夷蠻。人所憚行。公冒阻凌歎。瘴鄉蠱俗。上下山谷。至不可馬。或輻以杖。殆數千里。刺舉周治。簡削冗長官吏數百。臺臣勞之。移近畿甸。換河北河南道提刑。按察司僉事。官市民物。不輒與直責悉還之。罪去官吏三百。積沒賂賂且三千定。霜摧電擊。蠹朽皆折。唐之監州。諱發其伏。逃訟于朝。願列公實田湖陽三十頃。禁殺日殺。紆塗乘傳。多燒驛薪。不法十餘事。詔御史問之。無絲髮得。抵其誣。擢陞朝請大夫。江西湖北道提刑。按察副使。未代棄歸。尋仍前官。換山北遼西道提刑。按察副使。以疾辭。行臺臣終曰。舉職風紀。求歸者其私不可釋也。擇其去家近在十舍外者。以便之。再換山南江北道肅政廉訪副使。命下數日卒。僑葬檀溪之東。筮仕至是三十餘年。恬忽時榮。退易進難。數命皆家受之。臨繁處劇。暇豫而集。遭佳林泉。野服佩寶璫。鳴琴賦詩。忘反移日。觀所號雪崖。亦可得其嗜尚已。俸入盡於友。故家之孤嫠。與娛賓購鼎彝書畫。故遺產不盈十金。所標襍其閥甚高。跬步恆以羞親爲心。迨氣息奄奄。猶大書松庵墓。馮孝子墓。雪崖墓。賜休復曰。各伐石表之。阡亦自喜其善全歸也。遺文千篇。晚而筆力逾進。辭多雄剛。深古卑於文者。不能句求。凡再配前夫人楊氏。卽忠肅公妻者。今夫人王氏。其母休復。與休復母。

之兩致其道。不知者不以爲前夫人之生。觀行有家。爲德如何。女溫香幼。三男孫。鶴齡、龜齡、彪齡。二女孫。皆下殤。銘曰。

公生自孱。見靈奇也。葱衡鏘然。妙爲辭也。人一善偏。已兼之也。其蘊淵淵。介介持也。其履平平。循循施也。入司奏牋。出縣爲也。同不俗牽。異不離也。責言言宜。責事治也。憲府所躔。吏不欺也。風行嶺壘。江之湄也。幾耳順年。不云蒼也。厚夜長眠。寤何時也。聞之幅幘。多舊悲也。曰良弓傳子爲箕也。揉木不弦。世業卑也。獨公青氈。寸不移也。世德陶甄。不外師也。子于父田。播其苗也。父材楠楸。子構基也。有華蟬嫣。冠雙綵也。與乃祖肩。官醜夷也。皆不持銓。袞職裨也。豈天爲懸。座右卮也。不盈其泉。斯不歆也。信彼微權。馮氏私也。滹沱之川。浩瀾瀾也。苗胄必賢。餘波滋也。毋折楚箒。以筮疑也。麗牲有穿。徵銘詩也。

浙西廉訪副使潘公神道碑

姚燧

公潘姓。諱澤。字澤民。宣德府人。府在金惟州。曾祖嘗爲州孔目。而逸其諱。祖祿考得用。生行軍萬戶府提控。渙及濤。與公伯仲。氏皆善厚。殖其家資。公讀書壯而遊先師魯齋。左丞許公之門。盡夏故習。而氣質大變。養親不違其志。事兄愛以敬。閨闈有閑。及出門庭。卑以下人。語恐惴之。遇夙無所厚薄者。于塗必謙謹。戀嫪令盡所言。不峻謝別。用太保劉文貞公薦。由從事太府監。擢監知事。轉貳左藏庫使。出再提舉織染局。金符在順天路。官承直郎。宣德府則奉訓大夫。課皆最。陞奉議大夫。知宏州。兼諸軍奧魯。始有土民。以行所學郡。旱遍禱其境百神。已乃詣郭西泉。投文祝曰。山川之神。其所司者。惟在能興雲雨。以水下土耳。今旱曠如是。不能膏澤之。神固已不得其職。使州刺有罪。幸漏譴于明天子。必將殃之。宜止其身。吾民何

辜橫羅斯毒。則爾神又佚罰矣。敢恐恐退俟。終不得命。當自劾去。其夜有光如星騰泉。明日大雨。爲屋祠龍泉上。自公未至。州之南並山風爲災。又爲文禱曰。風者天之號令。順四時溫燠。淒凜之氣發達。遂成萬物者也。時自爲惠反之而已。災況暴厲無節。穴涌谷起。飄翔塵沙。偃振禾稼。以病民哉。禾民恃以生。上以出縣官租賦。下乃仰以糗盛。報事乎明神。今使之貧窘無所於食。目其饜苦之顏。耳乎愁嘆之聲。神亦安所利之。必州刺之是矜。其收是憑。怒自爾風災衰息。民賴至今。尤究心用獄。前政繫疑盜八人。榜掠百至。求迹無所。公明其非辜。皆出之。劫家訟公。故縱無幾時。而盜果得。西京械成獄。令待命。他郡過治。囚號市曰。此州之人。神明公以爲包拯復生。獨不能相活邪。公將召問。同列謂宜發卒衛出吾界而已。讖非吾事也。公曰。人求直其枉。烏可陽爲充耳不聞。卒問之。蓋太原民輸稅西京。慮倉吏不以時受。入鈔貴家奴。令代其輸。旣如約矣。奴與僞爲鈔者友。陽悔之。有我善鈔。而歸所僞爲。我急其得不詳視也。出而用之。而事始露。有司鍛成之。謂我利賤而買之。僞爲首當。以見知法。公列上之。竟雪其誣。而抵奴與僞爲者法。賦州市牛。公懲他郡。驅牛至官。擇可受直。聽命旬浹。犇走煩勞。廢其穡事。令持價卽鄉民自爲市。吏無所姦利。黜僧亦不得上下。其直轉知興中州。入爲監察御史。刑部主事。特當國臣。知多行不法。察院召按。不能致。公從卒至部。捕之一訊。而貪墨皆出。論如律。轉僉山北遼東道提刑按察司事。治有田民殺其主者。獄已結矣。公詳讞之。則其妻與所私夫爲之。乃昭田民當二人法。又有訟爲豪室奴。其一家十七人。有司觀顧數年不能正。公以凡今鬻人。皆畫男女左右食指。橫理於券爲信。以其疎密。判人短長。壯少與獄辭同。其索券視。中有年十三兒。指理如成人。公曰。僞敗在此。爲召郡兒年十三十人。以符其指。皆密不合。豪室遂

屈毀券民之。或言高麗王有逆意。集將吏將徙故都。詔近臣偕公卽治。公以王今尙主。王設舉事。主安不知。知安不上變聞。而噫嘿以從。他臣治獄。希意深鷲。求竟。公獨輕平。主果馳使。明王無有事。從中變。制使多得罪。獨還公憲。尋入都事。御史臺剖白羣疑。商訂時才。自其口出。人所畏縮。皆身任爲。無少顧讓。然不專已。博咨之人。嘗曰。君子小人喜以朋從。觀受薦何人。得過半矣。又政察其閒。有失而不中哉。今日必吾所識。則識有盡。不足於列職中外。況未必盡賢人。曰可者。審可。不必囿以資格。故評臺臣者。皆曰。自公都事察院。監司一時翕翕勝職。最衆。出爲江北淮西道提刑。按察副使。按宣慰家兒。怙勢抑買民物。不償直。與償而不滿者。皆比賊論。後改提刑。按察。爲肅政廉訪。轉江南浙西道肅政廉訪副使。方分司杭州。以至元壬辰秋七月一日卒。年五十五。仲氏子希善。希達。五千里輿柩歸鄉。明年八月始葬先域。夫人任也。三男。希大。希成。希安。大成。皆前卒。希永。他室。李出。三女。適任。徐。張氏。皆士族。公旣貴矣。進伯氏子希明。事裕宗於東宮。今出知隰州。後葬二年。伯氏懼公平昔之善。泯其不聞。乃身入山。敦工伐石。求其同門友祕書少監楊桓。狀其事。俾燧銘之。碑燧曰。公之爲人。桓爲行實文。何尙焉。念今之世子弟。爲父兄。求託金石爲傳者。或多有之。如提控以兄能反復致意。其季者。纔獨一人。嗚呼。豈不若是。不足爲愛敬報歟。銘曰。惟公生資粹。其民彝。加及先師。北面事之。仁義微辭。道德盛儀。日耳以闕。如垣厚基。增崇其卑。如田有鐵。多稼離離。尊聞行知。始由家推。慈孝幼耆。聞闔泉絲。秩秩其宜。出焉郡治。視民如兒。調均賦夷。仁柔膚肌。何有創罷。其禳其所。山川百祗。如指以頤。雨渥風衰。誠之格思。罪入髡髻。猶已渴飢。不身之私。竭蹶解壘。必出是期。發摘吏欺。大法小笞。戢威顏眉。衣繡斧持。遼浙江涯。皆所往釐。在在歌思。曰到遠而。

如何數奇。中塗其萎。識不識悲。中郎諸碑。秦無媿爲。斯銘如斯。琢石以垂。信夫他時。

故宋太常少卿陳公神道碑

姚燧

大德戊戌。燧舟遊湖湘。而陳公元凱。方持憲節使湖之南。旣求追撰妣夫人李氏埋銘。爲粗敘陳姚同爲有虞遺裔。交後五年。燧持憲節使江之東。而公以總管來莅建康。馳書請曰。吾八世祖宋太常少卿公。以治平二年卒葬洛陽。其後子孫以官爲家。死不返葬。顧於太常墓。失其地。所曾祖少中公。訪而得之。筆地之名。與距城幾何里步。以詔後昆。志亦勲哉。會荐離大兵。終無有能至者。七十餘年矣。元凱始成其志。如所筆發墓驗之。果得范公鎮所撰誌銘。摹以蠟紙。副吾家乘。願爲銘樹石以表墓道。燧受讀之。其先潁川人。唐遷于京兆。廣明中。違亂于蜀。家眉之青神。其可系者。瓊生延祿。延祿生贈兵部侍郎顯忠。兵部生希亮。卽太常公。太常生京東轉運使忱。轉運生簡州司士參軍揮。司士生金儒林郎灑。儒林生國子監丞克基。國子生耀州三白渠規措使仲謙。規措生皇東平勸農使膺。農使生嘉議大夫建康路總管兼管內勸農事。則元凱也。子敬立。最之。凡十二世。聞者慨息。以爲非清風素望之門。孰能完有家乘。得其傳次如是之多哉。燧曰。是足爲多乎哉。苟推其世德而上之。之十二世者。又十二世而一耳。嘗讀太史公書。至其敘傳。於司馬氏受姓所從。上起顓頊。子孫官居功烈。文辭下及其身而止。豈顯親者不嫌自明宜然耶。故燧例之。由譜姚氏。亦遠本曰。黃帝生昌意。昌意生高陽。是爲顓頊。顓頊生窮蟬。窮蟬生敬康。敬康生橋牛。橋牛生瞽叟。瞽叟妻握登。見大虹。意感而生舜。姚墟。故姚姓。舜三妃。堯二女。娥皇無子。女英生商均。一妃癸比。生二女。宵明。燭光。禹受舜天下。封商均。虞城以奉先祀。服其服。禮樂如之。以客見天子。示不敢臣。傳夏

歷商三十二世。書可見者。虞思、箕伯、直柄、虞遂、伯戲、五世耳。至虞闕父爲周陶正。武王賴其利器。用妻以元女太姬。生滿。賜媯姓。而封諸陳。以備三恪。是爲胡公。胡公卒。子申公犀立。申公卒。弟相公皋羊立。相公卒。子釐公孝立。釐公卒。子孝公突立。孝公卒。子慎公圉立。慎公卒。子夷公說立。夷公卒。弟平公燮立。平公卒。弟文公圉立。文公卒。長子桓公鮑立。桓公卒。弟五父佗。其母蔡女。故蔡人殺太子免而立佗。生子完。周太史過陳。使以周易筮之。遇觀之否。是爲觀國之光。利用賓于王。此其代陳有國乎。不在此。其在異國。非此其身。在其子孫。若在異國。必姜姓。姜太岳之後。山岳則配天。物莫能兩大。陳衰。此其昌乎。佗取蔡女。數如蔡。太子免之三弟。躍、林、杵。曰。共令蔡人誘殺佗。而立躍。是爲厲公。厲公卒。弟莊公林立。莊公卒。弟宣公杵臼立。殺其太子禦寇。完與禦寇相愛。恐禍奔齊。桓公使爲工正。齊懿仲欲妻完。卜之。占曰。是爲鳳凰。于飛。和鳴鏘鏘。有媯之後。將育于姜。五世其昌。並于正卿。八世之後。莫之與京。卒妻完。以陳字爲田氏。聲之近也。或曰。食采田。完諡敬仲。生田穉孟夷。孟夷生潛孟莊。孟莊生文子須無。文子生桓子無宇。桓子生武子開。與釐子乞。釐子生成子恆。及楚滅陳。而恆得政於齊。生襄子盤。襄子生莊子白。莊子生太公和。遷齊。康公貸於海上。食一城。太公會魏文侯於濁澤。請天子求爲諸侯。天子命之。是爲田齊。太公卒。子桓公午立。桓公卒。子威王因齊立。威王卒。子宣王辟疆立。宣王卒。子潛王地立。燕齊楚三晉合謀。各出銳師。伐齊。敗之。濟西。燕將樂毅。盡取齊寶藏器。潘王出亡。及莒。楚將淖齒殺之。莒人立其子法章。是爲襄王。田單大敗燕軍。迎襄王入臨淄。齊故地盡復。爲齊襄王。卒。子建立。秦始皇帝兼天下。滅齊。虜王建。遷之。共。自商均國。虞。至是千九百六十三年矣。此吾姚與陳。始同爲虞。中同爲媯。卒同爲田之未分者。後建三子。桓稱。

王氏軫稱陳氏而不及昇。豈昇仍氏田耶。自是田或多失傳次。王莽自以桓裔。追封完爲敬王。以田豐爲世陸侯。奉敬王後莽死。豐子恢辟亂過江。居吳興。改姓媯。五世孫敷。復改姓姚。惟陳可以世求。軫生秦東陽。令史嬰。嬰生成安君餘。餘生軌。軌生審。審生安安。安生恆。恆生願。願生四子。清、察、齊、尙。齊生源。源三子。實、崩、遂。實字仲弓。後漢大將軍掾。屬文範先生。六子。紀、夔、洽、謀、休、光。謀字秀方。獻文先生。生青州刺史忠。二子。佐、和。佐。二子。準、徽。準字道基。晉太尉黃陵元公。生伯珍。建興中。渡江。居曲阿。新豐湖。生匡。二子。赤松、世達。世達長城令。徙居長城下。若里。生丞相掾康。康生盱眙太守英。英生尙書郎公弼。公弼生步兵校尉鼎。鼎生散騎侍郎高。高生懷安令詠。詠生安成太守猛。猛生太常卿道巨。道巨生文讚。文讚三子。談、先、霸。先。休先。談先。梁東宮直閣將軍。義興昭烈公。霸先代梁。猶以姓號國曰陳。諡武。談先子曇倩。繼立。諡文。子伯宗。繼立。崩。文弟曇頊。繼立。諡宣。傳子叔寶。亡陳。凡五世。三十二年。叔寶四子。莊、宏、徽、某某。會稽郡司馬。司馬生某。晉陵郡司功參軍。司功生兼。右補闕翰林學士。翰林三子。監察御史當。大理評事。萇。祕書少監。京少監。以從子鹽官令褒。繼鹽官生高安丞灌。高安二子。伯宣、伯宣。著作郎。生旺。旺生機。伯黨生元史。元史生徽。温州司戶參軍。其自軫至機。三十九世。曩弟列者。止書其傳。然自廣明至治平。實百八十七年。以三十年一易世率之。爲六世。太常而上四世。其不可推知者二世耳。嗚呼。籍載以來。不隕其世德者。惟獨一門。吾姚氏則自梁高平令。可系而至今者。二十有六世。其上則或絕或續。匹夫之家。其可少覲哉。嗚呼。亦有甚可感者。古人爲誌。納之壤下。必載其世次官勳。實用備或世變時遷。人有竊發。知爲何代大賢君子。揜之不忍。及其匿焉。初不預爲裔孫。克念其祖。求微而謀也。今元凱悼陳氏入蜀中微。太常公始震。

而耀之。亦其家之鼻祖也。故既發視玄石。而得其真。大封樹之。碑表墳道。刻石人獸。如其始。窆於三易代。八世之後。亦古未聞者。故燧感之。且敬焉。推吾遠本三千歲之上。皆有稽於竹帛者。詳次授之。非足止慰元凱於生死。而有知。亦必曰。吾同姓表章及此。其庶幾乎孝子不匱。永錫爾類者邪。因爲楚人之辭。歲時上冢。使歌以祀。其言曰。

峻南峙兮崧高阻。西鶩兮函囿。趾北邙兮坡陀。擲洛水兮波滔滔。堂封兮偃斧。古爲藏兮幾何所。既夷兮已焉。有不夷兮疇焉。主將帝私兮之家。俾鬼護兮神訶。待裔孫兮爲告。賴玄石兮不磨。維裔孫兮思慎。其守不忍。嘿兮求牛馬走。曰先志兮其成。庶階茲兮來胤。可究余亦虞兮遺苗。匪妄胄兮華遙。其統緒兮可尋。具方冊兮昭昭。年數千兮世踰百。生民祖兮或幾及。豈伊神明之後兮。不與他族而中絕。于何孟氏一言。遽必五世而斬。君子之澤。坐令自今讀其書兮。亦取二三武成之策。重曰。往者兮垂芳。來者兮是望。勿替兮休聲。與媯水兮齊悠長。

故提舉太原鹽使司徐君神道碑

姚燧

至大三年。中奉大夫。僉樞密院事。徐毅。感言於燧。吾先人以雅善。故御史中丞王博文。當其爲河東山西提刑。句銘先祖提舉府君墓碣。中丞不讓而援翰。昔毅與子。嘗受業太傅許文正公。於胄學爲同門。今子長翰林。毅僉宥密。爲同朝。吾先人於中丞無是也。又子亦識吾先人。古所謂知死知生者。兼有之。其遺善可筆。以示雲仍者。非子誰賴哉。乃序之曰。君諱德舉。字進之。曾祖澤。妣郭。祖閏。妣邳。世農。平陽趙城。以本富聞。石明里。考玉材。武爲皇帥。府提控。提領。厚縣。岢嵐州長官。後馬公行刑部。奏提舉河東南路常平倉。

妣夫人高。以歲丙戌生公。數歲撫而謂曰。是吾父登金詞科。令岐山出也。身教之書。及長。又資使學仕。俾歲偕計吏趨龍庭。甚爲參尚書省議樂齊賢。馬文玉二人者。知擢以爲掾。己未。遣迎世祖於江北陽邏。且徵兵山之東西。中統壬戌。省調平陽路轉運司經歷。以妣夫人憂去官。後六年。又居考提舉府。君憂。安西王國秦。凡河東。河南。山之南。與陝西。食解池鹽地。皆置使督其賦入。悉輸王府。以君爲太原舊。由其地多鹵。民盜煮食。有司雖密其禁。犯者終不衰止。而賦日益不登。遂弛其禁。聽民煮食。惟戶責輸賦。漕司行習久矣。至是。都漕欲變其法。復轉鹽鬻民。君以爲若然。是驅是邦人納罪罟也。若仍弛其禁。惟衆遣吏巡。不使賤估盜販出境。而加賦其舊三之一焉。民便安之。而績亦最。陞提舉。棄而不仕。其平生履歷已此。不可謂達。而名傍聞四方。士夫從之游。公侯用其言。而人亦樂以急難見求者。在夫重諾而趨義。負氣而尚俠。其事如李瓊將爲亂。自益都傳檄。求臣叛王。而平陽總管李毅不思。移文太原。爲忻之監州阿八赤所發。故兩總管皆誅。論毅子青童尙孩。坐徙遼海。君哀之。帥毅家僮。訟之宥密。以爲祖宗之法。父子罪不相及。且昔檄事。青童何知。與禍至茲。甚非昭代罪人不孥之旨。宥密遂奏還之。今戍西川。長萬夫。襄陽旣下之明年。將平宋。詔籍中戶爲兵。民甚駭愕。至有自戕求脫者。總管烏禔患之。迫君詣宥密。受其成法。得於三戶。抽一。遂懷檄歸。虞吏爲姦。教侯取籍。閉府幕。道院。身自差第三戶優劣。優者爲兵。劣資其力。令人稱爲平。有泣謝者。初。世祖征雲南。師未及境。書遣三使諭招。王人者言。祖宗之法。殺詔使者。城拔必屠。萬一蠻夷怙惡。或賊殺臣。願無以臣而使。是城。唯無遺類。至則彼以爲誕。皆磔之。懸尸於樹。大師旣至。求其首。或謂投洱水中。遣漁人網取。無所得。火其骨。函送二家。復其門。徭田租。中一人秦州士子王姓。分蠻口。

數十於州。俟其子壯付之。後三十年。當歲丙戌。詔西省臣訪求其家在亡蠻口。已爲郡豪張某者冒有。王氏子願受其人。傭直君言之。憲府坐郡豪以罔受上恩。官吏見知蔽匿者。皆罪黜。而還正其口。王氏子民奴有嚴姓者。主利多直。鬻其六七男女於商胡。君憤然曰。奴有男女。若是衆多。則知賴其爲力也。入忍重奴商胡分鬻他地哉。白其府曰。主既有名郡籍。則奴亦郡民。烏可不告所由。而輒鬻之。縱不損吾戶數。實損吾口府。是其言行已數舍。遂追還之。代贖爲民。猶其外者。至語其家。衣止大布大帛。食無兼味。飲酒不數。僉事繼妣石有孝譽。分田以恤女弟。孀居爲子擇師。俾齒胄學。其知親賢又如何也。恆言以飭諸子曰。立身本學。治生本力。穡儉勤。羨以周匱。急無多積。以自災。取友不可苟合。勢利臧獲。久故。旣火其券。多至千指。自今事汝久者。其縱民之。當不恙時。伐石爲槨。穴地倍常有半。曰。他日無厚藏。明器用陶。無法流俗。侈靡崇事浮屠。以大德癸卯八月六日卒。年七十有八。九月二十有八日。葬石明里先塋。以前卒二十有一年。元配同里毅母盧夫人。祔置毅爲治書廉使。風紀中外。刑曹惟觀。今爲內總六師。外制諸軍。遠及萬里。爲贈祖五嘉議大夫。上輕車都尉。平陽郡侯。妣高侯太夫人。考德舉。太原鹽使司提舉。贈中奉大夫。護軍平陽郡公。妣盧妣邢皆公太夫人。非文賢而能之乎。繼妣邢夫人生毅。授毅。宿衛成廟。毅。掾河東憲司。毅。大都永濟倉使。與穀濟皆不祿。女歸江南諸道行御史臺。治書裴居安。男孫四人。女孫四人。銘曰。

嗟古君子。許友以死。非父母存。曾不有己。後世不然。輕合權輿。燒酒以金。矢死不渝。小棘見告。聞已掩耳。大而去之。遠若讐恥。允義徐君。閱其故侯。世業塗地。而身亦劉。童子何知。亦遐以置。曰。是聖代。開罰及嗣。

教訟于庭。萬里還之。俾克再家。虔秉將戲。民有不幸。爲勢壓抑。無待籲求。我則往直。謂爲非俠。力善砥名。謂之爲俠。不蹈難行。其居而家。井有條理。施以裕人。自奉則菲。伊誰無子。無不欲賢。師匪其人。學則滯偏。毅毅齒冑。從許文正。耳其嘉言。目其善行。故出用世。尊聞行知。爲民所望。宥密贊毗。不昌其身。而昌爾後。逾信百年。種德始茂。子貴而碑。令甲得爲。可恃以傳。太史友辭。

元文類卷之六十五

神道碑

平章政事廉文正王神道碑

元明善

世祖皇帝克肖天德。克承帝命。一天下而國。環四海而家。時則有三五臣。同德佐命。恆陽王其烈烈者歟。蘊經國之學。展命世之才。剛明正大。清修峻潔。所處而經權合。所趨而事庸立。西定秦隴。東靖齊魯。北安遼碣。南撫荆湖。在中書六年。大經大法。大忠大直。巍巍焉邁前王之佐。巖巖焉爲後哲之師。聖賢際會。道義交孚。豐功鉅業。光耀金石。烏虜偉哉。王姓廉氏。諱希憲。字善甫。北庭人。考諱布魯凱雅。從回鶻國王歸聖朝。官至眞定順德諸路宣慰使。贈儀同三司。大司徒。追封魏國公。諡孝懿。妣石抹氏。追封魏國夫人。司徒十三男子。魏國之男曰希閔。正奉大夫。靳黃等路宣慰使。次卽王。王生司徒拜廉訪使之命。顧曰。兒適承慶。宜以官氏。遂廉姓。王自蚤歲。已見偉度。魏國延明師。教之以經。輒掇其要言。試諸行事。年十九。宿衛世祖。王邸一日。問王所懷何書。對曰。孟子。又問。大指對曰。陳王道。明義利。不忍一牛。恩充四海。上善之嘗呼王。廉孟子。從征雲南。師還。留爲京兆宣撫使。關中時。爲世祖分地。西措隴蜀。雜以羌戎。號爲獷俗。摧強破姦。纖弱起植。利賴所及。無顧忌焉。薦大儒許公衡。提舉儒學。辟智仲可參綜府事。扁所居堂曰止善。公退卽與諸儒講求事君立身大義。評品古今人物。是非得失。焚香鼓琴。夜分乃息。時戍車日駕。邊需繹騷。

惟以養民爲本。餉餽亦給。有一大駟。貸母錢予人。徵子數倍。王曰。歲月雖久。子止牟母。後遂著爲令。詔儒而隸者聽贖。京兆諸豪不肯奉詔。王悉良之。或粗識字義者。卽予錢使著儒版。未幾。宣撫司罷。從世祖伐宋。下鄂城。命王入籍府庫。出率百餘儒生。伏謁軍門。上指庭實曰。恣汝所取。王但取一墨。因請軍士所俘儒生。以官錢購之。脫五百人。隸憲宗崩於合州。世祖班師。王首陳大計曰。殿下太祖諸孫。先帝母弟。旗指六詔。羣蠻耆定。師今入宋。鄂城卽下。天道人心。所嚮可識。且收攬英賢。政爲今日神器所屬。非殿下而誰。王奏曰。聞劉太平。霍魯海。復至陝西。渾都海騎兵四萬。大駐六盤。征南之師。散屯秦蜀。太平挾才而姦。素附阿里勃哥。憚王威明。糾惑羣情。據險致死。殆將不利。卽命趙良弼假事往覘。以報初。憲宗南征。以季弟阿里勃哥留守。至是發河朔民爲兵。將與上爭王。旋奏罷所發。宗王塔察兒東諸侯之長也。上欲好之。難其所使。王請行。旣饗。語及渡江。王大稱慕上之威德。勞烈。乃曰。大王屬尊義重。發言推戴。誰敢不協。宗王悅從。還奏所語。上驚曰。顧乃大事。何爾輕脫。對曰。臣書謂時然後言。臣察其幾。言入其誠。爾趙良弼來奏。悉如王算。難猶未作也。歲庚申春。上至開平。諸王宗戚咸會。塔察兒率先勸進。王奏曰。阿里勃哥挾居守之權。鬼奪其鑑。或竊位號。令至。違從順逆立判。若早承大統。詔告天下。彼或願望。我有辭矣。機會之乘。不容髮間。上良久曰。吾意決矣。翼日登大寶位。建元中統。王奏封高麗世子僖爲高麗國王。還之其國。奏遣郝經使宋。詔宋主息兵講好。上慮關右難作。命王宣撫陝西四川道。劉太平。霍魯海聞王當來。急傳先入京兆。王遲一日至。宣卽位。詔人情稍定。遣使詔六盤。渾都海殺所遣使。馳召成都。帥密里霍者。青居帥。乞台不花。約劉太平。霍都海內應。王得急報。夜集僚屬議。王曰。今日之事。吾請任之。脫問專擅罪。不若及乃。

遣萬戶劉黑馬等掩捕劉蠶。其黨皆衷甲待約。捕至鬪而就縛。罵太平後事。遣萬戶劉黑馬誅密里霍者。總帥汪惟正誅乞台不花佩。同僉總帥汪惟良金虎符銀印。將其兵進討。惟良辭非朝命。王曰。身承密旨。君第了國事。已馳奏矣。予其軍銀萬五千兩。別發諸軍四千。命八椿將之。戒八椿曰。君所將烏合。未經撫循。六盤精兵。慎勿輕鬪。鳴爾金鼓。大張聲勢。使之不東。吾事濟矣。兩軍既行。濬隍完城。儲材聚糧。爲城守計。赦至近郊。王曰。劉霍在獄。是何可宥。尸諸康衢。然後出。王乃上奏曰。停赦殺賊。擅發諸軍。專將惟良。臣罪當死。謹籍家貲。以竣嚴命。上曰。書生貴權。政謂此也。詔曰。朕委卿專制一方。事當從權。毋滯文法。坐失機宜。佩卿金虎符。節制諸軍。別降制書虎符。授汪惟良八椿。遣其子執二人來獻。曰。方受六盤重賞。及械繫其黨五十人。乾州請誅之。王曰。渾都海西而不東。吾知其無能爲也。悉殺此曹。徒攜衆心。因其怖死。釋罪藉力。乃送二人于京師。餘皆縱去。面誨八椿之子。使曉其父。果得北軍之用。八椿振旅。躡渾都海軍後。阿覽答兒爲阿里勃哥。曰。和林師來。與渾都海合于甘州。朝議欲棄兩川。退保興元。王上奏曰。四川方寧。糧餉已足。無故自廢成功。後悔爲晚。乃不棄兩川。進拜中書右丞。行秦蜀省事。渾覽兵既合。遂東。王師前驅不利。旣而汪師入樁軍。會諸侯兵力。戰獲阿覽答兒。渾都海首梟之。京兆市三日。諸軍退屯。便地。王上奏。上曰。大丈夫事也。拜平章政事。賜甲第一區。王時年始三十。奏四川降民散處山谷。請禁我軍毋虜掠。違者罪及其帥。諸販易生口者。罪之。由是降者如歸。獲知資州張炳震。統制王政。辭有老親。王使持書與宋四川制置使余玠。俾知天命。玠得書。斂守疆界。不敢妄動。鞏昌帥上鎮戎州。叛者四百人。王但誅其首惡五人。餘悉原釋。詔還朝。入中書。參政商挺馳奏略曰。秦蜀重鎮。非廉相不可。詔歸王。東川帥欽察。誣

閩州降將楊大淵反。王手書與大淵，開誠撫慰。大淵感泣，軍府乃安。瀘州降將劉整，囚我叛人數百，軍吏請誅以戒。王曰：力屈而降，豈其心哉？奏而免之。道整入覲，手書宰臣，使整有所觀感，恩浹其心，當得死力。王移書管安撫、程都統、張敘州曰：汝家今在成都，令所司供億優厚，無他慮也。聽程都統子鵬飛歸省，於是恩及宋人矣。詔括京兆諸郡馬牛，以濟河西。王奏曰：關中兵亂，凋瘵已極，歲賦不充，不堪此役。奏入，特復二年馬牛免括。其年自春涉夏，大旱，王步禱終南，其夕大雨。司徒請朝奏曰：臣子希憲，誤蒙獎拔，恩過其分，且事多專制，輒恐開後釁。上曰：朕欲大用希憲久矣，第以西南事重，難於代者。朕自知之，卿勿疑懼。詔入中書平章事。王以天下自任，乃振舉綱紀，綜覈名實，汰黜浮濫，抑逐僥倖，首議行遷轉法。會魏國薨，王力行喪禮，水不入口者三日，每慟嘔血，毀瘠幾至滅性。既葬，藉草枕塊，必於終制。諸相往起，未至廬所，聞其哭聲之哀，不忍言而退。爲詔奪情，至元改元，進榮祿大夫。明年行省事，山東省併州縣，黜陟官吏，承制行事。東諸侯聳懼聽命，其爲民害者，登與除之。爲民利者，登與興之。凡兩閱月，召還。俄司徒薨，力請終制，上不聽。強起之，墨衰卽事。自王居憂，中書滯事千數。上曰：其留希憲決之。之大都未及旬，浹剖析如流。事聞，曰：相已得人，朕復何憂？車駕還幸左丞相史公天澤，顧諸相歎曰：廉相方爾，振理機要，天下賴之。我輩旣回，殆將沮撓，遷轉法行，五品以上宣授，六品以下敕授，罷天下世官，諸路歲貢，經明行修，長於吏治者各一人，中貴人傳旨朝堂云云。王曰：小臣預政，此其漸也。當中覆之，覆奏上，扶中貴人阿合馬領左右部，俄其黨自相攻擊，詔中書鞠實。王窮詰其罪，奏杖阿合馬，罷其所領。上諭王曰：吏弛法而貪，民廢業而流，工不給用，財不贍費，先朝嘗已戚矣。自相卿等，朕無此戚。王對曰：陛下聖猶堯舜，臣等未能以皋契之

道贊輔治化。以致雍熙。愬對天顏。今日小康。未足多也。上因論及魏徵。王對曰。忠臣良臣。何代無之。顧人主用與不用爾。言者。訟史丞相子姪。布列中外。威權太盛。久將難制。詔王罷丞相政事。待鞠。王奏曰。知天澤深者。無踰陛下。粵自潛藩。多經任使。將兵牧民。悉著治效。以其可屬大任。固使丞茲相位。小人雖實有言。陛下察其心跡。果有跋扈不臣者乎。今信臣故臣。得預此旨。他日一人訟臣。臣亦入於疑矣。臣等承乏政府。上之疑信。若是何敢自保。天澤旣罷。亦當罷臣。上曰。卿姑去。明日召王。王曰。昨思之。天澤無對訟者。有訟西川帥欽察罪者。上勅中書急發使誅之。明日王覆奏。上怒曰。尙爾遲回。對曰。欽察大帥。以一人之言。被誅西川。必駭逮之。至此。與訟者庭對。暴其罪於天下可也。上曰。其遣能者按問。旣而無一實。欽察得免。王奏議上前。讜論直陳。無少回借。上曰。汝昔事朕。王邸猶或容受。爲天子臣。乃爾木強邪。王對曰。王府事輕。爲天子論天下事。一或面從。天下將受其害。非不自愛也。奏立御史臺諸道。設提刑按察司。阿合馬復總財利。中沮其事。有曰。衆務責成總府。金穀任之運司。按察撓亂。何由集事。王曰。立臺察。遵古制。內察姦宄。外糾貪污。肅清朝綱。訪求民瘼。裨益國政。無大此官。如君所言。必使羣邪舞法。賄賂公行事。乃集邪。其語遂塞。匿贊馬丁者。嘗用事先朝。以告者被執。會詔釋大都囚。上還。告者復訴。上怒。召留相詰之。王取堂案視。無所畧。補之入對。顧堂吏曰。脫天威不測。豈可幸無己畧而免。王前對以奉詔。上曰。詔併釋匿贊馬丁邪。王曰。不釋匿贊馬丁。亦未嘗有詔。上愈怒。曰。於汝書此。當何罪。王曰。陛下以此爲罪。第當罷相。遂罷。至元七年也。王杜門養德。談經講道。課試諸子。然食頃不忘朝廷。一事便民。則喜見顏間。一令人害。則戚不能寐。上嘗問希憲家居何爲。左右以讀書對。上曰。讀書固朕所教。讀之不肯見用。何多讀爲。阿合馬讒。

曰。彼日與妻孥燕樂爾。上色變曰。希憲清貧。何從燕設。右丞相安童奏。王行省河西。上曰。河西諸王列地。希憲執法於朕。意無所曲從。豈聽宗王語者。疾作。上遣御醫三人診視。或言須沙糖作飲。良時最艱得。王弟求諸阿合馬與之二斤。且致密意。王推著地曰。使此物果能活人。吾終不以姦人所遺愈疾也。上聞。特賜三斤。先以嗣國王條。輦哥行省鎮遼。嚮東人有言。王疾稍愈。上命王往。肩輿入辭。朝廷大議。朕將與之論決。賜坐上曰。昔在先朝。卿先事知幾。每慰朕以帝道。及鄂陟班師。婁述天命。朕心不忘。丞相卿實當爲。顧自退託爾。遼嚮戶不數萬。政以諸王國壻分地所在。居者行者。聯絡旁午。明者見往。知來。察微燭著。塔察兒諸王素知卿能。命卿往者。當識此意。王至北京。問民所苦。皆曰。有西域人自稱駙馬。營於城外。逮繫富家。誣其祖父嘗貸子錢。訊之使償。無所於訴。旦日持牒告王。卽遣吏逮駙馬者。其人怒馬而來。直入省堂。徑坐榻上。王令曳下。跪而詰之曰。制無私獄。汝何人敢爾。繫民其械。繫之哀禱。請命國王亦爲之言。稍寬待對。一夕拔營遁去。塔察兒使者傳旨。國王立聽。王坐自如曰。大臣無爲諸王起也。使者還語其王曰。朝廷大臣彼無違禮也。詔國王歸國。王獨行省事。朝廷發寶鈔。市馬六千五百。王遣市東州。盡所發鈔。得羨馬千三百。王曰。上之則類自銜。其以馬依元直。予他郡。他郡馬不入數。害及其民。終不忍分彼此也。長公主及國壻入朝。縱獵郊原。發民牛車。載其所獲。徵求須索。其費至鈔萬五千貫。王譏公主。從者怨食不及。王曰。我天子宰相。非汝庖者。國壻怒起立。隨之曰。駙馬縱獵原禽。非國務也。費民財不貲。我已馳奏矣。國壻愕然。入語公主。公主出飲王酒曰。從者煩民。我不知也。請出鈔數償民。幸公止使者。自後貴人過者。皆不敢縱。王師渡江。下江州。急召王入朝。會右丞阿里海牙下江陵。圖其地形。上之。請曰。荊州西距梁益。

南控交廣。據江淮上游。誠爲要地。非朝廷重臣。開大府以鎮之。未足綏新附。來遠人。上夜召王。賜坐。曰。荆南入我版籍。彼新附者。感恩忘苦。未來者。懷化效順。宋知我朝有臣如此。亦足以降其心也。南土溼下。於卿疾非宜。今以大事託卿。卿不辭。賜卿以其入食留者馬五十疋。給從者。王對曰。臣每懼識度淺薄。不能仰荷重寄。何敢辭疾。力請不受新賜。詔荊湖行省承制官三品以下。刻印版授。奏入制出。王暑行至鎮。戢諸軍毋擅離部。闕城門勿譏往來。弛燈火之禁。通商販之塗。館傳豐潔。邸舍相望。弭競止虐。掩骼埋瘞。嚮孥者罪之。殺俘者坐之。文武效力。小大協心。材者官之。不問新故。王一以清簡自居。安輯爲務。號令施惠。如旱而雨。谿巖耄倪。人與王對。瀉瀆水于江。得田數百萬畝。聽民耕佃。三年半。征收沙市失收米二十萬斛。足二歲用。俄公安饑。發之以振。王曰。民粗安矣。風教不可後也。乃大興學。旦日親至校官講授。以倡他郡。撤官屋以復竹林書院。予書萬四千卷。學者日盛。王既不納諸人贄金。見者輒獻所俘男女。王卽受之。聽其歸完。歸者感德。自稱廉民云。王或疾。士民羣走僧寺道館爲王祈福。語及必額手叩齒。祝曰。願我公永長。我人政化大行。聲及四遠。思播田楊士氏。負固不下。遣使納款。重慶趙定應。堅守恥降。遣使納款。王語二使曰。歸語爾主。速歸所隸。以全民命。我已馳奏天子。詔安爾土矣。奏上。上曰。國家不用兵。得地未之見也。希憲坐致數千里外之堅城勁士。其仁政爲何如也。賜西域善藥。高昌蒲桃酒。寶慶。武岡。益陽。安化。善化。寧鄉。諸城籍編民。冒圍納款。王移文其省。使安全之。鎮遠谿洞蠻酋。以其樂工四十餘人。重譯來。至曰。願奏土風於天子之庭。王曰。而輩獨無父母妻子乎。驅迫而來。豈其心哉。且天子仁聖。不重夷音。皆泣拜而回。關譏得江陵人私書。不敢發。封樞密臣發之上。前其語曰。歸附之初。人無生意。大元皇帝命廉相。

出鎮荆湖。豈惟人漸德化。草木昆蟲咸被澤矣。上歎曰。希憲不嗜殺人。故能至此。王疾日劇。僉樞密院事。董文忠奏曰。江陵濕熱。奈希憲沈疴。上卽召還。荆南人聞王當去。皆號泣隨之。擁所乘車不得行。王慰喻再四。乃拜哭而別。大者繪象建祠。小者書版瞻禮。王囊橐蕭然。琴書自隨。朝于上都。詔館於華嚴寺。酒人饈夫。日敕供餽。王語太常田忠良曰。上都。聖上龍飛。國家根本。近日火延龍岡。居民常事。無令雜學。小生妄談風水。感動上意。未幾。宰相果與南士數輩。廷辯遷都。田奏王言。上曰。希憲大病。念亦及此邪。南士之議遂寢。詔徵名醫。王仲明于揚州。未見行意。士大夫責之曰。君術固妙。其能已億兆人之疾乎。蒼生懸望。廉公復相久矣。能起廉公。是惠及天下也。仲明乃至。進其良劑。能杖而起。上喜。召入曰。聞卿比得良醫。日俟痊復。王對曰。醫持善藥。治臣沈疾。苟能戒謹。誠如聖喻。稍爾肆情。終將不療。蓋以醫諫也。上曰。卿從幾人。對曰。惟一弟扶贊。上笑曰。儒習不少。變邪。命近侍舉御前白金。賜王爲兩五千。勅中書賜鈔萬貫。曰。賞卿清白也。議立門下省。上曰。首官何稱。曰。侍中。非希憲不可。遣近臣諭旨曰。鞍馬之任。不以勞卿。乘軒論道。時至治所。必煩親奏。肩輿以入。王附奏曰。臣疾何恤。輸忠效力。生平深願。皇太子方聽天下政。遣人賜蒲桃酒。諭王曰。上命公領門下省。勿難羣小。吾爲公德。阿合馬不利而止。時營繕東宮。工部官請曰。牡丹名品。惟相公家。乞移植數本。太子知出公家矣。王曰。若出特命。園雖先業。一無所靳。我蚤事聖主。備位宰相。未嘗曲勾恩幸。方爾病退。願以花求媚邪。請者愧止。十六年春。詔復入中書。王稱疾篤。皇太子遣侍臣楊吉丁問疾。因叩治道。王曰。君天下者二道。用君子則治。用小人則亂。臣病雖劇。委之於天。所甚憂者。大姦專柄。羣邪蠱附。誤國害民。病之大者。殿下宜開聖意。急爲屏除。不然。日以沈痼。不可藥矣。語聞深嘉。

重之上。嘗語王曰：受戒國師。因參內典，開益神智。對曰：臣幸蒙聖訓，久受孔子戒矣。上曰：孔子何戒？曰：臣也盡忠，子也盡孝。上頷之。嘗戒子恪，恪曰：丈夫見義勇爲，禍福不足逆計。又曰：宰相須有力量，未有無力量能爲賢相者。天下苟無牽掣，三代可復也。又曰：稷、契、皋、夔、伊、傅、周、召，便謂無及，是自棄也。又曰：汝讀狄梁公傳否？梁公有大臣節，乃爲不肖子孫所墜。汝輩當深以爲警。疾革曰：吾疾不起矣。兒惟多讀書，以承父志。夜大星隕于正寢之後樂堂，流光燭地，久之方滅。是夕王薨。至元十七年十一月十九日也。春秋五十。越某日，葬于宛平之西原。訃聞，天子痛悼，士大夫走哭相弔。天下之知者，無不嗟傷。咸曰：良相死矣。吾復何望！上每追思之，曰：當諸王大會議，決大事，惟廉希憲能也。夫人偉吾氏，先朝貴臣孟蘇速女也。生一男曰孚，正議大夫，僉遼陽行省事。三女：適監吉州路淑丹，適監嘉興路撒里蠻，適同知雜造總管府事蠻資。夫人完顏氏，知中山府事海撒女也。寬明貞亮，慈惠厚和，與王德齊。清規雅範，有內助焉。生五男曰恪、通議大夫、台州路總管恂、榮祿大夫、中書平章政事忱、同知沔陽府事恆、資德大夫、御史中丞惇。太中大夫、西蜀四川道肅政廉訪使。三女：適參知政事劉緯，適安撫使李恭，適管軍萬戶何德溫。成宗皇帝制贈清忠粹德功臣。太傅、開府儀同三司，追封魏國公。諡文正。兩夫人追封魏國夫人。仁宗皇帝制加贈推忠佐理翊運功臣。太師、開府儀同三司，上柱國，追封恆陽王。仍諡文正。兩夫人加封恆陽王夫人。皇上旣御宸極，壹新庶政，由御史中丞相恂、平章敬遵家範，克奏父勳。天子嘉之，詔中書曰：其命翰林學士明善，製恂父恆陽王碑文。臣奉詔莊讀王之家傳，次第而論曰：丞相淮安忠武王曰：廉公宰相中真宰相，男子中真男子，可謂名言。然勳隆帝室，澤被生民，用舍合道，安危一節，大人之事備矣。臣再拜稽首，銘慕神道。其

辭曰。

天祐大君。嶽降大臣。君臣協慶。宏濟斯民。烈烈世祖。如日亭午。照臨萬國。暉光草土。惟恆陽王。帝命肅將。如雲龍從。膏澤滂滂。左右聖皇。大開明堂。四朝寧侯。奏功效良。手援羣溺。措之安康。手援衆焚。濯濯清涼。饑食之食。寒衣之衣。汝無怖啼。吾母而依。汝或受傷。吾爾藥治。民曰相公。卒相天子。毋去廟朝。我民是倚。遼馨安化。齊魯嗟痾。天有偏恩。我不久公。帝軫荆南。撫養其堪。恩浹威行。坐嘯府覃。秦蜀士女。跂踵引領。公昔父我。孰我之梗。我父不來。疾也孰省。稽德無矜。考功無成。巍乎元宰。退然諸生。先天下憂。後天下樂。范得我心。我非范學。堯舜吾君。夔契在我。時無留閔。何施不可。格君以道。持身以義。蹈中絕利。行與天契。其生也順。其死也安。厥施未殫。畢世永歎。尙在肖息。鏡考躋攀。發其所蘊。肆其所難。功名成紀。突葉襲祉。帝歷萬年。奮有廉氏。上爵尊官。醴其前勳。孰知帝德。配天無極。奉詔劄詩。千祀昭垂。慕者儀之。肆其齊而。

河南行省左丞相高公神道碑

元明善

公姓高氏。諱興。汝南人。其先薊人。遠祖青。徙蒙城。又徙隨之洪山。父祖農。隱公。慷慨多大節。不肯低心。鉏耜氣長。出人上。蚤歲已稱偉丈夫。至元十二年。從丞相淮安忠武王伐宋。渡江破瑞昌之烏石堡。破張家砦。破王家砦。陷南陵。丞相以公功聞。世祖皇帝詔公專將宋將張濡。殺我行人嚴忠濟等。於獨松關。丞相使公報濡。再戰。斬吳杜李三總管。及甲首萬級。擒祝亮等四十二人。破溧陽。錄前最授懷遠大將軍。管軍總管。佩金牌。戰銀墅。斬將三甲。首級二千。陷建平。獲知縣事黃君濯。破獨松關。斬谷總制。戰張濡。武康禽濡。復命。十三年。我師入宋。遣公征南下建德。降郡守方回。下婺州。降郡通守劉甲。衢人畔。七戰至破溪。公

孤軍戰敵七萬。凡三月。退屯建德。宣撫使梭都。益師進戰蘭溪。斬級三千首。擒吳纘。制唐知縣。復婺州。追擒郡守章煇等十九人。戰衢城下。斬首五百。戰赤山。斬吳監軍。其軍潰。戰陳家山。圍二日。斬甲首七千級。戰江山。斬三千首。擒五百人。僂於衢門。獻大將魏福興七人於行省。追趙秀王十日。夜及於福安。趙秀王陳三萬人水南。我師奪橋奮擊。斬觀察使李世達等三千級。擒趙秀王與擇小王二裨將。二獲印五馬五百。下興化。宋參政陳文龍降。降制置使印德傅等百四十八人。軍三千。水手七千餘人。得海船七十八艘。十四年。旋師鎮婺。遷鎮國上將軍。管軍萬戶。佩金虎符。俄加衢婺州招討使。閩人叛。行省檄公討之。公請以忙古臺爲都帥。東陽賊張九強和尙。殺我宣慰使陳祐。公進斬賊首千。擒張九和尙。忙古臺至自揚州。平福建。漳三州。破敏陽等賊砦十。戰賊福成砦。屠萬人。公留鎮閩。宋故將黃華。以四萬人畔。公降之。宋故將高日新。從閩畔邵武。公討降之。十五年。兼右副都元帥。召公入朝。從諸校三百餘人。詔高元帥及其從列布伯上布伯。亦大將也。侍燕大明殿。公奏曰。臣部五百人。露元袒臂。奮刃死敵。勞烈如右。乞陛下官之。詔曰。卿自定其秩。頒宣勅金虎符。金銀牌。鞍馬衣服弓矢。各有差。公遷輔國上將軍。浙東道宣慰使。賜西錦服鞍轡。討降海賊顧招討。處州賊富大王反。公戰三十。擒富大王等。破斬賊無算。又平王南尉賊。漳州賊起。別將討二年不下。詔公福建等處征蠻右副都元帥。賊據高安砦。公身攻砦西北。中弩矢五。破砦。斬渠賊黃總管。得首二萬。平凡七日。賊陳弔眼聚衆十萬。據五十餘砦。公進破十五砦。陳弔眼隘險。公步與賊角一日。賊不支。弔眼手殺妻子。潛遁。獲馬五百。明日。弔眼塞千壁嶺。拒我。公誘弔眼釋兵。面語。弔眼下至山半。公上與語。遽接其手。掣下弔眼。及擒賊二十四人。俱戮。以徇。餘黨悉平。十九年。有詔入朝。賜銀五

百兩寶鈔二千五百貫。西錦服鞍轡弓矢。休所將軍一年。二十年改宣慰浙西道。建寧賊黃華反。有衆十萬。燒信州南門。公統兵戰賊鉛山。獲八十人。戰賊分水嶺。取嘉禾。賊攻建寧急。公卷甲趨之。會福建之師與賊戰。獲賊渠葉都統。梁都統等。黃華走江山洞。公追之赤巖。黃華嚴陳慶半日。華敗走。走赴火死。擒華二弟及其妻子。二十一年改宣慰淮東道。二十二年召赴闕。勅副雪滴斤征緬。公辭曰。臣不敢愛死。母老子幼。無他兼侍。願盡母年。惟陛下所使。上允其誠。二十三年遷階奉國。江淮行省參知政事。平婺州賊。施再十。改宣慰浙東道。朝二十四年改行中書省爲尙書行省。復參政丁太夫人憂。廬于汝寧。墓側行省請討浙東賊林洪平之。又討獲賊柳分司。二十七年處州賊詹老鷄三萬。温州賊林雄四萬。僞立樞密都督府。改年刻印。公潛由青田險至葉山。追及賊。賊陳而待。戰擒詹老鷄。林雄等二百餘賊。斬獲不。會徽州賊起。討四月不下。公進師何秧砦。擒汪大王等七十餘人。斬之。軍至淳安。召父老諭之曰。吾麾吾旗。賊良一碎。爾民能擒送賊者。賞爾如良。民驩去。縛七百賊來。會賊財物與縣代民今年夏稅。二十八年罷福建省。進階驃騎參政。行福建道。宣慰使。拯荒殘。理冤滯。安反側。撫良愿。閩人大和。鈎考省庫隱官錢五十萬貫。倉盜糧數萬石。諭降漳州賊歐狗。詔公入朝。遷金吾左丞。行江西省。二十九年奏復立福建行省。改資德大夫。福建右丞。奏罷福建鹽運司。海船萬戶府。鐵冶提舉司。爪哇鯨我行人孟琪。詔以公及史弼爲平章。帥師討其罪。置福建平海行中書省。隸左右都元帥府。二征行上萬戶府。四發兵七千。賜公玉帶。西錦服。甲胄弓矢鞍轡。大都良田千畝。進階榮祿。諭公曹彬不殺降事。以三十年正月一日浮海。二月十三日抵爪哇界。史弼將水軍。公將步軍。期集八節洞。王士罕畢闍耶舉國將遣其相來言。葛郎王合只葛當帥數

萬衆奪我地。公救之。進軍二道。殺數百人。賊潰。及西來賊戰。戰至暮。賊敗。公虜爪哇。葛郎合。遂伐其謀。合只葛當。陳兵十萬。公督戰。自旦至午。賊退。史弼軍繼至。擁賊入水。死數萬。斬首五千。合只葛當乃始降。遣使招旁小國。公帥千人深入。盧葛郎王次子。燒其宮。比還。史弼已縱土罕畢閣耶歸國。遂畔去。誅合只葛當及其子。載二國諸寶。及旁四小國臣師還。十一月一日。獻俘紫檀殿。賜公黃金五十兩。罪縱土罕畢閣耶者。是役。徵公師幾不反。成宗登極。改福建行省平章。賜玉帶。號拔都魯。夏言冠軍也。大德三年。以誣告者入對。事白。誅誣告者。改江浙平章。八年。授樞密副使。十年。進同知。皆兼平章。改河南行省平章。武宗登極。召赴闕廷。賜成宗御服。遷銀青榮祿大夫。左丞相。商議河南省事。自至大元年。至是。凡二十年。制賜世祖御服。夫人金紋幣。今上賜銀及袍材。皇慶二年九月二十日。薨于大梁之路寢。訃聞。詔若曰。抒忠竭力。國之寶臣也。其令汴省臣加禮以葬。某月日。葬祥符之史湖里。春秋六十有九。延祐三年三月。制贈推忠效順佐理功臣。太師。開府儀同三司。上柱國。追封梁國公。諡武定。夫人某氏。子某某。官集賢大學士。李某。奉勅命。臣明善。爲公撰次墓神道碑文。臣惟高梁公。始提孤軍。爲國出死力。百戰以成功名。何其壯哉。由一校拜官。至丞相。贈太師。封大國。錫上諡。國家之於功臣。亦云厚矣。建戲桴鼓。萬人土靡。而官極品。壽七。十子男數人。斯又何耶。蓋世祖方夷大患。致天下於泰定。非假手雄傑。奚有今日之隆。而公也有功王室。固大有德在民。潛施於不識不知之地者。亦多矣。雖然。公之建立。烈烈若此。繼之而起。益震益顯者。端在諸公子也。臣謹獻文曰。

天命聖元。帝臨天下。太祖辟國。斲金滅夏。世祖一統。乃屋宋社。維此宋孱。元戎是禡。帝曰丞相。汝師渡江。

凡爾征夫。毋戕我降。糾糾梁公。孰敢嬰鋒。按劍愕眙。萬夫失雄。如虎如龍。騰奮雷風。無強不破。無堅不攻。既虜元王。丞相還朝。羣盜驩跳。執戈怙然。首鼠林莽。乘暗發髑。朝斬千磔。暮集萬叟。晝栖巖巢。夜出民騷。凡二十年。有伐斯馨。陋彼海邦。汗漫天池。奉辭伐罪。驅進王師。兩主就執。孰縱其一。既縱乃畔。投兵穴竄。載厥妃兒。珍怪陸離。歸獻赤墀。帝曰噫嘻。道厥罪魁。汝賞彼笞。梁公承聖。百戰百勝。勳在宗稷。著于國令。既蕃既宜。樞機是權。端揆之垣。致理平平。爵以功遷。人由正賢。多壽而安。多子而官。歸完路寢。而德不寫。天實相之。相夫人者。史湖有石。勒此詩雅。維範維垂。流輝朝野。武子之承。文孫之繩。奕世重昇。何可紀齡。

襄城令董府君神道碑

元明善

襄城董氏。自太傅壽國忠烈公顯。忠烈奮田間。有佐命勳。復與金人戰死。冢子金紫光祿大夫。平章政事。忠獻公輔世祖皇帝。平六詔。闢江漢。竟滅宋。一四海。爲國元臣。然忠烈死事時。九子皆少。忠獻年十六。事母李壽國夫人。夫人持家。既有法。忠獻復善教育諸弟。俄上命忠獻令鄉縣。縣大治。號爲神君。數年去。從世祖軍。久之。上復以君嗣。令實佩黃金符。盡蹈前蹟。益勵清敏。乃求政要。賢良者。使在官。悉逐諸剝削民者。振德孤弱。勸率耕蠶。而均賦役。時禁網尙漏。官者未祿。苞苴一絕。豪不得曲法於貨。訟罔不平。民自以不訟。乃修孔子廟。廣黌舍。招名儒。躬行舍菜禮。執經問道。以先諸生。醫究經脈。吏明法律。亦命相師。凡五年。民士著盜賊屏息。物阜家給。俗厚而人能。里巷肅然。至相戒曰。毋過。過必令知。迨今襄城人。或譙爲縣者。輒曰。汝吾董君。聞君諱。文直字彥正。忠烈第四子。剛毅莊栗。簡言笑。通經史法律。初忠獻及季弟大司徒忠貞公。去事世祖。次兄少保忠穆公。亦在朝。俱有仰於家。而家食者。餘百口。待藷而衣。指苗以飯。君倡

勤昭儉始卒不替。內則養生祀死之合禮。外則中表賓問之中度。奉上接下。一敬一愛。藹乎其睦也。又好施而甚仁。里間或貧不自立。每陰濟其棘。不使之知。恩所來。微至僮病。必手予粥藥。或止之。曰。不忍以其賤。違吾愛心。及棄官浮沈里社。任真適意。親賓過從。尊酒相勞。家門日以烜赫。已獨恬然。不見諸辭色。至元十三年。歲在丙子五月十日。以疾終。享年五十有二。其年七月十有六日。葬于九門之北原。君娶楊氏。臺城丞沂之季女。賢而克配。相君子以成。又二年之六月七日卒。多君壽一年。合葬。子男士表。從忠獻下江南。有戰功。其最者。宋將張世傑。陳大軍焦山下。致死於我。忠獻爲元帥。將戰分而請先。忠獻閱其無兄弟不許。固請乃許。父子果大捷。策勳累遷鄧州新軍萬戶。改淮東屯田軍萬戶。佩金虎符。階至定遠大將軍。女適同知真州路總管府事蕭允功。孫男守義。嗣屯田萬戶。曾孫男鉤。劍昔者。君之哀聞于忠獻。忠獻方留鎮宋都。哭之慟。左右曰。公慟傷。奈國事何。忠獻收淚曰。身及諸弟子。出理皇家。委百口。是弟勞苦三二十年。吾無內顧。今而後永負之矣。復大哭。夫一門四世。若相若將。光輔累朝。清忠純孝。昭耀天下。世之談者。必首董氏。趙人張世昌先生之狀曰。君範家類。柳公綽。馭吏類。包希仁。潔己類。吳處默。若君者。國家得而大用之。未必不與兄弟並輝。齊烈。此墓碑之待表。與信辭也。雖然。蘊德深者。其發必大。以遠。子將孫將。克宏世業。而孫也。器宏而才良。蓋大者哉。明善於董氏爲門生。宜爲表君之辭。辭曰。抑抑董君。憲憲令人。巍巍閔赫。赫父。曩佩黃金符。來吏鄉縣。民亦有謠。來適我願。匪鑑而明。匪冰而清。民斯懷之。播遠頌聲。於戲君子。胡器之盈而敦。而璉。清廟是承。大廈棟楹。杞梓乃勝。列戟差差。朱戶輝里。高牙虎節。鑾和至止。惟曩弟之榮。惟章服之華。何必在身而起。歆嗟。慨彼厚壤。九門北原。下有九泉。孰急。

斯賢。慨彼旻天。羽者翬聯。瑞若皇鸞。孰靳高鶩。人貴乎德。德大人。大而弗達。德也奚害。銘以揭隱。昭示來代。尙萬斯年。無泐攸載。

集賢直學士文君神道碑

元明善

宋死節臣少保右丞相兼樞密使信國公。姓文氏。嗣子曰集賢直學士。奉訓大夫。諱陞。字遜志。本皇朝嘉議大夫。同知廣西道宣慰司事。信公之弟諱璧之仲子。信公二子蚤亡。初就死時。過先太師墓。告而使之。後。皇慶二年。青龍癸丑。春。代天子祀淮濟二瀆。中南二嶽。及南海。六月二十有五日至贛。以疾卒。得春秋四十有六。卒不一月。有以聞至京師者。其友玄德真人吳全節翰林侍講學士元明善。哭之曰。審耶。傳者妄耶。曰。或審矣。君雅病熱。不貫於馳。而驛道萬里。六月。歷嶺海間。審矣。雖然。君生也無嫌。而死也。又無憾。惟書之于墓石者。我與子知之。子當秉筆。又再月。孤富果走人奉狀。託玄德問銘於明善。嗚呼。審矣。忍銘予亡友耶。是良友可不與銘耶。狀曰。文氏自成都遷廬陵。七世祖炳然。居郡之永和。六世祖正中。居富川。五世祖利民。高祖安世。曾祖時用。祖儀。用子信公。貴贈太師。祖妣曾氏。齊魏國太夫人。昔信公囚中。與君書曰。吾死吾節矣。汝能世吾詩書。真足後者。公喪歸。君廬墓側。毀瘠幾不起。信公家被失。夫人歐陽氏。後有傳其猶在北方者。君泣誓曰。父骨既復於土。母生而不得養。我則非子。跡交海內。猶將求之。況有徵。敢憚遠行。行不母得。吾必不歸。凡五年得之。平章康里文貞公。道德威望。蓋一代士。得接納者。爲榮甚。延君至府。公卿大夫滿席。公曰。宋養士三百餘年。死國之昭昭者。文丞相一人。斯其子也。坐之客右。謂君曰。子賢乃公。良願見子。吾請見子于朝。君對曰。得母歸養。恩寬天地。仕非志也。衆咸曰。臣者有其父之忠。子者

有其子之孝。美哉乎文氏。既歸二年。歐陽夫人卒。喪之合禮。今上之初。徵求儒士。不限官級。近臣以君聞。勅江西省臣。禮遣乘傳入朝。見光天宮。執石本九經。奏書一通。其略曰。臣陞徒。以先父之故。辱降特命。召臣。臣愚無一足用。不敢違。謹待罪闕下。然臣聞帝王之道。布在方冊。方冊之要。無先九經。臣輒獻九經。伏望陛下。采其所載。資輔聖祖神宗之法。嘉惠天下萬世。上說受其所獻。藏之祕書。命中書頒制。予今官明年。從幸上都。詔若曰。尙書。帝者寶範。臣軌粲然。譯爲國語。朕便於觀覽。兼使國人習讀。今以命汝。集賢學士某。次明善及君。是年集賢院臣。奏建京師孔子廟碑。增國子員。免天下儒士徭役。君實贊之。君娶徐氏。故宋兵部侍郎卿孫之女子。男三人。長卽富也。次曰實。曰竒。女六人。長適胡孝友。次適徐益。餘在室。富以某年月日。葬君於某山某原。禮也。銘曰。

肅穆爾門。道諧聖君。何二三年。忽焉以泯。天耶果人。天孰疏親。哲而其頽。莊而謙謙。孰本以廉。不老忌嫌。翼翼子服。如不我克。昔也天民。無戾天德。今也帝臣。允由帝則。彼不達人。小中闕瞰。嘗試大觀。萬物皆慳。存者奚哀。遊者奚憾。鬱乎藪澤。萃乎巒峯。違諸不利。惟古之叢。藏君其中。福及爾宗。我詩在石。石與山崇。山有時夷。不磨顯詩。

元文類卷之六十六

神道碑

福建廉訪副使仇公神道碑

趙孟頫

仇氏望陳留譜云宋大夫牧之世入金有更朔平臨潢二縣令者諱輔卽家臨潢臨潢之曾孫昌平府君實徙京兆府君生三子其中子則公也公諱鏗字彥中始亂從府君出禮賓客容已落落善占對長益涵揉於學要能以奇氣偉節自致至元八年公二十二年矣安西王時以親王鎮京兆喜優納人士公布衣入謁王語合意竟留給事郎中久之上其能卽試公武備寺壽武庫使十五年遂出知威州二十年稍遷鞏昌路總管府治中治皆有聲稱二十五年進階州尹未赴遭內艱於是御史廉得公威州鞏昌數事薦諸朝二十七年乃以福建閩海道提刑按察副使起公明年制改肅政廉訪司卽用公爲副使閒歲自免去北過高郵樂其土風因留居焉大德四年八月十日以疾卒年五十一自承務郎三遷官至奉議大夫卒之日無副楮僑家巷處之舊聚哭一辭曰善人亡矣至大四年其子治濟濬浩迺克自力奉公喪還卜大都宛平縣西山夏莊之原藏焉窆以四月辛酉其域距祖塋五里公性開疏與人交底裏傾盡爲政多本教化而持身絲毫不敢欺方少未仕見白金遺道傍初不顧已而計曰我幸見之不則他人持去矣卽俯拾俟有閒求者至自言適貸得將營親葬公詢驗果然出金還與之在威州民張氏兄弟訟家財吏展

轉賊賂。更數歲莫能決。公召諭之曰。兄弟孰與吏親。民曰。兄弟同氣。吏途人耳。公曰。弊同氣以資途人。如何不知之甚。卽大感悟。相抱持以哭。遂爲兄弟如初。時屬縣吏李子秀。慢令當筭。公卽命釋縛。呼前曰。若軀長六尺。徒甘筮楚閒。不知有功業。可指取耶。吾與若約。三日若不力。吾將重寘於罰。後公出安西。有從騎十數。西來見公。遽下馬拜曰。我常筭吏也。公向脫我罪。又勗我仕。今效節兵伍。爲千夫長。微公豈有今日。在鞏昌會歲大旱。草木枯盡。僚吏請禱。公曰。得無以冤獄致是乎。取某事按問得實。平反上之。大雨三日。在閩。屬行省臣有以采銀爲利獻上者。朝廷下其事。設官賦民。而地實無礦。民往往貴市入輸。公急劾聞。有旨罷其役。建寧劉氏居麻沙村。曠中讎誣其有反狀。州若縣將織邏成獄。公慮囚及之。喟曰。有是乎。有是乎。卽抵以法。公仕雖蚤。當官之日不多於閒放之時。故其施爲注措。概逸不傳。今掇其士大夫口道以熟者。一二志焉。雖然。猶爲試用者小耳。令充周而極究之。則古循吏不足多也。公會祖忠源。仕金爲定遠大將軍。蘭州司法。祖福。明威將軍。父昌平府君。諱德明。隱居教授。曰樊川處士者。府君自號也。以弟銳升朝恩。贈奉直大夫。飛騎尉。追封昌平縣男。母王氏。追封昌平縣君。銳後至中順大夫。嶺南廣西道肅政廉訪副使。其元兄鐸。亦朝列大夫。雲南諸路肅政廉訪副使。公先夫人郝氏。贈榮祿大夫。大司徒。薊國公諡孝懿。諱德義女。先十一年卒。生三子。二女。後夫人黏合氏。先一年卒。一子。三女。其葬以二夫人祔。治高郵府。興化縣尉。濟從仕郎。太常太祝。濬承務郎。太廟令。浩。蔚州儒學正。壻曰程博。組錦局使。吳燾。中書省掾。盧亘。翰林侍制。承務郎。兼國史院編修官。姚庸。奉訓大夫。戶部員外郎。其一未行。孫男五人。曰敬昌。慶昌。順昌。延昌。隆昌。昔公愛錢唐。比過之。輒留旬月。往往援琴以寫山水之清音。故與余同好相善也。今年

延祐六年。距公葬八年矣。而其子治。丐余文其隧上之碑。不腆之言。公實知之。矧專記撰。尙何容辭。銘曰。蓄之涵涵。流之漸漸。莫或匪泉。築之疏疏。構之渠渠。堂亦有焉。我觀其終。有植之隆。有發之涓。謂德既儀。不卒於施。而又不年。不彌其盈。不侈其傾。以游於天子。則維宗女。則維從其之孔延。西山之原。岡阜厚完。有封斯阡。以引以休。以質諸幽。上考銘鑄。

御史中丞楊公神道碑

虞集

泰定改元。詔書以御史中丞朵而只爲鐵木迭兒所構害。命昭雪之。三年某月日。特贈思順佐理功臣。金紫光祿大夫。司徒上柱國。夏國公。諡曰襄愍。明年某月。御史臺奏用其子武備庫提點不華。僉河東山西道。肅政廉訪司事。不華旣拜命。乃泣而言曰。惟先臣之死。於是七年矣。陛下幸昭雪而贈卹之。固已釋冤憤。感恩德於地下。臣雖萬死。懼無以報稱。願於法得立碑神道。願載其事於貞石。以昭陛下之明聖。敢昧死請。明日臺臣以聞。制曰。可。且命臣曰。汝集其具書以文。臣再拜稽首而言曰。朵而只事具見明詔。天下咸共聞知。臣敢具終始可徵者。武宗皇帝方賓天。皇太后在興聖宮。以鐵木迭兒爲丞相。踰月。仁宗皇帝卽位。遂相之。居兩歲。得罪斥罷。更自結興聖左右。至爲折辱。宰輔撓制中書。諷以再相。旣而居位。怙勢貪虐。兇穢滋甚。中外切齒。羣臣不知所爲。於是蕭拜住自御史中丞。拜中書右丞。又拜平章政事。稍牽制之。而朵而只自侍御史。拜中丞。慨然以糾正其罪爲己任。上都富民張弼。殺人繫獄。鐵木迭兒使大奴脅留守出之。及強以它姦利事。不能得。丞相坐都堂盛怒。以它事召留守。將罪之。留守昌言。大奴所干非法。不敢從。它實亡罪。丞相語詘。得解去。而中丞已廉得鐵木迭兒所受張弼賂鉅萬萬。大奴猶數千。使御史徐

元素按得實入奏。而御史亦輦真。又發其私罪二十餘事。天子震怒。有詔逮問。鐵木迭兒匿興聖近侍家。有司不得捕。天子爲不御酒飲者數日。以待獄竟。盡誅其大奴同惡數人。鐵木迭兒終不得。中丞持之急。興聖左右以中旨召中丞至宮門。責以違旨意者。對曰。待罪御史。奉行祖宗法。必得罪人。非敢違太后旨。天子仁孝。恐誠出太后意。不忍重傷。咈之。徒罷其相。而中丞亦遷集賢。天子猶數以臺事問之。對曰。非職。事臣不敢與聞。所念者。鐵木迭兒。雖去君側。反得爲東宮師傅。在太子左右。恐售其姦。則禍有不可勝言者。其後仁宗皇帝棄羣臣。英宗皇帝猶在東宮。鐵木迭兒復爲丞相。乃宣太后旨。召蕭拜住。朵而只。至徽政院。與徽政使失里門。御史大夫禿忒哈雜問之。責以前違太后旨之罪。對曰。中丞之職。恨不卽斬汝。以謝天下。果違太后旨。汝豈有今日耶。又引同時爲御史。證成其獄。顧二人唾之曰。汝等嘗得備風憲。願爲是犬彘事耶。坐者旣慚俯首。卽起入奏。未幾遽稱旨。執而載諸國門之外。俱見殺。是時風沙晦冥。都人恟懼。道路相視以目。及天子卽位。詔書遂以誣罔大臣爲之罪名焉。其勢旣成。睚眦之怨無不報。太后爲之驚悔。而天子久亦覺其所譖毀。皆先帝舊臣。滋不悅。未及有所論治。而鐵木迭兒病死。會有天災。直言會議廷中。集賢大學士張珪。中書參議回回。皆曰。漢殺一孝婦。三年不雨。蕭楊等死。不以罪。豈直一孝婦乎。是時鐵木迭兒諸子。列在禁近。威儀猶熾。聞者失色。言終不得達。及珪拜平章政事。始入堂署事。卽告丞相拜住曰。賞罰不當。枉抑不伸。不可以爲治。蕭若楊等冤。何可不亟昭雪也。丞相聽之。鐵木迭兒之子。相繼以賊敗。遂籍其家。然昭雪之事。終至治之歲。不遑暇。及今上皇帝入繼大統。詔書首以爲言。褒贈哀榮。相踵而至。幽明兩致其感動焉。於乎。粵若我仁宗之仁孝。文物大備。英宗果銳法度。脩飭。自古帝王之有。

德有爲者。未能與並倫。而一鐵木迭兒。常因國有大故。乘間用事。以傷平明之治。天人共憤久矣。然卒保其首領以歿。而忠臣直士。爲所誣構者。乃有待於久而後明焉。此其人深伎奇數。亦非常之材也乎。方其盛時。宦寺固結於內。術智爲用於外。幾莫如之何者。其計亦略得矣。而能嬰其鋒者。一二正人而已。卒皆蹈死而不悔。天下後世。聞其風者。固欲考見其人之行事。以表忠直之終不可泯者焉。然則若朵而只者。臣敢不敘次。以塞明詔之萬一。謹按公名朵而只。姓楊氏。世家河西寧夏。祖失刺。贈推忠佐運功臣。太保。金紫光祿大夫。柱國。追封夏國公。諡忠定。父失刺。唐兀臺。贈推忠翊戴功臣。太傅。開府儀同三司。上柱國。追封夏國公。諡康靖。公少孤。與其兄始齟齬。亂。知自植立。語言儀觀。已如成人。兄弟相勵。以勳業。當時固以大器期之。事仁宗于藩邸。甚見倚重。大德丁未。從在懷孟。聞朝廷有變。將北還。命公與李孟先之京師。與右丞相荅刺罕。定議迎武宗于北藩。仁宗還京師。機察禁衛。密致警戒。仁宗感焉。至親解所服帶。以賜。既佐定內難。仁宗居東宮。論功以公爲大中大夫。家令丞。日夕侍側。雖休沐不至家。官事亦決于宿次。衆敬憚之。會兄卒。涕泣不勝哀。仁宗憐之。存問優渥。待寡嫂有禮。待兄子不異己子。家人化之。循循然。毋敢失辭。氣進。正奉大夫。延慶使。武宗聞其賢。召見之。仁宗曰。此人誠可任大事。然剛直寡合。上顧視之曰。然終不及用也。仁宗始統大政。執誤國者。將盡按而誅之。公曰。爲政而尙殺。非帝王治也。上感其言。特誅其尤無良者。民大悅服。上與中書平章李孟。論元從人才。孟以公爲第一。上是之。拜禮部尙書。初尙書省改作至大銀鈔。視中統一當其二十五。又鑄銅爲至大錢。至是議罷之。公曰。法有便否。不當視立法人爲廢置。銀鈔固當廢。銅錢與楮幣相權而用之。昔之道也。國無棄寶。民無失利。錢未可遽廢也。言雖不盡用。而

時論是之。遷宣徽副使。御史請遷公臺司。上以宣徽膳用不會。囑公領之。未之許也。有言近臣受賄者。上怒其非所當言。將誅之。張公珪爲御史中丞。叩頭諫不聽。公言于上曰。誅告者失刑。違諫者失誼。世無爭臣久矣。張珪真中丞也。上喜。竟用張公言。公拜侍御史。上宴閒時。羣臣侍坐者。或言笑過則。上見公正色。爲之改容。有犯法。雖貴幸無所貸。而譖言興矣。賴上知公深。譖不得行。未盡八閱月。拜資德大夫。御史中丞。中書平章政事。張閻以妻病。謁告歸江南。據河渡地。奪民力。公以失大臣體。劾之。張閻罷。江東西奉使。幹來不稱職。權臣匿其姦。冀不問。公劾而杖之。幹來愧死。御史納璘言事忤旨。上怒。叵測。公救之。一日至八九奏曰。臣非愛納璘。誠不願陛下有殺御史名。上曰。然則其左遷爲昌平令。昌平京邑。地近而境隘。民勞而事煩。凡期會供億。令稍非才。恆不免捶楚。以是苦之。公又言曰。以御史宰京邑。無不可者。然以言事得左遷。恐後之來者。懲創無肯爲陛下言者。不得請。數日上讀貞觀政要。公侍側。上顧謂曰。魏徵古之遺直也。朕安得用之。公對曰。直由太宗。太宗不聽。徵雖直焉用之。上笑曰。卿意在納璘耶。赦出之。成爾直名。有上書論朝政闕失。面觸宰相。宰相怒。取旨囚之。司寇將殺之。公曰。詔書云。言雖不當。無罪。今若此。何以示信於天下。果誅之。臣亦負其職矣。上悟。釋之。於是特加昭文館大學士。榮祿大夫。以獎之。且以重耳目之寄。時位一品者。多乘間取旨。邀王爵。贈先世。或謂公眷倚方重。苟言之可得也。公曰。家世寒微。幸際遇至此。已懼弗稱。況敢求多乎。且我爲之。何以諷勵僥倖者。遷中政院使。未幾復爲中丞。遷集賢大學士。而死。時年四十二。娶李氏。同知諸路人匠總管府事某之女。有婦道。先公卒。追封夏國夫人。子一人。不華也。後夫人劉氏。同知徽州路總管府事某之女。公死時。權臣將奪以畀人。夫人剪髮毀容。以自誓。乃免。封夏

國夫人子一人文殊奴亦克稱其家者公魁偉人也寡言笑無鷹犬聲色之好獎善如不及嫉惡如仇讎用人必當其才能故一時風紀號爲得士論政事必合於義理正言無所徇麗臨患顏色不變凜凜乎古大臣之風焉其墓在宛平縣某鄉某原凡公之行尙多可述者不悉具特書其關於國事者如此故繫之以銘詩曰

河原西陲厥風勁強豪傑時興爲國駿良駿良伊何忠亮正直柔不爲隨剛不爲絀昔在仁宗治功安成文和武寧詠歌太平躬爲孝恭以事神母教言時來有順無否或闖其幾不驩以呻投巖膠膠竊乘大均天子曰嘻誠有憐獭彼爲無忌我則有制維時襄愍執法在中侃侃犯危以折其衝太母尙慈天子尙孝柙不防兇稽我天討國有大故結憂慈闈彼獨何心假時逞威朝衣載市家憤巷哭日暮風起百身莫贖人亦有言害生于恩忍爲凶殘遑卹有君君子可殺名不可滅天定人復幽枉卒雪明明天子別于姦忠敷言萬方大道爲公至榮極褒宣止哀死勸忠方來祿施孫子春秋之義誅意慎微咨爾來者尙徵臣詩

憲林承旨劉公神道碑

虞集

世祖皇帝既定天下列聖承之四方無虞民物康阜熙洽太平將百年于茲矣於是乎有博雅耆俊之士詠歌德業贊襄訏謨於其間以資飾一代之盛三代以下未之或先也於戲大夫士之生乎斯世安富尊榮自壯至老優游以終不亦幸乎中統初天子慨然思考制度定官府損益古今斟酌事宜立成憲以貽萬世時則有若劉公肅明乎刑政之要習乎禮律之通自外官召拜左三部尙書綜覈綱紀集成事功通預朝政既老而不聽其去又以爲禮樂之興由乎賢者詔誥之播風動天下簡冊之載規勸古今時則有

若王公磐。以亡金高科大儒。召拜學士承旨。文獻之事。悉以屬之。薦引成才。獎厲後進。則王公司其權矣。故承旨劉公廣。親尙書之孫。而師王公最久者也。故公之論文。則淳厚而不浮。其論治則平易而不紊。用能以老成爲國善。蔡長儒林藝苑者數十年。以高壽終。豈偶然哉。公歿之後。聖天子入續大統。作新斯文。建奎章閣。以尊德而典學。而故老漸已澌盡。閣學士忽都魯都兒彌失。在翰林。與公同爲承旨十餘年。慨公之不及斯時也。閒爲上言之。上以爲感。制詔臣集。著文以載其行事。而刻諸神道之碑。謹按公諱廣。字熙載。世爲威州洛水人。五世祖逸。以郡吏治獄。有陰德。命其子僊治儒業。始爲儒生。深贈昭文館大學士。資德大夫。上護軍。追封邢國公。諡康穆。生尙書肅。贈推忠贊治功臣。金紫光祿大夫。大司徒。上柱國。邢國公。諡文獻。文獻生長葛主簿。愨。贈光祿大夫。柱國。大司徒。邢國公。諡孝靖。公有子五人。公其長子。至元十三年。授將仕郎。國史院編修官。十六年。陞從仕郎。應奉翰林文字。十八年。司徒府辟長史。陞承事郎。仍兼應奉翰林文字。二十年。調承務郎。同知德州事。二十四年。除太廟署丞。明年。拜承直郎。太常博士。元貞元年。拜奉議大夫。監察御史。大德二年。除翰林直學士。朝列大夫。知制誥。同修國史。六年。加少中大夫。以學士奉使。宣撫陝西。八年。陞中大夫。爲侍講。十一年。以太中大夫。落侍講。爲學士。至大二年。拜正議大夫。禮部尙書。仍兼翰林學士。明年。拜中奉大夫。侍御史。歲中。拜翰林學士承旨。資善大夫。知制誥。兼修國史。四年。除資政大夫。國子祭酒。皇慶元年。除集賢大學士。榮祿大夫。仍兼國子祭酒。延祐改元。復入翰林。爲承旨。六年。立東宮。拜太子賓客。七年。復入集賢。爲大學士。是年四月。復入翰林。爲承旨。至治元年。丁外艱。泰定二年。加光祿大夫。致和元年。三月。薨於位。是年八十有二。娶冀氏。先卒。繼廖氏。皆封邢國夫人。無子。以

弟之子仔爲後女二人適太史院管勾霍復禮侍儀司法物庫副使王德謙是年五月十日葬公洛水縣棲鸞鄉公孫塞先塋之次至順三年贈光祿大夫河南江北等處行中書省平章政事柱國追封趙國公諡文貞國家建元之初命官猶皆有訓辭簡古爾雅皆出於翰林常分番上直或扈從而史館方修太祖皇帝以來實錄與遼金之遺史故公自應奉辟司徒長史而猶不離翰林者其職事非冗散也太常方治神人修典禮非公莫能稱焉始移博士御史中丞崔公彧承眷遇有材略善任事然好盛氣待人他御史拜謁或平受之至公常以客禮見蓋公平允篤實有以當其心者延祐間衆賢聚於本朝精采相蕩耀意氣相雄高而公退然沈毅略不與之較而言語字畫之出人寶而敬之知其以德勝也朝廷肇以科舉取士公持文衡先質行而後文華時人化之其在成均也晨入坐堂上以身率先神色端重若不可犯而辭氣循循然足以厭服學者之心志學法凡民俊秀以次升其名佐貴游治業歲中以次出補吏既有以利誅其心則不無爭先者矣當公時有生貧且親老同舍生有在前名者因博士以告曰我方壯有以爲養請讓之先公大喜曰讓德之恭也從其讓別爲書薦其人朝廷反先用之自是六館之士皆興讓矣公官一品年六七十而孝靖公亡恙公躬奉食飲候寒暖晨昏不懈怡愉順其顏意若嬰兒然仁宗皇帝聞之曰此我國家人瑞也刻玉爲鳩杖以賜日賜上尊酒因其生日遣大臣錫宴其家朝臣咸集自皇太后皇后皇太子皆有賜孝靖再拜稱老臣以受賜公鬚鬢皓然親扶掖之都人相與歌詠而圖畫之及卒公奉喪歸葬略不以哀廢禮蓋天稟素厚有不待於勉強者凡朝會及與郊社宗廟之事未嘗後至行禮比卒事無惰容不以寒暑久速而少變亦其立志之異於人也泰定二年權臣思文飾太平以媚主自行在

所遣使至大都。以旨意召百官老臣諸儒。會廷中議上尊號。公方服闋歸翰林。獨抗言其不可。衆默然。重遠公言。以其說上之。事遂已。公論事類如此。此其尤卓卓者云。臣忝國子博士。從公成均。待罪直學士。又從公翰林。公之葬。孝靖而還京也。一再至臣舍。與臣曰。先世塋域碑銘幸具。而吾老矣。將誰屬乎。因感慨論平生。或至終日。臣至于今不忘。奉明詔。敢作爲銘詩而刻之。銘曰。

自古在昔。國尚老成。有典有則。是程是經。百年之間。羣賢並興。蔚乎其文。充乎其能。逝川弗回。繼其逸矣。白髮蒼顏。公獨壽祉。出而事君。玉珮朱履。入而奉親。榆董滌灑。多士在門。有公有卿。頌詩讀書。亦有諸生。金券瑤冊。鼎彝之銘。追琢其章。昭如日星。顧瞻在列。孰肅孰艾。孰爲浮夸。軼豔夕壤。孰爲彊梁。外肆中隘。衆人尤之。君子之嘅。君子之興。有來有承。隱德之積。久而有徵。尙書制作。秩秩在廷。孝靖式敷。退若弗勝。誰云弗勝。公以文起。有祿有年。與父終始。棲鸞之鄉。公孫之里。何以表公。貞石有紀。

故知昭州秦公神道碑

虞集

公諱仲。字山甫。姓秦氏。世爲洛陽大族。大父和。仕金爲河南安撫使。既歸國朝。父安爲河南三路提學。公嘗從紫陽楊煥然先生學。知名。得給事裕宗潛邸。郝文忠公經之使宋也。宋人留之。眞揚間。宋亡。天子嘉郝公之節。擇士得公。迓之還京師。久之。除承直郎。建康路總管府判官。公季父長卿。儻有大節。世祖皇帝潛邸在京兆。已知其名。及卽位。名在宿衛。與故御史中丞劉公宣爲友。以氣岸相高。時宰阿合馬秉政。聚斂罔上。怙權寵。常伺察言已者。中以危禍。廷中相語以目。無敢論列。長卿乃上書世祖曰。阿合馬擅生殺人。莫敢言。爲國家畜積怨毒已甚。其鉗制左右。使不得徹上聽。情叵測。似秦趙高。私家之蓄。過於公家。

觀餽資藉。情露似漢董卓。春秋無將。請及時論法。按誅之上。以其書下中書。阿合馬固善伺人主意。力足使侍中貴人。掾解事得寢。他日以爲宣德鐵冶。弗治須藉能者。奏用長卿爲同知。卽以所閱課額數萬緡。爲長卿罪。下吏卽獄中用濕紙掩口鼻斃之。盡沒入其洛陽官產。人莫不冤而哀之。然終無一人敢爲長卿言者。公乃去官不復干仕。阿合馬死。朝廷更新政事。姚文公燧手爲書爲執政言。秦仲以諸父之仇當國。恥之閒廢。至今臺憲力言其人。而貧不能起。此風厲所係。宜不待於有言者。公得所爲書藏之。不以發。今固在其家也。善乎史官歐陽玄作長卿傳而論曰。或曰使長卿如山甫勇去。庶不及難。曰山甫求爲無負其諸父。長卿求無負其君。一道也。曰怨乎。曰自古君子死。小人手者多矣。後之君子終不以爲悔。又慕效之。夫後者之無悔。則前者其有悔乎。是以知其無怨也。可謂得秦氏父子之心矣。至元二十五年。用事者急聚斂。遣使天下。大括金玉珠貨器物贏餘。苛酷吏請盡辟知名清彊吏以任事。公雖閒居。猶被追遣。治徽廣德之會。當是時。公府之出納。無容復有餘羨。此直以無義而取之耳。而操竊郡縣危甚。公曰。吾意誠知其不可。然吾受罪去國不辭。吾去而他使至。則其害將不可言。爲物色其稍可追理者以應之。視他處固不能十一二也。更以數少責增之。亦不爲變。後五年。行臺治書侍御史裴公道源。監銓廣西。外選舉。公知昭州。有善政。郡治無事。每游歌竹山。賦詩爲樂。自號歌竹山人。卒於官。三十年三月也。年五十有一。初殯建康城南。某年月日。歸葬洛陽某原。永康胡長孺志其墓。夫人喬氏。繼許氏。孫氏。子男四。從龍。中憲大夫。同僉太禧宗禮院事。從德。奉訓大夫。中書省左司郎中。從某。從禮。女子六。壻馬成。段時中。邢師雍。其三人。天孫男某某。惟秦氏先世行事。卓然可稱。國家修經世大典。訪問遺軼。而從龍嘗夢其先人問從王。

父事已報。史官否得。歐陽氏所著傳。始末甚具。以上送官。昭州以子貴贈某官。夫人封某郡君。於法得立碑神道。故來請銘。銘曰。

明主在上。則有直臣。憂國奮義。蹈禍忘身。公以從子。泣血慎德。豈曰避仇。實癉蝨賊。陰消陽明。君子于征。名公具言。猶保幽貞。愛民之仁。拯物之智。天不與年。百未一試。信道不回。古人所難。父子相望。風節厲完。乃瞻後人。並立朝著。爲國材賢。綽有令譽。維洛泱泱。潤覃柏松。過者式之。遺直之宮。

元文類卷之六十七

神道碑

河東廉訪使程公神道碑

王思廉

元貞丙申正月十五日。河東山西道肅政廉訪使程公。以官壽薨于太原。二月三日。歸柩汴梁。大德改元冬。諸姪狀公行實來請銘。按公諱思廉。字介甫。姓程氏。上世洛陽人。元魏遷兩河豪右。實雲中三州。因著籍東勝。公處士諱某之曾孫。贈少中大夫安定郡伯諱某之孫。宣授沿邊監榷規運使解州鹽使諱某之子。妣田氏。公始知讀書。從樞判白公學。故文筆論議。皆有師法。中統建元。用太保劉文貞公薦。事裕皇于春宮。服勤守恪。特被眷遇。令監印宥省。至元七年。樞副合丹公。以平章政事。領河南行省。選署都事。十二年。轉同知淇州事。力辭養親。繼丁外艱。服除。授東平路判官。入拜監察御史。十六年。出僉河東山西道提刑按察司事。俄遷河西道副使。徙河北。河南。山東東西兩道。未幾。陝西行省舉公興元路總管。明年。進陝西漢中道大使。二十六年。雲南立行御史臺。擢拜中丞。今上嗣位。改河東山西道肅政廉訪使。公識見明敏。沈毅果斷。筮仕之初。年尚少。言動有節。望之儼然。同列雖親密者。亦不敢以狎褻及之。由是見知時宰。有都司之辟。竭力參贊。事有當行。惟恐或後。丞相史忠武公。每加獎拔。幕府有疑忠武公之徇公者。時規取襄樊。供億浩穰。公視出納。綽有餘裕。初築新城於江北。和糴以足兵食。委公領其事。倉廩未完。米

露積一夕大雨。諸相以爲憂。使人覘公。方安臥帳中。召而詰之。公徐曰。敵人在邇。常宜鎮靜。縱有漂溼。損幾何。不過軍士一日糧耳。若中夜騷動。衆心驚惑。事變之來。殆有不可勝言者矣。聞者睦之。簡書之。究心營繕。舟車器仗。靡不犀利。向之見疑者。始以忠武爲知人。公之世父治書公。金南渡後。嘗爲監察史。正色立朝。不畏強禦。及公嗣職。慨然有濟美之志。彈奸臣阿合馬輩不法。至陷囹圄。居之泰然。其黨爲機穽。卒不能傷。出僉提刑司事也。平反糾擿。不克殫紀。其尤者。大同楊刺真等。犯酒禁。有旨誅之。公其罪不至死。論列數四。其忠君守法如此。其赴河北河南也。道彰德。聞兩河凶歉。民大艱食。而官府徵甚急。欲止之。有司謂法當上稟。不敢專擅。公曰。若循常例。比得請。民已疲於勾呼矣。卽移文停催。然後明省臺果獲蠲除。僚友有當鞠獄。鄴中而不果其行者。公乃請代。至則詳究本末。盡得其情。蒙湔洗者百數。二十年。河北復饑。民多轉徙于南。朝廷遣使與汴梁官屬會。憲司官於河上。以扼之。公與總管張國寶決議放渡。旣而列上。亦賜允。僉是秋霖雨。大河清沁皆泛溢。爲衛輝懷孟害。公親乘舟臨視。振貸活甚衆。水浸衛城。不沒者數版。適郡僚各以事出。公與屯戍萬戶張公集軍民。發倉廩。修築隄防。以捍衝晝夜。督促暴露。城隅閱數旬。功始就。至今大水不復爲患。衛人德之。興元命下。公欲辭。時尙書省丞桑哥擅權。頤指所及。謁蹶奉承。親舊力勸之。公以太夫人年將九十。旁無兼侍。輦致弗克。不聽。章三上告。而後已。嗣有陝西漢中之行。亦極力丐免。杜門家食。慈母孝子。懽然一堂。若將終身焉。二十六年。丁艱。哀毀過禮。見者傷之。雲南去京師踰萬里。朝議以爲振舉綱維。肅清風憲。綏輯遠人。非公不可。乃起或疑跋涉勞苦。且未終制。公必不拜。公乃曰。前此三除。昧死陳情。蓋以老母故也。今當宣力絕域。以贖

前過。甫躡小祥。卽素服就道。旣蒞事。卽戒敕典兵之官。牧民之吏。主刑名。司廩庫。各謹爾職。毋致人言。自是上下肅然。一新舊染。雲南舊有孔子廟。朔望長吏更衣拜謁而已。教官雖設。一無從學之士。公乃舉春秋釋菜之禮。先於所治中慶府。集行省臺以下。諸官百餘人。公服以行禮事。屬城化之。有遣子弟受業者。公之不鄙裔夷。推誠敷教。又如此。河東地瘠民貧。仍遭旱曠。公奏除歲餉。親王馬駝十之九。所輸租稅。易遠倉爲近倉。以便民。歷年積弊。前政欲去而不得者。下車未久。蕩洗一空。鄰境之人。亦知嚮慕。竟用是得疾。公頻居風憲。剛稜疾惡。恆以古人自期。晚年言事尤切直。如早建儲貳以固國本。訪求賢俊。用贊丕圖。車服辨尊卑之差。封諡表忠勤之實。養軍力以備邊。定律文以革弊。皆急務也。使節所臨。擾民不急之役。必先禁止。農桑庠序。檢災戢盜。尤所盡心。至忘飢渴寒暑。平居不事生產。惡衣菲食。無難色。與人交愈久而情好愈篤。不以貴賤爲輕重。或有疾病死喪。問遺賙卹。禮意兼盡。雖往反數百里。亦不憚勞。後仍爲之。經理家事。撫視子孫。不少衰減。其於宗族姻戚。又所厚者也。恬於進取。勇於爲義。臥病太原。未得謝。猶力疾視事。一旦索紙筆。作遺書寄弟姪。翌日飲啖應酬。若平時。客退。易衣就枕而薨。蓋剛大不屈之氣。充養有素。故於死生之際。明公如此。僚吏士民。涕泣相弔。如失私親。靈輜所經。皆盡哀致奠。則公之爲人。概可見矣。享年六十有二。夫人鄭氏。婦道可稱。前公卒。今夫人柏德氏。臨潢之甲族也。明悟莊重。持家有法。一子牛童。早夭。三女。長適尹氏。二幼在室。以某年月日。葬公于某處。先塋之次。禮也。銘曰。

烈烈程公。出遭盛時。儒素世家。孝友天資。揚歷中外。才可吏師。霜凜烏臺。風生憲司。去惡如草。遇民如兒。捍患禦釁。奚翅己私。事不辟難。去必見思。用夏變夷。悅禮敦詩。惟是頑獷。化而柔慈。萬里來歸。兩鬢不絲。

養吾浩然。豈其餒而望公廟堂。決疑龜蓍。命也奈何。竟止于斯。有韞于中。未究設施。不龍不蛇。賢人嗟咨。有巍者碑。銘以昭之。公有遺恨。余無愧辭。

故宋文節先生謝公神道碑

李源道

天訖宋命。皇元一四海而統之。至元二十三年。行御史臺侍御史程鉅夫。以宋遺士三十人薦于朝。於是江東謝枋得。在舉中被徵。丁內艱。辭。亡何。連詔江浙行省丞相蒙古台。江西行省左丞管如德。召皆不起。二十六年春正月。福建行省參政魏天佑。復被旨集守令戍將。迫蹙上道。迺行。夏四月。至京師。不食死。春秋六十有四。八月。子定之。奉柩還廣信。明年九月。葬其鄉之玉亭龔原。其門人誄而題之曰。文節先生謝公墓。先生曾祖彥安。祖一鶚。考應琇。潯州僉判。妣桂氏。封碩人。先生諱枋。得。字君直。信州弋陽人。宋寶祐乙卯。薦于鄉。丙辰。試中禮部高等。比對。力詆時宰。閣宦奮不顧前後。抑置第二甲第一人。初。潯州君以事忤使者董槐。被劾以死。先生既第。董槐執政。竟不堂參以歸。丁巳。名試教官。調建寧府教授。己未。趙葵宣撫江東西。辟爲屬。尋除禮兵部架閣。令募兵援江上。出楮幣十萬貫。得信撫義士數千人。以應。宣撫司罷。賈似道當國會軍興。出入簿。責任事者。公毀家以庚不足。坐廢。至元初。長星竟天。踰月。我師壓江上。宋社日替。江東漕司猶試士。徵較藝。先生憤。竊政柄。害忠良。誤國毒民。發策十問。擿其姦。極言天心怒。地氣變。民心離。人才壞。國有亡證。辭甚剴切。大怫賈旨。臺評。竟上其謗。訕。鑄兩秩。與國軍安置。因謫所山門。自命疊山。守令皆及門。執弟子禮。丁卯。以史館召。先生曰。似道餌我也。不赴。閉戶講道。聞之者翕如。若周岳熊朝。余安裕。楊應桂。余炎。謝禹。莫若輩。皆知名。介然自將。足跡不及權門。里中人行事。或不循於理者。輒

曰。謝架閣聞乎。有持兩爭。必來質平。遣以理。無秋毫假與人意。人亦高其風。必自審乃進。非義者。未嘗敢至其前也。乙亥。連以史館校勘。祕書省著作郎。召牢辭。授江東提刑。總其兵以守饒。信撫與王師戰。輒敗。不能軍。遂易服。負母走閩中。隱於卜。信守將。悉捕公妻子弟姪。送建康獄。夫人李氏。有容德。有廉帥者。欲妻之。一夕自經死。弟某某。姪某某。及一女二婢。皆死獄中。惟二子熙之。定之。移獄廣陵。得釋。又有弟禹。在九江。亦以不屈。斬于市。先生資嚴厲。雅負奇氣。風岸孤峭。不能與世軒輊。而以天時人事。推宋必亡於二十年後。抗論儉宰。老謁。蹙不售。終不取合於時。其爲人蓋如此。及程公之薦。報書迺曰。弓旌招賢。輪帛迎士。有志經世者。孰不興起。及非其人。非皇帝夢卜求賢之初意也。觀其言。非徒決於剛憤者。少力學。六經百氏。悉淹貫。爲文章。偉麗卓然天成。不踐襲陳言宿說。論古今成敗得失。上下數千年。較然如指掌。尤善論樂毅。申包胥。張良。諸葛亮。事常有千古之憤者。而以植世教。立民彝。爲任貴富賤貧。一不動其中。其言曰。清明正大之心。不可以利回。英華果銳之氣。不可以威奪。其自信率此類。先生之北也。貧苦甚。衣結履穿。行雪中。人有嘗德之者。調以兼金重裘。不受。平日所著易書詩三傳。行於世。雜著詩文六十四卷。翰林學士盧公摯。爲之序。引深所推激。夫人李氏。男三。義勇早卒。熙之歸自廣陵。亦卒。定之賢而甚文。累薦不起。孫男二。信孫。仁孫。先生死之二十有四年。門人虞舜臣。率其徒。築室買田。祠公弋陽之東。江浙行省。請于朝。爲壘山書院。又五年。予在集賢待制。番易周應極。狀其事。致定之之語。求銘墓道。嘗謂先生天下士。源道仰其文章風節。蓋四十年而不一識。是區區者。尙可辭哉。銘曰。

嗚呼先生。生也何時。生也後時。日薄崦嵫。維南有尊。龜玉毀折。我朝天明。迺完其節。鷄鳴風雨。歲寒柏松。

伊其板蕩。古有蓋忠。道統既闢。人文斯一。有羨翔鸞。載鳴載集。曷迪匪庭。曷裸匪京。萬里冰天。介石自貞。奚卒不施。闕于佳城。嗚呼先生。

廣平路總管邢公神道碑

馬祖常

泰定二年四月十四日。致仕禮部尚書邢公卒。六月朔。葬于安陽度置之原。越二年。致和元年。戊辰二月。嗣子溫。毀瘠纍然。喪服持工部侍郎胡彝行狀。告其友浚儀馬祖常曰。先考衣衾棺槨飾終之禮。庶幾無悔。溫不孝。惟是慕道之碑。無文以昭之。敢以是託於子焉。按狀。公諱秉仁。字仁父。姬姓邢氏。世居安陽。契丹女直擾中夏。士族譜牒存者蓋寡。故安陽邢氏始顯交口里。大父諱植。不仕。有陰德。贈亞中大夫。彰德路總管。輕車都尉。追封河間郡侯。大母李氏。追封河間郡夫人。父諱德裕。有政事志。不得奮發。卒。小官贈嘉議大夫。上輕車都尉。追封河間郡侯。母王氏。追封河間郡夫人。繼母郭氏。封河間郡太夫人。弟四人。曰秉義。秉禮。秉智。秉信。四人皆後夫人郭氏出。前夫人王氏。獨生公一人。兩世用是貴。得加封光華。甚榮。公起家辟署河南廉訪司曹屬。進御史府史。又進丞相東曹掾。滿考授承務郎。平江路推官。未上。改承直郎。濟南萊蕪等處鐵冶提舉。俄遷承德郎。江西行中書省左右司都事。陞朝列大夫。爲太醫院都事。選充廣平彰德等鐵冶都提舉。官中議大夫。外臺各以名薦。尋爲撫州路總管。加亞中大夫。廣平路總管。凡十遷。以禮部尚書致仕。階承務郎。至嘉議大夫。凡六轉。出入中外。率稱官守。初提舉濟南諸冶。賦民不急。逋逃復業。都事江西行省。婉畫直辭。贊叶上下。議遣官出廩米五十萬石。賑貸屬州饑衆難之。公請異日有擅發罪。秉仁願獨坐。萬齒斷斷待舖以活者。不可指數也。都提舉廣平彰德等諸冶。差戶程公礦火。悉給縮。

賈殖貨以利予農。治辨爲最。總管撫州。專使臨門。賜駟之官。撫境地稅。戶部賦木。繇織布。民病非所產。卽令輸直。吏不得舞手取賄。公私俱便之。小旱禱輒雨。歲連大穰。俗頗諱訐。未幾。民恥健訟。移廣平路。教學者以雅樂祠事。先聖孔子立鄉校七百。各有弟子師。課樹桑。億萬計。絲續用饒。民有婦妬妾妊。而以妾妻奴者。夫死而族人欲有其家。訟不決。迺以子生月。逆計母妻奴之時。得實。其民遂有後。闔郡號神明。盜僞以小鈔貫變作大鈔貫文。如錢取鑄。然誣誤七十人。止以首坐。勸醫講黃帝越人書。躬視惠民藥餌。比去官。民鮮天札者。賦有寸帛之羨。立歸之主。爲政具有方略。要以惠恤。元元爲本。旣致仕。益礪志讀書。強記不怠。字書多楷法。尤工古隸。有子二人。長子溫。由中書檢校官。拜監察御史。吏部中書左司二郎中。總管大名河間都轉運使。丁公艱。家居。次子簡。門廡補承事郎。監大名路商稅。夫人蕭氏。于氏。祔葬。並追封河間郡夫人。享年七十有六。嗚呼。行聞于鄉。政聞于時。爲子而上賁其親。爲父而垂裕于後。可謂完也矣。爲善人者。可不以邢氏爲徵耶。是宜銘也。銘曰。

爾車薄薄。爾馬蹻蹻。勿驅我隧域。時君子宅。有繹爾蘇。有樵爾芻。毋犯我松與夔。時君子居。若廣漢之明。弗鈎距以傾。若霸之惠。弗飾異以詭。時予有元之循吏。孫子弈弈。時昌時赫。時善維吉。時視予貞刻。

禮部尚書馬公神道碑

馬祖常

公諱月合。乃世屬雍古部族。居靜州之天山。天山古居延海也。曾祖諱帖穆爾。越哥。祖諱把造。馬野。禮屬皆以財雄邊。父諱錫禮吉思。當金遷浚都。尚書省辟爲譯字掾。曹試開封判官。改鳳翔兵馬判官。死節。贈鎮國上將軍。恆州刺史。官名有馬。因以立氏。父死節。時公年甫十七。壯其父之忠義。奮而投冠于地。誓曰。

吾父死于國難。吾紆家難可也。遂侍母太夫人王氏。艱關鋒鏑。跋涉星夜。出汴絕河而北。見憲宗皇帝於和寧。年少辭容端敬。憲宗嘉賞之。命贊卜只兒斷事官事。國朝天造之始。總裁庶政。悉由斷事官。燕故城爲斷事官治所。中原久劄兵燹。民謳吟思見太平之日。公力籌畫規度。政修事舉。士悅民附。胥爲大和。世祖皇帝以親王南伐。公從行。留汴餽餽六師。悉發鞞人賦一石。取濟南鹽。自堰頭舟行。陸輓數百萬斤。散布軍所。過州郡。汴蔡河南之地。農在野而商在塗。不恐不驚。而軍政修焉。世祖皇帝卽位。降詔褒獎。其詞有曰。有此勤瘁。深可尙嘉云者。阿藍答兒據魚兒泊叛。倉卒之際。公罄家貲。市馬五百疋。進上。世祖皇帝嘗給券賜其家。曰。後當償汝也。版戶遂試學子。通一經。卽不同編民。今令甲儒免丁者。公始之也。中統建元。旣肇建省部。明年拜禮部尙書。佩金虎符。四年八月二十一日。薨于上都之邸第。計聞內外文武之屬。搢紳之士。咸嗟悼。靈傷形諸文字之間。迄今傳而不泯也。嗚呼。公之薨。年甫四十有八。卽以其年某月日。葬于大都宛平縣清水河之陰。原太夫人王氏墓後。梁郡夫人白氏祔。後六十四年。爲至順元年。曾孫祖常。辱官禮部尙書。請于朝。追號推忠宣力翊運功臣。勳。上輕車都尉。階正議大夫。爵梁郡侯。官僉樞密院事。諡忠懿。子十有一人。長諱世忠。常平倉都轉運使。次諱世昌。行尙書省左右司郎中。孫祖常。官忝第二品。推恩二代。贈嘉議大夫。吏部尙書。上輕車都尉。梁郡侯。次諱世顯。知通州事。次世榮。蚤卒。無子。次世靖。不仕。次世祿。中山府織染提舉。次世吉。承公廕。絳州判官。次審溫。嘉議大夫。歷台州。淮安。瑞州。路總管。餘三人。蚤卒。不仕。女四人。三蚤卒。一嫁廣東道副都元帥闍里吉斯。孫二十人。長潤。朝列大夫。同知漳州路。以子祖常。備侍御史。贈中奉大夫。河南江北等處行中書省參知政事。護軍。梁郡公。次節。入王屋山爲

道士。次禮。下砂鹽司丞。次淵。不仕。次開。監在京倉。次遺。道。遵。皆早卒。次通。迪。次保。六。賜提舉都城所。次未名卒。次岳。難。武略將軍。蘭溪州達魯花赤。次雅。古。處士。以孝聞。次必吉。男。奉議大夫。同知興國路事。次祝。饒。監富池茶場。餘四人未仕。曾孫三十一人。長祖常。由進士。轉官。侍御史。次祖義。郊祀法物庫使。次祖烈。汴梁等路管民總管。府案牘官。次天合。監杭州鹽倉。次祖孝。管勾河堽鹽場。次易。朔南察院書吏。次祖謙。昭功。萬戶總使。府知事。次祖元。信州路教授。次祿。合。知行唐縣。仕者九人。餘皆學而未官也。玄孫若干人。長武子。中書省掾。次文子。國子生。次獻子。惠子。並國子生。諸女以多載於家傳。茲不重出。嗚呼。我曾祖尙書。德足以利人。而位不稱。德才足以經邦。而壽不享年。世非出於中國。而學問文獻。過於鄒魯之士。時方遇於草昧。而贊襄制度。則幾於承平。俾其子孫百年之間。革其舊俗。而衣冠之傳。實肇我曾祖也。嗚呼。祖常生三十三歲。父潤南。官漳州。教祖常曰。吾祖有德。未盡發。吾官州郡。不得施。今汝頗樹立。其大將在汝也。後祖常。佩父訓不忘。忝官翰林。直學士。太子右贊善。大夫。禮部尙書。參議。中書省事。人臺進侍御史。叨冒寵榮。夙夜憂懼。惟恐違父之教。而墜我曾祖之業。蒙不孝之罪。死不瞑目於地下。葬儀不具。塋域不廣。欲改卜而遷之。宗老曰。封樹八十年矣。神殆安茲。未易改卜。嗚呼。祖常既撫我曾祖行實。萬一而略論次之矣。忍不泣而終銘之。銘曰。

有幅而起之。孰趨而倚之。將濟世美。必承而履之。懿矣我祖。百年于茲。衣冠之傳。實維啓之。世多王公。亦多華靡。惟不革俗。而忽其圯。繩繩孫子。思馬有氏。咸宜習禮。以續廟祀。

翰林學士元公神道碑

馬祖常

有元古文之宗曰翰林學士清河元公。以至治二年壬戌二月七日薨于位。葬而墓碑未刻。其長子奉議大夫同知峽州路事晦又死。次子鬻七歲。一女病而不嫁。一孫尙乳也。夫人清河郡夫人李氏。纍然抱其孫。僂船歸清河。織紵以居。賓客僚隸皆四散。無一顧之者。獨其友玄教大宗師吳全節謂馬祖常曰。清河公以文起家。可謂貴顯光榮矣。而其葬之後。無碑以載其官閥世次行事之實。爾宜爲文。我求善楷書者。礪石以刻焉。祖常曰。嗟乎。世之士一得志。則攘袂於所親。一不得志。則褫魄若不能生者。比比也。今子託跡老氏。而以禮義之事振吾徒。何能侈言以飾愧哉。謹按公諱明善。字復初。資穎悟絕出。讀書目所過卽記。諸經皆有師法。尤深於春秋。弱冠游吳中。奮宋金季世之習。已名能古文。流轉江淮間。浙東部使者薦之。行省辟正安豐路學。再正建康路學。居歲餘。行樞密院辟充令史。故辨章董公士選。實僉院事。敬之如賓。不以曹屬御之也。董公遷江西行省左丞。復羅致之省中。會贛賊劉貴反。從左丞將兵討之。擒賊三百人。議緩誅。誤得全活者百三十人。又將斬一賊。命公臨斬。左丞曰。掾儒生。能臨斬乎。當震怖矣。終刑已。色不變。將佐白。宜多戮人及尸。一切死者。用張軍聲。公固爭。以爲王者之師。恭行天罰。若等小賊跳梁。殺其渠魁耳。餘何辜焉。賊貴盜書民丁十萬於籍。有司喜欲發之。公夜置火籍橐中。焚之以滅跡。贛吉遂安。南行臺聞之。亦辟爲掾。未幾進登仕佐郎。樞密院照磨。轉中書省左曹掾。曹無留事。坐誣免。不辨。僑寓淮南。文學益肆。頃之。坐誣事明。復掾省曹。至大戊申。我仁宗皇帝養德東朝。左右文化。選天下髦俊之士。列在宮中。公首被簡拔。授以直郎。太子文學。仁宗卽皇帝位。遷翰林待制。承直郎。兼國史院編修官。與修成廟實錄。明年與修順廟實錄。加奉議大夫。是年陞翰林直學士。朝列大夫。知制誥。同修國史。有詔命節書文。

譯其關政要者以進。公請與宋忠臣子集賢直學士文陞同譯。潤書成。每奏讀一篇。上必善之曰。二帝三王之道。非卿莫聞也。太皇太后既受尊號。朝堂集議。宜赦公曰。數赦非善人福。宥過可也。乘傳出賑山東。河南饑。彭城下邳諸州連數十驛。保馬民饑。官無文書。公專以鈔萬二千定。分給之。民免死徙。皇慶壬子。修武宗皇帝實錄。明年遷翰林侍講學士。中奉大夫。預議科舉服色。延祐乙卯。國家始策試士子。選充考官。廷對又充讀卷官。迅筆詳定試卷數語。辭義咸委曲精盡。他人杼思者不及也。改禮部尙書。正孔氏宗法。以五十四世孫思晦襲封衍聖公。事上制可之。參議中書省事。毗贊良多。知戊午貢舉。復入翰林。爲侍讀學士。通奉大夫。歲中拜湖廣行省參知政事。便道過家。上家鄉之父老子弟迎謁勞問。禮意周洽。庚申。英宗踐祚。徵入爲集賢侍讀學士。召至上都。議廣廟制。授翰林學士。資善大夫。修仁廟實錄。百官迎仁廟聖容。云有卿雲見。承詔爲文以紀之。賜酒嘉賞。英宗親裸太室。禮官進祝冊。奏請署御名。上命代署者三。眷遇褒優。近世無有也。既薨之三月。歸葬于清河王家原之先塋。西三里。泰定間。得請于朝。贈資善大夫。河南江北等處行中書省左丞。追封清河郡公。諡文敏。曾祖諱興。不仕。曾祖妣楊氏。二世以下皆以公貴。祖諱海。贈嘉議大夫。祕書卿。上輕車都尉。追封清河郡侯。諡貞惠。祖妣高氏。追封清河郡夫人。考諱賁。將仕佐郎。同管勾蘆瀝鹽場。贈中奉大夫。吏部尙書。護軍。追封清河郡公。諡孝靖。妣弭氏。追封清河郡夫人。元氏。蓋拓跋魏之苗。南北轉徙。不知所系家清河者。至公四世矣。享年五十有四。其文有賦五。詩凡一百六十三。銘贊傳記五十九。序三十。雜著十五。碑誌一百三十。出入秦漢之間。本之於六經。以涵泳其膏澤。參之於諸子百家。以聘其辨。刻而不見其跡。新而必自己出。蔚乎其華敷。鑽乎其古聲。倡古學於當世。爲

一代之文宗者。柳城姚燧。暨公而已。信乎其必傳也。雖然。才用而未盡。積厚而施寡。徵之於天。其善後也無疑。祖常曩從公游。及公考士。又辱第。下列義當銘。銘曰。
於維公文。並古立。大沛厥辭。世莫躡。震驚瞽力。不克。蜚聲天衢。名疑疑。位臻公卿。發軔跡。蘊而不施用。弗極。神梃其馳。學迺碩。天藻挾縟。琢圭璧。五十四年。返玄宅。

元文類卷之六十八

神道碑

平章政事致仕尚公神道碑

李朮魯獅

大德八年春三月己巳中書左丞尚公請老上不允若曰其服朕命毋息冬十月稱疾力請予告九年春還保定時年六十有九明年夏六月拜昭文館大學士資德大夫中書右丞商議中書省事召不起武宗卽位加榮祿大夫預司農事司中書職仍舊召秋九月覲龍虎臺大臣莫不譽公上悅若曰衆以卿宣力我家爭譽其賢故耳公再拜稱觴上萬歲壽御璣賜之酒故事酒答臣下璣人授之不親賜也時特授公左右相目嗟異冬十有一月東宮賜宴翰林俄以疾還至大二年春正月使召辭三年冬十月贈爵三代仁皇出震召問大計稱旨賜宴清勝園皇太后賜宴南園夏五月丐去陛辭上御武帳聞之以氣暄室隘勅近臣出諭若曰卿來盡心獻納朕未始不從稱老懷歸豈遽忘國家耶凡益國便民其以疏聞當行朕卽行之勅宰相李道復等進秩慰餞遂加銀青職仍舊賜白金百兩金綺二匹宴中書驛送還歸時年七十有五延祐五年制贈曾祖考仲資善大夫翰林學士上護軍追封上黨郡公妣魏氏郡夫人祖考安榮祿大夫大司農柱國祁國公妣王氏國夫人考汝楫銀青榮祿大夫大司徒上柱國祁國公妣李妻魏皆國夫人六年春正月拜太子詹事使三往迺起三月辛酉見上嘉禧殿之後閣上顧太保曲出目公曰是

自世祖皇帝效力潔淨人也。徐曰：周卿汝前，汝知古今，識道理，練大務。太子託汝善輔之，有言勿吝善教之。此朕意也。公見皇太子，首以念祖宗孝兩宮，養德性，辨邪正，陳之。太子異其言，更五月，北幸觀花園北行殿。上若曰：朕不文，直諭汝，勿惜盡言教太子。賜尙醞馬酒各一罍，詹事俸入不受。俄謝歸。時年八十有二。泰定三年，以中書平章政事致事，制授於其家。賜楮泉萬緡，綺帛四端，尙酒二尊。公表謝，復賜酒。時年九十有一。朝廷尊賢養老，思輔長治，其見於公如此。四年十月八日薨，享年九十二。訃聞，制贈推誠佐治寅亮功臣，金紫光祿大夫，大司徒，上柱國，追封齊國公，諡正獻。公諱文，字周卿，祁州深澤人。幼嗜學，甫踰冠，卓邁有聞。世皇御極，急務求賢，一時大臣體上意，銳采擇。中統元年，張忠宣公文謙宣撫河東還，故參知政事王椅薦公，忠宣奇之，辟掌書記。至元元年，辟西夏行中書書表。二年始立朝儀，詔魁賢鉅德者，討論詳定。太保劉文貞公秉忠薦公參預，凡常朝朔望起居，元日冬至會覲，冊拜內文武仗衛布置，服色差等，圖象規製，皆公掌之。節次入奏，清問所及，必公條對明白。久之，聖鑑通朗，勅結綵畫位皇城之東，百官肄習。上御法座臨之，見大書宸極御座之居，上召公問之，對天極居中，衆星環共，帝德無爲，天下歸之。其象類此。上悅，習已大悅，遂爲定制。播告天下。七年，勅知事大農。八年，轉大農都事，禮成，置侍儀司。太保以公見上，仁智殿，擢右直侍儀使。十有二年，復都事大農，其佐農政也。置七道巡行勸農事，聯保五課，耕桑，修水利，立社學，築義倉，革浮薄，禁游惰，多自公畫。十有七年，出守輝州，不事刑撻，因其土俗，以禮導之。令行禁止。河朔大旱，禱輒雨。歲大熟，踰竟旱自若也。聞者異之。懷孟馬氏、宋氏被誣殺人，訟蔓不決，提刑部使檄公識之，推跡究情，得尉史獄卒鍊喉狀兩獄，皆雪。牧輝二年，民安事治。十九年冬，召拜戶部司金。

郎中初竹稅置提舉。隸省部。懷衛居民犯一筍一竹。率以私論。至破家。至是抗言罷之。課入郡邑。害遂弭。明年秋。使山東。定征稅。度風土市廛。立中制。江西省憲交訟。裕皇令中書公奉教訊詰。罷省。臣宣慰臣各一。追白金千二百兩。二十一年冬。改戶部郎中。明年春。都事御史臺。會聚斂臣。答卽歸阿散等。謂海內財穀。省院臺內外監守。里魁什長。率有欺蠹。請大蒐抉。上允勅衆勿沮。利黨嘯結兇壬。僣使旁午。省臣御史。掾吏民庶。罹穿陷日衆。人情危駭。先此南臺御史封章言。帝春秋高。宜禪位於皇太子。皇后不宜外預。太子聞之懼。公因祕之以杜讒隙。此曹覘之。鉗臺史督索。公白中書右丞相安童。御史大夫月律魯拒之。越翌日。其黨以聞。勅大宗正薛尺玕取其章。太子益懼。二相憂變不測。公思用拯之方。閱舊案。得兇黨罪玷數十白。大夫曰。事急矣。請就省圖之。至遂說曰。丞相大夫以勳貴忠賢。荷天寵。柱石廊廟。皇太子天下本固。本安天下。兩公任也。此輩傾險。乘釁奮不逞。祕章出禍。可言邪。今先計奪謀。使噤不容喙。策之上也。二相曰。善。入言狀。上怒若曰。汝等無罪耶。震厲未止。丞相前曰。臣等有罪不辭。但此黨名載刑書。類非慎潔。勳必驚害。生靈宜選重臣。使爲之長。庶靖紛擾。上徐霽威。可其奏。二相出宣制。緩其行。兇爛爲沮。俄而告賊。賂者喧集。事聞。天威大震。或誅。或竄。或奴。時漢人臺臣皆闕。公位幕佐。以智勇忠義。勳大臣。悟明主。殲大憝。銷大釁。旬日之間。中外清泰。聞者壯之。俄丞大農。治京北屯田。畎澮汎溢。不蓄二十四年。置尙書省。柄臣顯政。急賦。讒戮大臣。衆股慄。使者四出。峻繩督務。羸官緝徼。賞悅。公使燕南。得鈔緡約四十萬。與民者三之二。賞雖不及。功亦見。時至元鈔始行。置寶鈔提舉司。隸都省。金與銀禁私易。小人挾威。張罟搜餽。饕饕摧破民產。動再年。使江西治其敵。吏行詐舞文。各以罪論。或誣熊氏子。買藏金尺。吏訊則無之。訊益

酷乞輸直不聽。聚貨簪珥作新尺。符其安迺已。劉氏子。誣其弟。貨利潛易金銀。獄久不絕。事皆類此。公至率清脫。民始甯息。其年理鹽。著雜稅。江右。明年升少卿。理獄。理賦山之東。署置濫溢汰之。政令苛虐。獨之事理。欺惑正之。尙書省罷。政歸中書。二十有八年。夏四月。遷吏部侍郎。考覈尙書省臣。鈐綜所不當。最簿上之流品。清別。井井不紊。始以肅政廉訪。司憲諸道。明年。公使憲湖北。初提刑。按察之憲鄂也。行省奏罷其司。聽攝山南者再。事滯。民疚。公曰。此憎忌者間之耳。凡政刑大務。卽省議之。慶祝大禮。赴省行之。糾按貪墨不少。貸。讒格政行。民始受賜。三十一年秋。召爲刑部尙書。公以遠近稟決。刑制不一。吏誕民癯。請依古律令。采寬厚。新憲章。以一吏治。不報。成宗元貞元年春。拜侍御史。會江浙省平章用虐行悖。行臺御史浙西憲人條狀彈劾。制遣公泊大都。護往詰之。左驗明著平章者。挾貴驚岸不臣。公等以聞。平章者以國制軍數禁密。無敢或預。御史嘗取數鎮兵。於是藉其故。擅驛走都。以相噬咋。都省奏不用臺臣。特以都護按問。制可。御史逼威卽承。兩造具備。勅省臺太師宣政等衆大臣雜議。率阿勢貴。犯輕宜宥。御史法當死。公曰。不然。御史職號監察。今所繫者。上欺下暴。制使馳訊。拒捍無禮。罪重不輕。必以軍數有禁言之。小吏佐書。掌給鹽米。甲簿伍籍。數誰不知。況御史因兵卒交愬。責令長帥均役。情無害法。卽有罪亦輕不重。皇上御大寶。救天下。德洽民心。豈宜濫刑。以累聖治。議都堂三辨巖廊。再衆列奏。公廷爭剴切。上開悟。平章御史各杖遣。衆呼萬歲。他日集肅政堂。衆憂省臺不協。公曰。天下無難事。第恐處之失其要耳。都省長百司丞相握大柄。相抗不敵。動瀆天聽。取厭傷體。自今而後。狼貪虎暴者。扞彈之事。不涉私者。正救之。果大鉏鋤。論斥未晚。何用紛紛。衆聽公言。未久猜釋。風紀肅然。二年。請無數赦。罷役不急。上嘉納。大德元年夏。

河決蒲口。冬，公使憲河南。明年春，偕勅使相決河，籌久利。公建言：長河萬里，湍猛東注，下盟津，地平土疏，蕩徙不常，失禹故疏，流患中土，不知幾何千年。孰保無患，治得其當，則民省而患遲，失之則力費而患速。此定論也。今陳留抵東西百有餘里，南岸故河口十一已塞者二，自涸者六，通水者三。岸高水六七尺，或四五尺，岸北故堤水高北田三四尺，或高下等。大較南高於北約八九尺，堤安得不破，水安得不北也。蒲口今決千有餘步，迅快東行，得河舊瀆，行二百里，至歸德橫堤之下，復會正流，或彊湮遏，上決下潰，終竟無成。揆今之計，河北郡縣順水之性，遠築長堤，以禦汎濫，歸德徐邳聽民避衝潰，擇所安，嬰患戶齒。河南淤田，量給永業，他決視此，卽救患之良策也。蒲口不塞，便策上，廷論從之。河朔郡縣山東憲部爭言，果然則河北桑田盡化魚鱉之區矣。塞之便，復之明年，蒲口復決，障塞之役無歲無之。是後水北入巴河，復故道，竟如公言。三年秋，憲山東宣慰使挾塔宗室以浮論懲叛，謂治淄青政宜猛，故藉是久居方闔，外掠譽而內貪虐，憲糾小有違言，吠啞卽至，公度難力爭，使者往來，公以溫言順附，而嚴礪之，彼迺感服，其下稔惡，會有告者，選官按詰，得二十餘人，決杖追贓，以慰懦弱，遂大慙謝，逐所親昵，用事十餘輩，歸民田二百餘頃。四年秋，授中奉大夫，參知政事，行省江西，旣莅政，以吏選淆濁，凡庠序之師，軍民之佐，財穀之主，典隨事立法，員數百，浹日皆泮，無復容私，衆始睚眦，終莫奪，俄趣公分鎮嶺南，快私憤，公曰：此軍政也，非制勅不敢行。驛使顯稟得報，蒙古平章偕公在省，餘以次出鎮，衆計沮，事聽公決，摧彊生枯，濯煩疏壅，省務清簡。六年秋九月，移疾北還，冬十月，拜江南行御史臺中丞，辭明年召至京師，拜資善大夫，中書左丞。時朱張氏得罪，省臣率譴逐，惟左丞相兩新平章泊公凡四人，調變政務，浙西水沴，民饑，山東歲兇，盜充獄。

公議發官廩。周罄乏。縮湧價。舒市易。泄富足。逸閑遏。責兼并。仁客佃。民能施米上三百石。爵有差。得米石五十萬。救吳越。餓殍爲蘇。出官緡八百五十餘萬。卹齊魯。激攘亦息。選清望。臣使十道。宣撫天下。采利病得失。黜貪暴。安善良。江南官民田賦。均減三之一。南方學浮圖氏。號白雲宗者。髮而妻子田宅。誠愚民。託祝釐。道徭賦。倖習甘賄。奏爲總攝。錫印章。郡縣酋豪。名署七千餘。所衆數十萬。於是罷之。斥散黨。與同民賦役。時順德忠獻王。答刺罕。與君同心輔政。選庶官。齊百度。罷斜封。汰冗員。絕寶貨。約濫支。節淫費。量入制出。擇民牧。屏世守。定賊律。除虐禁。明婚制。阜民生。綱正目舉。有中統至元之風。公粹美高亮。行修潔。年十六七。志學。愬伊洛。究洙泗。完經大史。諸子百家。該洽無不綜。一以仁義爲根極。孝友行業。著見州閭。大臣交薦。聲名日振。世廟方大有爲。衣冠元老。森然以所能輔經緯。公翺翔上下。畫佐開先。寔與有力。歷事五朝。才識弘。經濟功名。映寰海。德望尊。廟堂忠信。締淵穆。懸車私第。嗣聖繼明。眷注益渥。使車累召。進必勇退。從容事外。二十餘年。壽考康彊。几杖清寂。手不釋卷。措紳造之。非聖賢中道。經綸大經。置不談。聞者隨其器量大小。皆潤漑。天下望之。若瑞星神岳。素纘嚴。繇飲食動靜。皆有節制。居位應務。察事理。守名法。簡易正大。物無不容。推行所宜。不膠不固。大政大節。利不回。威不屈。仁勇沛然。綽有餘裕。古遺愛遺直。公盡兼之。於戲。世皇長駕。關馭網。羅英才。培植之久。大德卿相。稱賢無右。公者。養賢資世。豈易言哉。公娶某氏。子男某某。孫男某某。年月日葬。完州某鄉某原。公弟之子。曹州判官克和。以國子助教張執中所狀。公行。遂以銘託烏呼。公往矣。文行事功。百世師也。其敢以昧陋讓。銘曰。

皇元統天。大定于一。聖聖明明。崇建皇極。三光五岳。氣象渾同。天產人瑞。以弼帝功。瞻彼恆山。嶷嶷大茂。

挺生尙公。神峯綜秀。始遇世皇。邁績華勳。禮樂稽古。稼穡養民。鴻臚大農。事係賢哲。左右後先。夷夔稷高。朱轡五馬。衛源之濟。里詠塗歌。神明父母。孰驚皇靈。七鬯震搖。用輔執法。正色立朝。孰斲民力。烈火凝霜。用使四方。雨澤春暘。孰縱陸梁。摧我獬廌。用立憲紀。鐸稜益大。孰徇貪蠹。梏我鴻鈞。用握政柄。化育載新。年鄰七袞。勇於告老。天制臣義。豈曰太早。昔也廟朝。淵淵昞昞。軒后之鑑。神禹之鼎。今也鄉社。于于雍雍。天下之表。人中之龍。有謁其庭。鄙吝清滌。齒頰餘論。皆世藥石。道德之容。禮樂之度。大醉而醒。孰寐斯寤。善數數之。侯卿侯公。百歲完潔。其誰凝隆。有德有文。有位有壽。功在史牒。名垂宇宙。大行嶙嶙。溥易云云。刻此銘詩。相配無垠。

大都路總都管姚公神道碑

李朮魯紳

公姓姚氏。諱天福。字君祥。拜監察御史。彈擊權臣。無所顧畏。世祖皇帝。賜名巴而思。國言虎也。其係出唐賢相文獻公。元崇文獻諸孫伯祿。卒絳州觀察判官。葬絳之稷山縣南陽里。繇是世爲平陽絳人。公考處士君諱君實。字仲華。甫冠。辟兵鴈門。金進士趙泰。以子妻之。生公。及和衆主簿。天祿。公姿白皙。美風矩。童卯不凡。聞處士訓。忠孝奉受。惟謹。從事郡府。挺潔不羣。儕輩畏之。仕懷仁爲縣史。世皇以太弟駐白登。公從縣進蒲萄酒。見奇之。留侍宿衛。至元初。丞縣懷仁。太師楊闊闔出。薦其能於丞相塔察兒。丞相奉使朔漠。修睦宗藩。引與之偕。五年。立御史臺。丞相爲大夫。奏授架閣管勾。秩將仕郎。十一年。以承事郎拜御史。十三年。江南平。冬十二月。宰相銜怒。左遷同知衡州路。明年春三月。以朝列大夫。改河東山西道提刑按察副使。佩金符。夏六月。拜治書侍御史。秩中順。十六年春。使憲淮西。江北道。秩嘉議。十八年。憲江南。湖北。

二十年夏。憲遼東。明年春。以母老請歸養。不允。二十二年春。召爲刑部尙書。秩通議。逾年。總管揚州。不起。二十六年夏。復憲淮西。秩正議。三十年。拜中奉大夫。甘肅等處行中書省參知政事。以親辭。改肅政廉訪司。成宗卽位。使肅政廉訪于陝西。元貞元年春二月。遷眞定總管。冬。丁太夫人憂。自鴈門徙處士。君柩合葬絳之稷山。中書起公還眞定。大德三年春二月。拜江西行中書參知政事。辭。奉使山東。還。四年秋七月。以通奉大夫參知政事。行大都路都總管。兼大興府尹。本路諸軍與魯總管管內勸農事。六年春正月。二十有八日。薨于位。年七十有三。公至元名臣。勳德焯著。其薨也。朝廷悼惜。吏士護喪歸平陽。以夏四月某日。葬稷山西北嘉禾里。泰定三年。以子侃請。制贈正奉大夫。河南江北行中書參知政事。護軍。追封平陽郡公。諡忠肅。天歷己巳。侃以公行實。徵銘神道之碑。不獲終辭。因采其本末而次第之。公始爲御史。條奏宰相阿合馬罪。二十有四。召廷辯。公枚數其罪。彼輒引服。數至於三。氣沮情賊。上動色。若曰。此三者罪已不宥。目公曰。巴而思。臣下有違太祖之制。干朕之紀者。汝抨擊勿隱。廷臣震竦。其事今祕。世未有聞。時方倚相理財。姑釋不問。衆亦爲公危之。太夫人趙君。有賢識。勸公曰。國爾忘家。汝第盡力。果不測。吾追蹤陵母。死日猶生年。公泣謝。白其長曰。萬一得譴。乞不以老母坐連也。語聞。上歎曰。是母子有古義烈。勅侍臣董文忠。宣付史臣書之。監大名小敢普得罪。御史按之。至見毆辱。繼用公往。問道微服入境。察悉其情。還取驛抵其所。撻扶如神。簿責死罪。十有七。械送鞏下。俄以宥貴。經臺門大詬。公在察院。促捕之。目檢行囊。得賂侍御史安兀。失納救免狀。卽徑敢普。而祕其事。夜用巡符託詞。邏奄至一道士室。盡獲其賂。明日陞奏。上曰。彼七死猶赦。汝欲何爲。公對罪十有七。赦七。留十餘。誰歸咎。上悟。戮敢普。斥安。時御史大夫二安。

善甚。一既斥，與所善猶雙陸。禁中公曰：「安庶人耳，豈得與大臣狎？」叱令起，座皆失色。公卽入奏，一蛇九尾，首動尾隨，兩其首，行不能寸。今憲不綱，蛇首二也。上曰：「然一人二冠可乎？」召兩大夫，諭以公言。大夫李羅懼，以年少自劾罷。有讒提刑按察之不便者，有旨罷之。是時廣平貞憲王月呂魯爲御史大夫，公告之曰：「往者悖叛，蝟起，鄣塞見聞。今列憲宇內，廣視聽，虞非常，慮至深遠，不但繩督有司而已也。」縷縷陳之。大夫悟，鑿然曰：「幾失是夜造禁密詳奏。」上曰：「此天下安危計也。其勿罷會，駕北幸，所擊相馳騎，士縛公，閱其家脫粟數斛外，得言事故，薰羅織苛毒。」公亢聲曰：「乘輿行狩，戕害言臣，宰相甯欲反邪？」捃拾無所得，斥遷衡州。俄憲河東，太原民饑，開廩賑卹。議者以擅罪公，上知不私置，勿問。朔方兵興，役民轉粟，人畜顛踣。公曰：「執政非策，自蹙其本也。」投闕論奏，改和糴，疲瘵爲蘇。留遷治書，出憲淮西。先是，蘄黃有叛者，將吏賊獲良民以萬數，公皆理歸民伍，衆感泣，相率立生祠。徙節湖北，劾輔臣楚國公罪，以聞。上閱其有勞，爲痛治其黨。會阿合馬敗，大遣使治官慝。遼東宣慰使阿老瓦丁，權黨也，侵暴尤橫。召公使遼，至則封府庫，究簿書，審事察冤，正魁惡，著公道，使還。卽命長憲遼東，公疾馳夜入，詰旦莅事，民懼吏愕。郡縣竦動，初遼朔旱蝗，公至，雨澍蝗滅，其境域烏桓、白靉故地也。民喜畜牧，習射獵，不事耕學。公教以稼穡，詩書居數年，農廬士奮，民之孝者旌之，不義而訟積年不決者，訓睦之。稔惡者懲艾之。武平縣民劉義，訟其嫂與其所私同殺其兄，成縣尹丁欽，以成尸無傷，憂懣不食。其妻韓問之，欽告其故。韓曰：「恐頂顛有丁塗其跡耳。」視之果然。獄定，上讞。公召欽諦詢之，欽因矜其妻之能。公曰：「若妻處子邪？」曰：「再醮，令有司開其夫棺，毒與成類，并正其辜。」欽悸卒。臺章以公詣平灤，按總管劉捏古伯，公至，劉欲遁去，公密令憲儼張仲威作漁人，匿西城橋。

伺之。劉果與吏徒會橋下。謀擒其愆。仲威得真。公一問皆伏。吏胥之黠而虐。扼民之吭。而快其所欲。而民莫敢校者。率以罪黜。平灤都吏張氏子。尤狡而伎。杖去之。遠近震讐。道行遵化。風旋馬前。公默謂之曰。汝冤從我。吾爲汝理。至縣舍。風卽見。令縣以囊鞭士。從憲備覘之。信宿及薙蒼。而風息。得五尸。皆短衣。其一衣中得小印。公下令居賈行商。以端匹赴縣。聽和市。辨之。賊果執。遼粟歲輸灤陽。使督運急。時民方饑。公曰。吾忍視邪。留粟賑糶。使不敢沮。民賴以生。遼人以公政通神明。追思惠化。立祠頌德。入長刑曹。讞獄與衆不合。歸臥於家。竟如公言。衆得罪。公望益隆。淮西不治。復握使節。申飭舊規。風采立變。初宣。饒徽數州有亂者。官軍併俘齊民。加以劫掠。絡繹淮境。公責守令嚴津防。峻訶譴。民復其鄉者數千餘家。帥臣昂吉而闖。淮殆二十年。位中書右丞。以宣慰使操制兵民。黨結中奧。其子亦握兵煽虐。奴官屬。轢風紀。莫敢誰何。宿盜數十。出沒淮海陸梁。自宋未有制者。宋亡。帥葆苾其徒。通納賄賂。縱其所爲。公遣健士襲捕。得所匿兵仗貲財。定案。市殉者七人。自是帥漁鷺狀。百出。公疏其跡。取驛上聞。帥鉗驛勿給。公潛前走。得驛馳去。帥遣兵校丁文虎。追刺公。至六河館。不及。公至揚州。文虎亦至。誣公於行臺。俄而六河館人以刺公狀聞。文虎被執。公赴覲。制遣近侍阿朮。治書侍御史萬僧馳訊。帥以罪廢。已而赴闕。以擅殺淮賊譖公。不中憤而斃。淮境大甯。丞相桑葛之黨。虐平陽者尤劇。其敗也。用公尹其府。以清宿蠹。詢父老。得郡邑田里。眞僞。利病。緩急。先後審行之。民輯事理。遼西吳氏子。贖爲女巫。行眩。衆事之若神。人公洞其詐。攝至府。吏欲案究。公曰。亂常之跡。可侈言邪。立命撲死。衆股栗。政化無阻。崇館宇。引水置磴。植柳代樵。會斂爲紆。眞定都會南北。驛傳雜沓。事弊民痿。大臣蠟眞。奏牧守非公。不可。遂尹眞定。導壅治。芟生枯壯弱。日聽懇訟。鑒

隱破堅。動無泥閤。人人竦愜。衆走府治。瞻判決優。肆爲空。初饋餼不充。徵需日困。公以楮鏹貸民。因母取息。蕃畜孳豐。廩稍闢大。賓館水磴。創立如平陽。用有餘裕。宗親之位。僭從之區。秩秩井井。甲諸路。歲省官緡。而下不加擾。憲又撫細。故効公中書敷奏。事不涉私法。可施用。宜著令式。以示他州。制可。郡人集衆象龍。祝雨。公曰。無益。令撤去。迺慮獄囚。底平允。雨大霈。驛置新樂。北阻泃水。使价車騎自南而北者。雨溢夜。暝野次。無所。建議徙置泃南。衆大便順。築寺五臺。督民運木。奪農。癯衆。令方急。公不從。府懼。佐貳交諍之。公曰。吾民牧也。惟民是卹。請待農隙。朝省爲允。樂城盜殺人取財。夜昇尸置民隆氏邸。縣笞伏隆氏。父及二子當死。械囚送府。哭於庭。尸母辨賊。無其子印。識公疑之。會使者決大辟。公給他賊承盜殺狀。隆氏獄緩。眞盜遂獲。黠吏退胥之在民間者。不啻百數。劫持官府而肥其家。拂其心。則禍之。管庫稅廩之徒。往往破產。質妻鬻子。以償所欲。而不敢與辨。公劾農諸縣。得其姓名。杖死數人。質鬻者還之。餘多遁去。或改行爲善士。其尹京也。立誠信。繩桀驁。挫強禦。卹惛弱。事至而斷。豪右斂迹。三河民藏古銅印。怨家訟曰。將謀作亂。縣榜掠其囚。使符所訟。至府辨其文。曰。三河縣印。公曰。何亂之爲。以不輸官罪之。制令尙廐芻稈。以鹽易諸畿民。霖盜害稼。公請市旁郡。戶部據令督責。上下洵懼。曰。帥京屬。從部白省。竟以公謀。甯息京甸。京人弟假姊財。不勞。姊饜益貧。弟賈益富。姊饜徵財。弟曰。有券。卽與。姊憤愬。聽者難之。愬於公。諭之曰。汝但歸俟。徐誅。劫盜扳弟對詰。大懼吐實。暨姊中分其貲。公果毅直諒。立朝敢言。操行清介。忠孚信格。有賜輒辭。上至引唐太宗賞魏徵故事。曉之。對曰。臣言分也。受賞非分也。竟不受。持憲總郡。皆有威惠。舟淮赴鄂。民衆衛送不絕。盜聞之。戒其徒曰。姚公正人也。勿犯。性孝。太君年踰大耋。公拜參知政事。甘肅難於輦。

養辭不往。世高其行。縉紳推論。聖朝人物。骨鯁有爲。終始不貳。其操者。公當第一。固確論也。蓋嘗稽之。鴻惟世皇神鑑。睿算長駕。遠馭文武。效能光輔。丕業甸萬國。冠百王。盛矣。然廊廟岳牧。邪慝間出。兜鉞三苗。唐虞猶病。於是大植風紀。明目達聰。以弘至治。公當至元之際。奮下列搏。權奸蒞方州。滌巨蠱。自能使辯捷不能措其喙。仇憤無所憑其兇。風概氣節。炳燿一世。淵衷之所孚。公論之所與。豈徒然哉。其忠義剛大。蘊積有素。故也。公揚歷四十餘年。功名事業。磊礫赫奕。侃訪輯遺軼。既久始備。因歎世有家者之子與孫。或不侃若。先烈湮滅。可惜哉。斂而銘之。或有待也。公始娶趙氏。繼楊氏。皆平陽郡夫人。子男三人。壽童蚤卒。祖舜祕書著作郎卒。侃內藏庫副使。楊夫人子也。銘曰。

帝運開大。中統至元。人傑斯寶。匪寶瓊璠。惟天聰明。憲象執法。元化宣朗。昭融六合。堂堂忠肅。始我薦冠。讜言正色。英風夏寒。虎炳其文。山立殿陛。禱机饗饗。魄褫魂悸。宸展凝邃。上動天容。庭有直臣。庶儆其同。有鑒其明。有玉其潔。桓桓其勇。夫夫其決。孰撓斯曲。孰鍊斯柔。善善豈親。惡惡豈仇。雖千萬人。莫沮吾往。如脂如韋。有泚其頽。侯符三剖。憲節六持。義概秋凜。仁術春熙。上亮其忠。史載其信。何勸不懷。何懲不震。碣石之北。淮海之南。社稷尸祝。無怠其嚴。溥灑溶溶。霍岳我峩。其融其結。百世不隳。台鼎之崇。芥視不屑。京尹之雄。莫仲與伯。有烈終始。無間險夷。誰近而忽。益遠益思。汾川西流。河水東會。稷山之銘。惟以永配。

參知政事王公神道碑

李朮魯紳

至大元年。汴梁路總管兼府尹王公。年逾七十。拜參知政事。行尙書省雲南。秩中奉大夫。仁宗皇帝。以公至元大德名臣。拜昭文館大學士。皆不果行。延祐元年。冬十二月七日。薨汴私第。春秋七十有九。明年春。

三月十二日歸葬趙州甯晉之金符鄉換馬里。中書以臺疏列公行績以聞。贈通奉大夫。河南江北等處行中書省參知政事。護軍。追封太原郡公。諡憲穆。元統元年冬。其仲子承務郎萬億。賦源庫提舉鈞。以翰林待制蘇君天爵狀。徵銘公碑。紳汴諸生也。其敢辭。公諱忱。字允中。世居甯晉。曾大考進。晦彩不耀。大考守忠。金承信校尉。考玉太祖皇帝威行中夏。率郡民款附。從太師國王木華黎。用武有功。累官定遠大將軍。慶源軍節度副使。夫人王氏生公。剛毅正直。讀經史不事空言。能見之行事。裕皇位儲宮。取勳舊子孫入侍。公被選。忠恪小心。十有餘年。日慎一日。或因事進說。明諒不阿。世祖皇帝察其能。至元十七年。拜山北遼東道提刑按察副使。秩朝列大夫。東藩諸王。鷹人縱暴。民大厭苦。公繩以法。遂斂避不敢犯。宰相阿黑馬。培克固寵。希合之徒。言利徼倖。小吏欺熙。告北京宣慰臣。通官縉若千萬。既聞。勅徵之。熙懼失實。增益制。勅逮繫百餘人。公疏其妄。熙獲罪。裕皇賓天。儲極虛位。帝春秋高。中外危之。言者雖衆。未見允可。公建言。陛下臨御。多歷年所。至元初。豫建太子。天下歸心。鶴馭上賓。臣民憂懼。惟早定大計。以幸宗社。章三上帝。俞其言。俄勅皇孫佩信寶。撫軍朔幕。大業適定。二十四年。憲河南。時南北旣一。無俚兇慝。畧民子女。轉賣四方。公謂此徒。於聖天子。仁覆天下之政。梗害非小。建請嚴立法禁。從之。遂著令。甲息民。汪清。占息民籍。已再世矣。兵豪狀。愬帥府曰。吾亡奴也。卽馳騎數十。殺清滅口。取其妻孥。贖產。清子成逸出。赴民有司。愬之。兵民文移。往來數年不決。穎兵朱喜。始以避亂。奴於人。其主知其難於奴也。集鄉胥里長。同署券免之。隸穎兵籍已久。喜家火。其故主子。謂券已焚。而復奴之。喜持券出。愬訟不決。皆詣公。愬之。稽清占籍。以歲壬寅。其奴亡。以甲辰。喜券足憑。白之鎮南王府。誣者皆屈。明年兩訟之。仇結。近侍誣奏。公徇制。下中

書遣使收公案訊。公疏臺請聞。有旨馳召。入見。敷陳盡底蘊。帝大悅曰。若人非素餐者。勅省臺讜慰還職。近侍及使者皆以賦敗。清喜數百口脫虎咥。繪公像事之。二十七年。置肅政廉訪司。以新憲度。明年。公副使燕南河間鹽漕官守盜用賦。緡十餘萬。覈正其辜。諸王分地恩州。其下以錢貸民。加倍徵息。公令子母相當則止。餘有罪。先是以民入兵。限私田四頃。優其家。公曰。國家取天下以來。兵無甯歲。今海內雖定。征戍遠方。一兵歲費不啻千緡。區區限畝。豈易充給。在民編者。守令猶歲差富貧。以均其力。一入戎行。永不可變。請增田額。使無饑寒內顧之憂。不報。其後以兵力乏竭。勅樞密召公等會議。以真定。順德。廣平等路俾之詢簡。得富民數百家充兵。兵之貧者。遣還民伍。人服其平。公以舊臣。屢憲方州。至是威名益振。三十年。拜廣西肅政廉訪使。秩嘉議。臺檄以其廉能。曉諸道。疾不赴。成宗皇帝卽位。元貞二年春。使憲河東。召見柳林。撫慰優渥。會并汾旱饑。請發粟賑哺。全活者衆。五臺天連佛廬。勅中書擇銳事吏董役。工部司程陸信。驅民夫數千。冒險伐木。死虎豹蛇虺者百有餘人。其時皇太后幸其所。公入言。以寺福民。福未及而害已甚。非初意也。徵聽開悟。減其役。仍賜卹死者家。宗王分土并門。糜餼歲取民間。或不能供。輒立契約。母息倍稱。或不能償。隸其子女。民患苦之。公請出錢縣官贖還其親者百二十四人。於是諸王膳貲歲頒于官。民瘼始蘇。王嬖臣哈塔不花。怙威肆虐。公按正款伏。王爲之請。弗聽。王馳使譖公。上未信。會罵北辛罪人亡走。愬公不法。勅中丞崔彧問之。彧卒。駕還復愬。詔省憲雜訊之。無驗。愬者抵罪。由是王禁戢落。儼民境晏甯。大德三年。遷江陵路總官。不行。七年。遷汴梁。汴故宋金都。邑號難治。公至。省人憲人以公舊望。不敢以府屬眚之。政訟之難。悉聽鑑裁。下無隱情。久之。政清訟簡。吏民歌詠。方宋包拯。公莅汴之四年。

歲次丁未。河決原武。注汴宋。汴尤急。吏士具舟楫以道漂溺。民大懼。公白省。請疏導順下。勢家以田疇不利。難之。公曰。吾守臣也。當任其責。卽行河決。瘞以完城邑。水息。大築隄防。羌族噉手。居鄆陵者萬餘室。民役不預。公督使趣工。得萬人。不日隄成。民至今思之。公精明有斷。不畏強禦。所至興學獎士。修政新民。不專法令。威愛兼行。爲世名德。故姚文公燧。劉文靜公因。與公游。雅相敬尙。蘇君公鄉人也。時賢言行。優於志載。其言曰。世皇天縱有爲。公及陳公天祥。程公思廉。姚公天福。皆骨鯁敢言。視社稷民物利害。若疾痛嗜欲。在己。才猷風采。凜震一世。庸夫庸婦。知其姓字。豈聲音笑貌爲哉。天故生之以弼治。效善論也。公夫人張氏。封太原郡夫人。子男二人。曰銳。曰鈞。孫男三人。洙。浩。以胄子肄業成均。淵幼。銳。鈞。皆有學行。鞏固知之。其諸孫爲胄子。皆馴謹向學。佳子弟也。助教陳旅云。銘曰。世廟帝運。鴻惟永年。仁浹義洽。德崇配天。咨謂裕皇。左右前後。侍衛僕從。詢賢世胄。時也憲穆。宿衛青宮。行必循矩。言必見忠。涵育有年。一靜一動。帝曰良哉。才可試用。卿貳東臬。莅四品秩。碣石醫閭。光昭化日。來歸定省。遂莅河南。上觸廷怒。下讐狼貪。帝曰忠哉。斯豈尸位。丞相御史。燕勞還轡。皇鑑昭明。飭新憲綱。卿才而舊。益礪干將。太行西東。鴻河南北。草木知名。山川正色。棲遲晚暮。尹汴四封。宋陳許鄭。春陽誕充。偏側將迎。于此大府。齒健而瘳。猶憚叵處。上獲下順。居五閔年。華髮蕭蕭。益壯益堅。其卷其舒。大義終始。鋼百其鍊。肯柔繞指。五握憲節。郡符再分。洪波砥柱。屹立不羣。政預鈞輔。逝矣其道。文崇祕館。允也其耄。之顯高朗。之幽神明。之地列岳。之天列星。溥淹之郊。邯鄲之鄙。刻銘豐碑。徵信惇史。

元文類卷之六十九

傳

李伯淵奇節傳

曹居一

居一北渡河。常欲作李伯淵傳。既少暇。且未詳其事。竊有待焉。歲戊申夏。臥病相州。俄故人僧洞然過客舍。因語及邠壬辰之變之後之事。始悉伯淵誅崔立之所自。蓋惠安長老恩公有力焉。初京城荒殘。恩公徙居皇建院。一日莫夜。侍者入告曰。有戎衣腰金符者。醉墮馬門外。從者不能起。或致寇。吾得無累乎。令視之。識者謂總帥李伯淵也。使扶詣方丈憩。俟其醒。語之曰。當此大喪亂。公何心嗜酒如是。生爲男子。與其徒沈溺于亂世。曷若立身後不朽之榮名哉。伯淵矍然。若有契於衷者。見于色。黎明乃召同志黃愜元帥者。相與拜恩而師焉。居無何。往詣恩。屏人而言曰。崔立狂豎。乘國家傾危。天子播越。輒敢叛亂。乃爾。吾欲誅之久矣。師謂男子身後不朽之榮名。其在是耶。恩拒不可曰。爾何遽出此速禍語。殆非老僧所敢聞者。伯淵泣且誓。恩察之誠也。乃握手歎曰。吾情亦不能匿矣。公知老僧故不去此禍亂之地否。吾天地間一閑人。自相州遭遇宣宗。荷國厚恩。二十餘年矣。圖報萬一。此何愛焉。在吾教中有大報恩七篇。是固當爲者。但患力微。援寡。事不濟耳。今幸聞公舉非常之事。樹萬世之名。使老僧朝見而夕死無憾。合爪加額曰。惟以必中爲公賀。未幾。適驛使有相困者。伯淵因之入見。崔立給曰。丞相避擾不出。則今日之事。有大

不安者立欲出。心動乘墮輒欲回。伯淵厲聲曰。我輩兵家子。偶墮馬。又何怪焉。因彊其行。至故英邸之西。通衢中。忽有人突出抗言曰。屈事願丞相與我作主。且呼且前。伍伯訶不止。直詣立馬首。挽其鞵。時伯淵驂右。卽拔刃抱而刺之。洞貫。至自中其左掌。與之俱墜馬。崔尙能語曰。反爲賊奴所先。隨斃。伯淵暨黃憫等五人。實共其事。乃大呼曰。所誅者此逆賊耳。他人無與焉。稍稍鼠竄。帖如也。遂磔崔立之尸。祭于承天門下。一軍哀號。聲動天地。翼日奔來。恩公佐其行。時甲午秋七月也。嗚呼。金之亡也。以忠義聞者。不爲不多。至于表表獨見于後世者。得三人焉。壬辰正月。陽翟軍潰。奉御完顏陳和尚。死戰陣。其罵敵不屈。似顏杲卿。癸巳正月。京城不守。同判睦親府烏古孫孛吉。死宗廟。其守節自盡。似北地王謙。甲午正月。蔡州陷。右丞完顏仲德死社稷。從歿者幾千人。彼敬翔之死。國田橫之感。士有不足方者。太史公曰。非死之難。處死爲難。蓋貴得其死所也。來歙遇害。光武賜策曰。憂國忘家。忠孝彰著。此三人者。有之。今夫伯淵之幸。不得在三人之列。然可重者。身非出于素官世祿。雖在軍伍中。未嘗爲國家所知。況當易代革命之後。雖賁育之勇。安所施。而一旦蔑視。糝軀。手誅叛逆。號祭亡社。盡君臣之義。竟不墮寇讎。孤軍出奔。偉哉。後世視之。其亦三人之亞歟。李姓。伯淵名也。或云。燕都寶坻縣人。餘不可考。姑載此奇節。以附野史之末云。

金同知沁南軍節度使事楊公傳

姚燧

金之季年。天兵滋張。庭臣專謀一力。惴惴以不卒。保河外爲懼。隄河之北。縣地數千里。信敵牧蒐。其中不敢認寸尺爲己舊。時則有若滄海。河間。恆山。遼陽。易水。平陽。東莒。晉陽。上黨。九公集。創殘俄羸之餘。收其魂魄。化悸爲果。出而用之。或一二年。或四三年。七公竟無事効。相繼亡敗。恆山聲言入援。蹶踏不敢近京。

師形涉擁衆自衛。獨上黨不首鼠謀去就。提孤軍關府馬氏。根窟潞澤沁輝懷孟衛七州之心。終始北捍者十二年。最名純臣。戲下激義多節死。聲跡著者。襄垣銅鞮。襄垣懸府五百里。銅鞮襄垣又百里。府控十餘壁。皆阻山爲守。獨襄垣居易地。受敵西北東三道之鋒。府議非得縣上招撫使顯守不可。卽版顯移縣衆往。始顯部將有楊公者。與顯同里。用武略聞。顯戰每求副往。連以勞得官。至是從守襄垣。籍其部衆纔一旅。合縣民得千人。敵嫌梗己未嘗涉。旬月不一至。公開門延之。晝止其驅。夜斫其營。凡戰禦事。朝荷夕集。不以勞顯。若此者五年。其後塹夷城穿如蠶室。石積其下者。四望各盡一射。人心轉一不綫髮搖。敵以爲難。稍引不逼。會從顯從上黨公再復潞州。皆再有勞。詔進顯銀青榮祿大夫。沁州節度使。元帥左都監。行元帥府事。公懷遠大將軍。同知沁南軍節度使事。時縣官調用。特怯其待戰勞。一賚以官。地多入敵。懷數告身無所上。概遙領。故仍治襄垣。公一日請顯曰。以今形勢。襄垣今年跌。明年保無馬武。願分部曲百人立鞬鞞。以緩兵衝。顯允。以便版公。以前官行鞬鞞令。公至治柵北。磧處艱危中。且暮年。聲呼牒招山。逋谷竄。稍出集附。敵悉衆攻。公行夜至隘樓。褫衣止宿其上。中敵偵刺未殊。猶張空拳搏數人。以僨。顯聞哭曰。鑿吾翼矣。明年顯死。又明年。上黨公釋師。養安京城。一實公言。公代人諱閏少孤。鞠於姊之夫禹家。卽今榮祿顯也。始顯以募兵戍郡。遷戍潞。改孟戰有勞。調臨洮司錄。臨洮尤深地。戰有又勞。遷招撫縣上。取上黨節度。公一從行。死事之年。生二十有九。後如千年。子仁風謂燧。宜傳庶他日職館者。得涉筆以承金史之漏云。仁風歷懷邢洛三治中。有善政。

烈婦胡氏傳

王 惲

劉平妻胡氏。濱州渤海縣秦臺鄉田家子。至元庚午。平挈胡泊二子。南戍棗陽。垂至宿沙河岸。夜半有虎突來。啣平左髀曳之而去。胡卽抽刀前追。可十許步。及之。徑刺虎。割腸而出。斃焉。趣呼夫猶生。曰。可忍死去此。若他虎復來。奈何。委裝車。遂扶傷攜幼。涉水而西。黎明。及季陽堡。訴於戍長趙侯。爲掇藥之。軍中聚觀。哀平之不幸。咤胡之勇烈也。信宿平以傷死。趙移其事。上聞。得復役終身。嘻。胡柔儒者也。非不懼獸之殘酷。正以援夫之氣激於衷。知有夫而不知有虎也。平雖死。其志烈言言。方之太山號婦。何壯毅哉。

何長者傳

胡長儒

何長者敬德。無字。或號之爲孤巖善人。上海縣浦東民家子。樸謹不妄。願語。善積蓄會計。事吳郡張瑄。行舶筦庫。不十年。贏羨莫可勝數。一髮不以自私。瑄父子方倚之重。而敬德棄去矣。杭吳。明越揚楚。與幽薊。萊密遼鮮。俱岸大海。固舟航可通。相傳胸山海門水。中流積淮淤江沙。其長無際。浮海者以竿料淺深。此淺生角。故曰料角。明不可度。越云。淮江入海之交多洲。號爲沙。吳濱海處。皆與沙相望。其民頗與沙民同俗。類剽輕悍急而狡。宋季年。羣亡賴子。相聚乘舟鈔掠海上。朱清與瑄最爲雄長。陰部曲曹伍之。當時海濱沙民富家。以爲苦。崇明鎮特甚。清嘗備楊氏。夜殺楊氏。盜妻子貨財去。若捕急。輒引舟東行。三日夜得沙門島。又東北過高句麗水口。見文登夷維諸山。又北見燕山與碣石。往來若風與鬼。影跡不可得。稍怠。則復來。亡慮十五六返。私念南北海道此固逕。且不逢淺角。識之。廷議兵方興。請事招懷。奏可。清瑄卽日來。以吏部侍郎左選七資。最下一等授之。令部其徒屬。爲防海民義。隸提刑。節制水軍。江南旣內屬。二人者。從宰相入見。授金符千戶。時方輓漕東南。供京師。運河溢淺。不容大舟。不能百里五十里。輒爲堰澇水。

又絕江淮。遡泗水。呂梁。彭城。古稱險處。會通河。未鑿。東阿。在平道中。車運三百里。轉輸艱而糜費重。二人者建言海漕事。試之良便。省上方注意嚮之。初年不過百萬石。後乃至三百萬。二人者父子致位宰相。弟姪甥壻皆大官。田園宅館徧天下。庫藏倉庾相望。巨艘大舶。帆交蕃夷中。輿騎塞隘門巷。故與敬德等夷。皆佩於菟金符。爲萬戶千戶。累爵積貲。意氣自得。敬德方布衣蔬食。汲汲以施貧賑乏爲事。勸瑄父子毋嗜進厚藏。以速禍。菑雖不能盡用其言。頗亦損捨。今江南北二人夫婦父子施錢處。往往而在。二人者既滿盈。父子同時夷戮殆盡。沒貲產。縣官黨與家破禁錮。而敬德固無一毫髮累。會杭傅氏施天水院橋東地。廣袤十餘畝。敬德卽建天澤院。爲大釜鬲。炊調食羹。豐潔芳腴。延方外士行而欲休倦。而欲息者。常五六百人。大德十一年大饑。鉅僧方清鬻散徒。敬德素履。爲人信重。資施倍多。他時來者益衆。無意拒色。厭官爲設糜。仙林寺中。饑民殍者。不爲衰止。敬德請杭好善有材智人。凌郭楊李僧道心性澄。六七八人。又擇饑民得強壯者。四五十人。借菩提寺作粥。夜灑置大甕中。明旦。饑民以至。先後爲次。列堂廡下。或溢出門外道上。相嚮坐。虛其前。以行粥。約各持器來食。無持。則假與。兩夫舁一人。執杓。挹以注器中。食已。以次去。日鬻米七八石。至十石。始六月三日。止八月十三日。凡七十日。饑民無死。寺側近。與往來道上。民食粥。忿爭。奮臂大呼。毆擊人。敬德詣其前。亟拜。爭者愧悔。請後不復。乃止。明年春。敬德請破衣集諸好善人。收聚遺幣枯骹。數十萬。具語在破衣傳中。夏爲粥。如昨歲。始五月朔日。踰三十六日。敬德死。年五十七。後十八日。所餘錢米亦盡。遂止。緇素咸曰。胡不延長者。至中壽。今窮人無所賴矣。天澤院不復。納雲水僧。饑疫棄尸如山。久莫爲掩。云沈子南者。苕中故相裔孫。嘗爲義烏丞。至元十三年。兵自義烏作。執之如甌。得不死。

歸客杭。猶存妻二女。貧甚。薪水傭就急。則如敬德告。必得粟錢帛布。比十年不厭。嘗謂予上海有善人者。憐而乞我。祕其人。既而假予家。僮負米問之。則敬德也。可不謂長者哉。

胡先生曰。故老言。宋嘉熙四年。歲行庚子。大饑。趙悅道尹臨安府。發廩勸分。恐弗暨。奪民死中而生之初。悅道無子。養南外宗室子孟傳。一夕夢之。帝所嚴衛。如大朝會儀。既謁。贊道之陞。由阼階。端笏屏息。抑首。僂躬。不敢仰視。帝告曰。與懽汝無子。掾荒功多。賜汝子九人。趨下。再拜稽首。庭中寤。以告家。已而生八子。與孟傳而九。臧應星父記於書。當時湖州作糜食饑人。糜脫釜。猶沸湧器中。人急得糜食。已輒仆死。百步間。饑未至死。食糜者百無一生。婺州顧籜米作糶。熟而寒之。約飢民。旦由東門入。與之履。使之北門賦糶。西門飲以藥。復至東門。給錢米。出宿逆旅舍。與爲買薪蘇。旦洗沐。廣舍不過棲十人。明日復然。竟去無一人。死。長者夜作粥。貯大甕中。蓋懲湖州事也。有意哉。

陳孝子傳

胡長儒

孝子氏陳。名斗龍。字南仲。五世大父詢。避宋靖康亂。繇許徙家杭昌化縣。猶號潁城散人。以自表。大父景純。大母阮。年高。宋故事。郊祭明堂。禋祀。東朝廷上壽。咸詔賜高年爵。民歲百。太學生鄉貢進士。父母九十。皆得九品官。封告。授大父迪功郎。大母孺人。父天澤。澤民治詩。應寶祐三年。臨安府舉。取元朴下第六名。文解。嘗從葉公采學。葉學李公方子。李學徽國文公。澤民既屢試。尙書禮部不中度。游清獻公爲相。趙忠惠公爲尹。葉公爲宰。以行能上之。招致弗就。築室百丈谿上。講所學。時太皇太后籍未下。郡縣內附。徽獨不奉詔。盜作婺源境上。聲動旁近縣。澤民挈妻與子。廬深險處以避。一歲所。病山中。斗龍才十三。已能奉

飲糶廢眠忘食。禱神請減己年延父弗效。母盛也。尋亦病死。斗龍處喪毀廬。墓哭聲哀切。感動行路人。有羣鴈集其上。飛鳴三日。夜鄉里謂鴈靈有知。將葬澤民門。人士相與私謚澤民文節。參政文公及翁顯墓。上曰。文節先生。後斗龍娶妻。有四子女。鄉先生孫公朝瑞。以溫州路儒學提舉。言斗龍侍病服喪廬墓時。事移提學。得推擇爲宗晦書院山長。將之甌。斗龍之妻之父之甥盛冲。告斗龍曰。若母王產若未一歲。歸錢唐。聞其家在清湖中。斗龍大驚且哭。即日與婦訣。具裝行曰。必與母俱歸。若弗能得。何歸爲。初澤民以妻無子也。以幣如錢唐。求宜子者。得王清湖。斗龍生未周。王歲期適滿。遂去。吳越俗以女事人。期歲歸父母。或三五七歲。有子女尙不聽留。惴惴恐失。後聘鬻幣物。女固不得自制。此禮所謂妾母嫡子。它子以爲庶母。衆母諸母。如是而去者。或欲比之棄黜。以義斷子不得母。薄乎此論也。豈嘗得罪於其父哉。長孺之妻之父。徐公道隆。伯謙甫。母微。亦杭人產。已去歸。旣長。求之百方弗得。議用六十歲時母生。己日始爲齊衰三年。及是歲之元日。以大理卿直寶章閣。提點浙西路刑獄公事。死。吳興之難已。天下若是者固不少。使其季世政教脩明。如乾道淳熙時。風厚俗美。男義女貞。又安得是。則其遂不克振可知也。斗龍至清湖。訪求母家。及其故時比鄰。涉二三十年。又經亂離。固無在者矣。逢白髮媪於其處。揖而問焉。告曰。我知之。我家與若母比屋。我與若母爲兒時伴侶。嬉遊相好。若母自昌化歸。無幾時。與我言當往江東。已而泣下。我方盛年。不識其語之爲悽楚也。亦弗問何州。有間。兩夫舁若母竹轎西去。又折以北。與若母鄰者百十家。獨老身在。斗龍謹識之。卽入江東。又濟江。踰淮。復還饒。徵信廣德。寧國。往來數郡。間六年。一夕。舍永豐縣禮賢鎮之逆旅氏。逆旅人怪斗龍數過。問焉。告之。故且使偵之。其人驚曰。吾主人小婦王。自言家

清湖。今王老矣。豈若母耶。走施氏告。良久。出詢斗龍父時門巷。兒名歲。甫去。老婦人哭出。斗龍哭前拜。母子未嘗相見。而自知其爲子爲母也。施氏曰。若母無子女。我家以母還。斗龍留三日。奉母歸。竟如其言。母歸之歲。夏四月。徽盜作。溢出昌化境上。殺人掠子女。奪畜產貨財。張甚。斗龍爲廬百丈山。身自負母。婦擁後。未至山廬。路逢盜數百人。斗龍置母夷處。稽首曰。壯士。斗龍幼不知母去。壯長聞母在江東。行求母六年。母歸未百日。卽相遭於此。斗龍若請夫婦嘗死。母老誰當養母者。盜咨嗟相約。違去。且語徒勿更至此山。驚母傷孝子心。里中人家頗賴之。以免。斗龍嘗蒔甘瓜圃中。秋暮。母病渴甚。思食瓜。而非瓜時。斗龍視空蔓中。凡然披之。異根合莖。並蒂兩實者。二摘以奉啖。卽日渴已疾平。明年圃之天羅瓜。如甘瓜者。亦二。王至今茲尙安健也。斗龍作百丈谿書院。祠三君子。侑以澤民。將延師教里子弟學。又以百丈源山地五百畝。爲義山。鄉鄰饑歲。斷葛蕨根續食。死以葬。達魯花赤阿思蘭。取縣學鄉鄰之言。及祁陽縣尹章君碩。所移事狀。廉之而核。銳請旌表。斗龍知歲惡民饑。官賦食旁午。自請無用。是妨荒政。蓋其意不欲人知。去年斗龍來錢唐。將從長孺問學。與之語。誠可以爲孝弟忠信者。心欲爲之傳。以風厲人子。屬其縣士孫壽國。錄始末以來。且曰。縣人之所願得也。遂定次其言如右。

胡先生曰。陳媯姓。有虞氏苗裔。周興。配胡公。以元女大姬而國之。陳紹重華祀。爲王室三恪。及其亡也。子孫用國爲氏。自秦漢來。陳氏孝弟忠信。立名當時。而著見後世。如太邱長輩類。何可一二數。孝子固其後也。瀉汭遺風餘響。猶有在者哉。

嗚呼。余嘗得三卯錄讀之。蜀禍之慘。誠忍言也。夫朱禛孫之死而復生也。蜀民就死。率五十人爲一聚。以刀悉刺之。迺積其尸。至莫。疑不死。復刺之。禛孫尸積於下。莫刺者。偶不及。尸血淋漓。入禛孫口。夜半始蘇。匍匐入林。薄匿他所。後出蜀爲樞密使。嘗袒示人。未嘗不泣下。賀靖權成都。錄城中骸骨。一百四十萬。城外者不計。嗚呼。推是考。蓋可悲也。蜀眉州史氏。由唐吏部侍郎儼。從僖宗幸蜀。因家焉。其先墓在青神。將二十世。宋世號名族。其出蜀也。今唯居湖州一房。讀其遺事。益悲之。史母程夫人。蘇文忠公之母之族也。夫人將攜其家。下峽江。以囊金腰纏之。兵暴至。伏林莽。與鄰嫗謀曰。輸金果可生吾兒。無資不復能出蜀。史宗誠無唯類矣。縱得生。旦夕兵復至。亦決死。均死。死以全史兒。誠不恨。嫗見身死。爲吾出腰中金。告兒使速走。須臾。兵果執母。謝以實。亡金。遂遇害。翼日。嫗語于鄰。告史氏兒。兒甫十三。從草野得尸。如其言。寔以歸。且亟圖其象。識曰。史光母。年五十有四。嘉熙二年十月二十七日。申時死。兵難。兒遂東南來。占籍湖州。刻意自奮。以右科爲瀾東兵馬鈐轄。鈐轄生子圭文。嘉定儒學教授。嘉定生子台孫。介喜孫。台孫。儒術通吏文。復有子幾人。而史氏繇嘉熙至于今。且四傳矣。噫。蜀繇秦帝入中夏。至于宋。凡一千五百餘年。文物大盛。絕不知有兵革。一旦掃削殆盡。迄今百餘年。遺墟敗棘。郡縣降廢。幾半可哀也已。可哀也已。贊曰。婦人內德。不出門。房中歌廢。戰國而下。俱不幸。以著。非得已也。諱莫甚於死。從容反復。烈士猶難之。況士女乎。歐陽公傳斷臂婦人。以愧馮道。夫人以死傳宗。承平世澤。於是乎見。作史者。烏得廢諸。

李節婦傳

揭傒斯

李節婦者。姓馮氏。名淑安。字靜君。大名人。山東廉訪使時之孫。湖州錄事汝弼之女。山陰令東平李如忠

之繼室也。如忠初娶蒙古氏，生子任，數歲而卒。繼室以馮氏，生子仕，一歲而寡，有遺腹子，父沒兩月乃生，名之曰伏，訃至東平。李及蒙古之族相率至山陰，盡取其貲，及其子任以去。馮乃賣釵釧，質衣服，權厝二喪于山陰叢山下，獨攜二子廬於墓。時年始二十二，唯布衣蔬食，羸形苦節，躬織紉爲女師，以自給。居二十餘年，教二子皆成學，遂遷二喪反葬汶上。邑人王毅以中書平章政事在告，爲親臨其喪，而銘其墓。齊魯之人聞之，莫不嗟咨歎息，有爲泣下者。李及蒙古之族皆大愧悔，羞見馮母子。馮視子任反出己子上，中書參知政事王士熙、侍御史馬祖常、禮部尙書李朮魯、翰林學士吳激、集賢學士袁桷、奎章閣侍書學士虞集、國子司業李端、太常博士柳貫輩爭爲文章盛夸道之。山東浙東羣有司交上其事于朝，請褒異焉。其子仕伏事母極孝，皆掾太府，有廉直聲，而好學不倦。史氏曰：李之初喪也，其族及其妻之屬能扶其二喪，攜其母子返乎汶水之上，而撫存之，其義孰加焉？乃不遠二千里而來，直利其財也。當時亦豈欲挾其數歲之子以去，惡其無名耳。以二族之人生長鄒魯之邦，乃不如一寡婦人哀哉！馮氏其亦早有家教乎。

元文類卷之七十

傳

臺城董氏家傳

元明善

國朝龍興幕北。走金河南。中州豪傑。起應以兵。而金滅矣。若真定史氏。東平嚴氏。滿城濟南兩張氏是也。後史太尉有勳王室。爲諸氏冠。臺城董氏能與之班。而又以孝義稱。今遂大顯。第其譜牒無徵。不知世所自出。其可知者。徽生哲。哲生昕。昕生俊。俊是爲龍虎公。傳自龍虎公起。世比而第書之云。龍虎公諱俊。字用章。少力田。長涉書史。善騎射。金貞祐間。邊事棘。臺城令樹的募兵。兵射上中者。拔爲將領。衆莫能弓。獨公能挽強。一發破的。遂將所募迎敵。歲乙亥。木花里國王爲大帥。而公審所歸。遂爲大元人。己卯。以勞擢知中山府。佩金虎符。金將武仙據真定。以撼定武諸城。定武諸城皆應仙。公率衆夜入真定。走仙。定武諸城復去仙來。庚辰春。金人大發兵以張武仙威治中。李全應之。中山公軍軍曲陽。仙銳氣來戰。敗之。黃山下。仙脫走。秋。獻捷于大帥。由是仙以窮降。大帥承制。授公龍虎衛上將軍。行元帥府事。駐臺城。公謁大帥曰。武仙黠不可測。終不我用。當備其衝突。然之。承制授公左副元帥。陸臺城縣爲永安州。軍號匡國。事一委公。乙酉。仙果害都元帥史侯天倪。據真定以叛。我之郡縣。大氏皆爲仙守。公提孤軍。介反側間。戰者不千人。拒守永安。仙攻之。匝年無所利。秋來。揉我禾。公呼語之曰。汝欲得民。而奪之食。無道賊不爲也。仙慙。

去潛出兵掩擊之。仙敗去。久之。公復夜入真定。仙走死。內史帥之弟天澤。是爲史太尉。壬辰。會王師圍汴。明年。金主棄汴奔歸德。公及大軍追圍之急。城人夜薄我於水。我師殊死戰。公死之。夏四月。十有八日也。公蚤喪父。事母以孝聞。母喪。以能喪聞。歲時有事于廟。非病不可力。不廢拜跪。子雖孩乳。亦使之序。曰。祀以孝先也。禮宜是。凡族親故人。待之以恩信。里夫家僮。接之亦有道。汴陷時。以侍其軸。先生爲賢。禮請歸教諸子。嘗曰。射百日事耳。詩書非積久不通。屢誡諸子。吾實一農。遭天下多故。徒以忠義事人。僅立門戶。深願汝曹力田讀書。勿覬非望。爲吾累也。公忠實自許。一心王室。不爲夷險少移。臨陳勇氣襲衆。立矢石間。夷然若無事。中傷亦不動。每募馬。援爲人曰。馬革裹尸。吾固多援。故戰必持矛先。士或不可。公曰。我人臣也。敵在前不死。顧趨安脫危。犬馬不如。竟死國事。戊子。間朝行在所。諸帥獻戶口。率增數。要利吏請如衆。公曰。民實少。而數多。需求無應。必重斂足承。是我獨利而民日億也。且欺君不可。其以實獻。行元帥府時。狂男子三百餘人。期日作亂。事覺。坐其渠魁。餘釋不坐。深冀間妖人扇惑。圖爲不軌。連逮者數萬人。有司當之。族公力請主者。但首惡是誅。永安節度使劉成。叛降武仙。威州公下令曰。逆者一人。餘能去逆。卽忠義士。予其家才者官之。衆果去城降。沃州民砦天臺爲賊。旣破降之。他將利其子女。是取。公曰。人降而奪之。孥仁者不爲。衆義不取。南征時。人多歸公。願爲奴。旣全其家。歸悉縱爲民。隣境人有被掠賣。亦予直贖。還其屬。公器度弘遠。善戰而惜殺人。以樂爲之用。大小百戰。戰輒克。爲政寬而明。見人美其田廬。召其丈人。權與之語。情不敏生者。怒且罰之。民惟恐其離部。不得父依之也。父老至今念之流涕。嘗蒙全活者。無不額手鳴齒云。薨時年四十八。子九人。曰文炳。曰文蔚。帥諸弟事。兄忠獻甚得弟道。終武衛親軍千戶。

曰文用。歷事兩朝。以誠得於上。爲時碩儒。累官翰林學士承旨。資德大夫。知制誥。兼修國史。曰文直。彙城令。曰文毅。同知潭州路總管府事。曰文振。早世。曰文進。順德路總管府判官。曰文忠。事世祖。皇帝二十年。未嘗有過舉。嘉謨讜論。有人所不能悉知。而信於人主者。天下士大夫。微至閭巷細人。無不知名。聞其名。無不愛重之。累官資德大夫。僉書樞密院事。典瑞卿。大德五年。贈光祿大夫。大司徒。封壽國公。諡忠貞。曰文義。蚤世。忠獻公諱文炳。字彥明。龍虎公長子也。龍虎公薨時。年始十六。率諸稚弟。事母李夫人。李夫人有賢行。治家嚴篤於教子。公學侍其先生。警敏善記誦。自幼儼如成人。歲乙未。以父任爲彙城令。同列皆父時人。少公。吏亦不之憚。居半歲。明於聽斷。以恩濟威。同列束手。下之吏抱案求署。不敢仰首。里人亦化服。縣貧。重以旱蝗。游饑。而府徵日暴。民殆不能生。公以私穀數千石予縣。縣得以少寬。民前令乏軍興。貸於人。而貸家息入歲倍。率取償民之蠶麥。公曰。民困矣。頭會箕歛。不已足責。吾爲令。義不忍。吾代償。乃以田廬若干畝。所計直予貸家。遂業貧民。縣之閒田。教之藝。而豪不敢奪。流離漸還。數年間。民食以饒。初料民。敢隱實者。誅籍其家。公務衆其力。而寡其戶。衆危不可。公曰。爲民獲罪。亦所甘心。民亦不樂。公曰。後當德我。由是彙民富完至今。外縣民或銜負。不直其縣。而投牒求直於公。嘗上計府。外縣人聚觀之。曰。吾亟聞董令。董令顧亦人耳。何明能若神也。府索無厭。公抑不予。或讒之。府欲中公。公曰。吾終不能剗民。規利。卽棄官去。世祖皇帝在藩邸。癸丑秋。奉憲宗皇帝命。往南詔。公率義士四十六人。騎從世祖。南詔。後世祖軍人馬道死亡。比至吐蕃。止兩人能從。兩人翼公徒行。願領躑躅。取死馬肉續食。日不能三二十里。期必達。會東使過公。至軍言狀。公弟文忠先事世祖軍。世祖亟命文忠解尙廐五馬。載糗糒來迓。旣至。世祖

壯其忠。閱其勞。勞賜優渥。用輒稱旨。由是日親貴用事。己未秋。上命世祖伐宋。至淮西。有臺山砦者。宋光山縣寄治其上。命公取之。公馳往砦下。示以禍福。不應。公脫胄呼曰。吾所以不極兵威者。欲活若人也。不亟下。今屠砦守者。遂降。九月。師次羊羅汛。羊羅汛。宋之要害也。築堡于岸。陳船江中。軍容甚盛。公請於世祖曰。長江天險。宋所恃以爲國。勢必死守。不奪之氣不可。臣請嘗之。與敢死士數百人當其前。率弟文用。文忠。載艦衝鼓。擢疾趨。士叫呼。畢奮鋒交。公麾衆走岸搏戰。宋師大敗。文用。驪船報捷。世祖大喜。戟手上指曰。天也。明日渡諸軍。圍鄂州。會上崩。閏十一月。班師。庚申。世祖卽皇帝位於上都。是爲中統元年。上命公宣慰燕南諸道。還奏曰。人久弛縱。一旦遽束以法。危疑者尙多。與之更始。宜赦天下。制曰。可。反側者。遂安。二年。擢山東路宣撫使。就道。會立侍衛親軍。上曰。親軍非董文炳難任。卽追授侍衛親軍都指揮使。佩金虎符。三年。山東守將李璫反。據濟南。璫劇賊。善用兵。會諸軍圍之。璫不得遁。久之。賊勢日削。公曰。窮寇可以計禽。乃抵城下。呼璫將田都帥者曰。反者璫耳。餘來卽吾人。毋昧取誅死也。田都降。璫愛將旣降。衆亂。遂禽璫。璫勝兵有浙漣兩軍。可二萬餘人。勇而善戰。主帥怒其與賊配。諸軍陰殺之。公當殺二千許人。公言主帥曰。賊由璫脅從者何罪。殺之徒膏草土耳。良乖陛下仁聖。陛下往伐南詔。或妄殺人。雖大吏亦罪之。是宜勿之。帥從之。大悔。已殺者。而殺之者。亦自恨失計。璫伏誅。山東賊未靖。山東搖。以公爲山東東路經略使。率親軍以行。出金銀牌五十。有功者聽予。閏九月。公次益都。留兵于外。從數騎衣裳而入。至府不設警衛。召璫故將吏立之庭曰。璫狂賊。詿誤若曹。璫誅死。若曹爲王民。陛下至仁聖。遣經略使撫汝。相安毋恐。經略使得便宜。除擬將吏。汝曹勉取金銀牌。經略使不敢格上命。不予有功。所部大悅。

山東安至元三年。上懲李璿潛引方鎮之橫。以公代史氏兩萬戶。爲鄧州光化行軍萬戶。河南等路統軍副使。造戰艦數百艘。肄水戰。預講取宋方略。先阨塞要害。盡諸禦備。列柵築堡。深爲吾利。上召公密謀。欲大發河南民丁。公曰。河南密邇宋境。人習江淮地利。河北畊以供需。河南戰以啓土。宋平則河北長隸兵籍。河南削籍爲民便。又將校素無俸稍。連年用兵。至有身爲大校。出無馬乘者。臣卽所部千戶私役兵士四人。百戶二人。聽其願役。稍食其力。上皆從之。始頒將校俸錢。以秩爲差。七年。改山東路統軍副使。治沂州。沂與宋人接壤。鎮兵仰給內郡。餽餽有詔和糴本部。公亟命收州縣所移文。衆皆爭以違詔。公曰。第止之。乃遣使入奏。略曰。敵人接壤。知吾虛實。一不可。邊民供頓甚勞。重苦此役。二不可。困吾民以懼來者。三不可。上大悟。仍舊和糴內郡。九年。遷樞密院判官。行院事。淮西築正陽兩城。兩城夾淮相望。以綴襄陽。以擣宋腹。十年。拜參知政事。夏霖雨水漲。宋淮西制置使夏貴帥舟師十萬。環攻我急。矢石雨下。公禦之城上。夜貴去。復來。俄飛矢貫公左臂。著脇。公拔矢授左右。發四十矢許。房矢絕。索矢左右。又十餘發。矢不繼。而不能張滿。遂悶絕。幾殆。明日。水浸淫入郛。麾士卻避。貴乘之。壓吾軍。而陳公病創。子士選請代戰。壯而遣之。公飲痛束瘡。手劍督戰。士選與貴將搏。斬貴將以戈。貴將仆不死。獲之以獻。貴去。不敢復來。王師大舉。入宋。右丞相伯顏行中書省。自襄陽東下。及宋人戰於羊邏。公以九月發正陽。十一年正月。會丞相于安慶。安慶守將范文虎以城降。公請於丞相曰。行省兵旣勞於羊邏。行院兵當前。行均勞。宋都督賈似道。禦師陳於蕪湖。似道棄師走。次當塗。公言丞相曰。采石當江之南。和州對峙。不取。慮有後顧。請先取和州。許之。遂降知州事王喜。三月有詔。時向暑。師宜持重。行中書省駐劄建康。行樞密院駐劄鎮江。時揚

州真州堅守不下。常州蘇州既降復叛。久之張世傑孫虎臣誓真揚兵。致死於我。真揚兵先期敢不敢出。世傑等陳大艦萬艘。碇之焦山下江中。勁卒前左。公身犯前左。載士選別船。而弟子士表請從。公顧曰。吾弟僅汝一息。脫吾與士選不返。士秀猶足殺敵。吾不汝忍也。士表固請。乃許。公乘輪船。建大將旗鼓。翼二子船。大呼突陳。諸將繼之。飛矢蔽日。戰酣。短兵相接。宋人亦殊死戰。聲震天地。橫尸委仗。江水爲之不流。自寅至午。宋師大敗。世傑走。公追及夾灘。世傑收潰卒復戰。又破之。世傑走海。公船小。不可海。夜乃還。俘甲士萬餘人。悉縱不殺。獲戰艦七百艘。宋力自此窮矣。冬十月。王師分三道而左。公由江並海趨臨安。先是江陰軍僉判李世修乞降。奪於勢不能來。城復爲宋。公予之檄。世修以城來。令權本軍安撫。使所過民不知兵。凡所獲生口。悉縱遣之。無敢匿者。以故威信前布。望旗自靡。張瑄者。有衆數千。自宋時負海陸。梁公命招討使王世強及士選往降。瑄士選單舸至瑄所。諭以威德。瑄降。得海舶五百。瑄後至大官。十三年春正月。次鹽官。鹽官臨安劇縣。瑄救不下。招之一再。反將佐請屠縣。公曰。縣去臨安不百里。遠聲勢相及。臨安降。有成約。吾殺一人。將誤大計。況屠縣。於是遣人入城。諭意。縣降。遂會丞相于臨安北。張世傑欲以其主逃之海。公繞出臨安城南。戍浙江亭。世傑計不行。竊宋主弟吉王昰。廣王昺。南走。而宋主熈出降。丞相命公入城。罷宋官府。散其諸軍。封庫藏。收禮樂器。及諸圖籍。取皇帝諸璽符。上之丞相。丞相以宋主還覬。有詔留事。一委公。禁戢豪猾。撫慰士女。宋人不知易主也。時翰林直學士李槃奉詔招致宋士。至臨安。公謂之曰。國可滅。史不可沒。宋十六主。有天下三百餘年。其太史所記。具在館。且悉收入。以備典禮。乃得宋史。及諸注記。凡五千餘冊。歸之于國史院典籍氏。宋宗室福王與芮。赴逮京師。徧以重寶致諸貴。

人公峻却不取。及官錄與芮家。具籍所致貴人重寶。獨無公名。丞相朝奏曰。臣等奉天威平宋。宋既已平。懷來安集之功。臣董文炳實最諸將留事。謹奉詔矣。上曰。文炳吾舊臣。忠勤朕所素知。乃拜資德大夫。中書左丞。時張世傑奉宋主弟吉王昫。據台州。閩中尙爲宋守。敕公進兵。所過禁士馬無敢履踐田麥。曰。在庾者吾既食之。在野者汝又蹂之。斯民何以續命。是以南人不忍以兵鄉公。次台。世傑遁。諸將先俘州民。公下令曰。台人首效順。我不暇有。而世傑據之。民何罪。敢有不縱所俘者。以軍法論。得免者口數萬。薄溫州。溫州未下。令曰。毋取子女。毋掠民有。衆曰。諾。守將火城中逃。公亟命撲滅火。追禽守將。數其殘民之罪。斬以徇。隴巖。閩人扶老驢迎漳泉建寧邵武諸郡。皆送款來。凡得州若干。戶口若干。閩人感公德最深。至今廟而祀之。水旱疾病禱焉。十四年。北圍有警。上將北狩。正月。亟召公。四月。公至。自臨安比。至上日。問來期。及至。卽召入。公拜稽首曰。今南方已平。臣無所效。請事北圍。上曰。所亟召卿。意不在此。豎子盜兵。朕自撫定。山以南國之根本也。盡以託卿。卒有不虞。便宜處置。以聞。中書省樞密院事無小大。咨卿而行。已勅主者。卿其勉之。公踧踖避謝。不許。因奏曰。臣在臨安時。阿里伯奉詔。檢括宋諸藏貨寶。追索沒匿甚細。人實苦之。宋人未洽吾德。遽苦之以財。恐非安懷之道。卽詔罷之。又曰。臣有專擅之罪。初泉州蒲壽庚。以城降壽庚。素主市舶。謂宜重其事權。俾爲我捍海寇。誘諸蠻。臣解所佩金虎符。佩壽庚矣。惟陛下鑑裁。上大嘉之。更賜金虎符。燕勞畢。卽聽陞辭。裕宗在儲宮。公求見。敕曰。董文炳任重。見畢。遣行。既見。慰諭懷至。且曰。上嘗多卿。公留士選宿衛。卽日就道。凡在上都三日。至大都五日。至中書樞密。不署中書案。平章政事阿合馬。方怙寵用事。生殺任情。惟嚴憚公。姦狀爲之少斂。執筆起請曰。相公官爲左丞。當署省案。請至再

四不肯署。皇太子聞之，謂宮臣竹忽納曰：「董文炳深慮汝曹所知，後或私問其故。」公曰：「主上所付託者，在根本之重，非文移之細。且吾少徇，則濟姦不徇，則致讒。讒行則身危，而深失付託本意。吾是以預其大政，而略其細務也。」十五年夏，公有疾，奏請解機務。詔曰：「大都暑熾，非病者宜。卿可此來，固當愈。」公至上都，奏曰：「臣病不足領機務，西北高寒，筋骸暢逸，當復自愈。」請畢，力北役。上曰：「卿固忠孝，是不足行。」樞密事重，以卿僉書樞密院事，中書左丞如故。公辭不許，遂拜。八月，上生日，禮成賜宴，掌禮者奏公坐。坐上坐，諭宗室大臣曰：「董文炳功臣也，當坐。是每尙食，上食輒輟，賜公是夜疾復作，敕諸御醫日來診視。」九月十三日，夜疾革，洗沐而坐。召文忠等曰：「吾以先人死事，恨不爲國死邊。今至此命也，願董氏世有男能騎馬者，勉報國。吾死瞑目。」言畢，就枕薨。上聞痛悼之良久，命文忠護喪，葬彙城。令所過有司以禮弔祭，制贈金紫光祿大夫、平章政事，諡曰忠獻。敕翰林待制李謙誌其墓，翰林學士承旨王磐撰神道碑。公忠實似其父人，主益信之。嘗曰：「朕心文炳所知，文炳心朕所知。」故讒間不行，而功立在軍，或與長官爭事，長官國人持己見，不公。是公曰：「第上兩奏，得可事乃行。」長官輒不敢上，卒公是。蓋上嘗誡長官者曰：「董文炳老成練事，汝父行也。事事聽之，文炳不我負也。」公薨後十餘年，姦臣桑萬事敗，有詔董文炳子名士選者，速召入。上素愛士，選有父風，卽拜江淮等處行中書省左丞，召入臥內。上曰：「汝知汝父事朕否？」士選拜謝曰：「臣愚不足以知。」上曰：「若父忠勤不欺，能成吾大事，汝士選不必遠學，學而父足矣。」又嘗問士選曰：「汝知曹彬如何？」士選謹對曰：「曹彬云云。」上曰：「曹彬不殺降一事，較之而父未足爲多，必欲盡書而父竹帛有幾也。」公平居不妄笑語，毅然有不可犯之色。立朝諤諤，有古大臣風。故上每論漢人功臣，謂可任屬大事者，必首公。而追

惜其壽止於六十二也。事人主三十年。任大事。豫大議。其廟謨廷論。逸不盡傳。史臣無從考索。最著於閭里者。孝友天至。居母喪。哀毀骨立。奉祀事。一遵其父。而有嚴教。諸弟如嚴師。諸弟事之如嚴君。雖貴顯如文用。文忠歸休。沐不敢先私室。侍立終日夜。不敢坐。不問不敢對。裘馬金帛。公未嘗先御。有卽盡賜諸弟。閨門之間。肅然而諸弟。或以過被笞。皆惻款受之。以改及喪。公毀瘠踰禮。而思其蚤孤。深賴賢兄以成之也。世之言家法者。比爲萬石君。奮家云。公好讀書。延禮儒士。士雖賤。必接以禮。若金翰林直學士。淳南王若虛先生。真定提學侍其先生軸。存則師尊之。沒則卹其孤。而侍其提學家子孫。與之婚姻。至今雖在兵馬閒。教諸子不暫廢。公退日。一再至塾。程其學。與儒者講明聖人之道。評品史事。夜分乃休。居官清慎。家無餘財。其子孫化之。亦能清慎。世其家。子士元。剛不下人。以氣由內供奉。爲武節將軍。侍衛親軍。千戶。佩金牌。及宋將姜才。戰於揚州。身被十七創而卒。士選。今爲資政大夫。御史中丞。領侍儀司事。士秀。資豪爽。才藝過人。事裕宗東宮。寵信無比。裕宗崩。終明威將軍。前衛親軍都指揮使。佩金虎符。贊曰。或曰。爲將三世。必敗。其後受其不祥。董氏貴顯四世。子孫數十百人。或曰。活千人者必有後。龍虎公忠獻公爲大將。不妄殺。濱死而生之者。無慮數十萬人。其諸以是爲德與。嗚呼。董氏其未艾哉。雖然。繼美大家。斬澤仆世。孰非人子者。

節婦馬氏傳

元明善

馬氏。參知政事楊公居寬之繼室。錢唐民家女也。至元十四年。桑葛奏立尙書省。奪中書機要。又以計傾罷之。先誣居寬等死。沒入其帑。以馬氏賜衛士。馬氏託狂疾。叫呼遺矢溺。不可近。竟免侵迫。楊氏陰贖之。

歸。遂削髮廬墓。誓死不嫁。後桑葛敗。事得昭雪。而馬氏以無子。乞歸錢唐。養其獨親楊氏。許之日紡績給食。凡十有餘年。大德七年十月。乳生瘍。或曰當迎醫。不爾且危。馬氏曰。吾楊氏寡婦也。寧死此疾。不可男子見。竟死。時年四十餘。嗚呼。節義於人大矣。一或執之不變。雖孱夫弱婦。使強悍之人降心相下。何乃英聲。歷世而臨利害之頃。一失所守。無異禽犢。死等爾。不義而生。無寧義死。此烈丈夫之所以焜耀也。馬氏亦足稱哉。

張澹傳

元明善

張澹。樂師也。清州人。父德祿。始入樂籍。澹早孤。學軋箏。卽知求巧。既長。名貫京師。凡爲調曲。盡聲韻。玄妙入神。成一家藝。鉅公宴集。澹夏新聲。四坐爲傾。然非其意。不可召也。名在上所。爲管句。爲安和署丞矣。仁宗皇帝曲宴。澹必在一宴。一蒙賚。置玉宸樂院。特授奉訓大夫。玉宸判官。降玉宸院爲儀鳳司。進澹階中順。遷儀鳳少卿。詔造乾箏。岳柱龍齧。及緣盡玉桐梓金錯之曲。奏遂以賜澹。加嘉議爲卿。甚悅。澹每有遇。賜辭厚。取薄。氣不盈而色懼。君子蓋有取於澹云。

贊曰。帝在位十年。天下治安。宰相無事。以戚之從容肆體而豫焉。澹也。質直厚和。無他緣飾。進其絕藝。賜之一顧。知音者謂唐軋軋箏以來。未必有澹之手。自足名世矣。嗚呼。先朝凡一賢人。必蒙超擢。不止澹也。澹乎。其亦殊遇哉。

高昌偃氏家傳

歐陽玄

偃氏。偉兀人也。其先世曰噉欲谷。本突厥部。以女婆匄。妻默棘速可汗。爲可敦。乃與謀其國政。唐史突厥

傳載其事甚詳。默棘速卒。國亂。婆旬可敦率衆歸唐。唐封爲賓國夫人。而默棘速故地盡爲回紇所有。噉欲谷子孫遂相回紇。回紇卽今偉兀也。回紇嘗自以其驚捷如鶻。請于唐。更以回鶻爲號。偉兀者回鶻之轉聲也。其地本在哈刺和林。卽今之和寧路也。有三水焉。一並城南山東北流。曰斡耳汗。一經城西北流。曰和林河。一發西北東流。曰忽爾班達彌爾。三水距城北三十里。合流曰俛輦傑河。回紇有普鞠可汗者。實始居之。後徙居北庭。北庭者。今之別失八里城也。會高昌國微。乃併取高昌而有之。高昌者。今哈刺和綽也。和綽本漢言高昌。高之音近和。綽之音近昌。遂爲和綽也。哈刺黑也。其地有黑山也。今偉兀稱高昌地。則高昌人則回鶻也。高昌王有印曰。諸天敬護。護國第四王印。卽唐所賜回鶻印也。言諸天敬護者。其國俗素重佛氏。因爲梵言以祝之也。噉欲谷子孫。旣世爲偉兀貴臣。因爲偉兀人。又嘗從其主居俛輦河上。子孫宗噉欲谷爲始祖。因以僂爲氏焉。以河名也。相傳噉欲谷初爲國相。適當唐天寶之際。唐以安史之亂。求回鶻援兵。噉欲谷與太子闕特勒帥師與討安祿山有功。封太傅忠武王。進位司空。年百二十而終。傳數世至克直普爾。襲爲本國相。答刺罕錫號阿大都督。遼主授以太師大丞相。總管內外藏事。故國人稱之曰藏赤立屬滅里棘。脫脫伯吉叛合山王。三召克直普爾至。則言於王曰。脫脫驍勇。未易力攻。臣少與親善。彼不忌臣。可以計取。今與王期以七日。當斬其首以報。乃先遣家僮往取滅里棘馬百匹。脫脫使追之。則給追者曰。丞相載馬。取蒲萄酒。見女主爾。追者返以告。脫脫喜。迎之于郊。握手歡甚。襲公畢。謂曰。今日易營。初脫脫置酒行營。二日。易名以嬖。天人攝之。謂克直普爾曰。公其少需。我先往。遲公至。旣行。乘驛從後大呼止之。脫脫止。陽曰。有密語。請屏左右。脫脫如其言。乃奮曰。私恩公義。有難兩全者。吾奉

王命取爾首爾。亟拔劍斬之。左右股弁不敢動。持首白王。王悅。賜玉深郡地。暨牙里于斯。博和思于斯。二山狐白裘。一初兵出阿胡爾河。河水素湍急。俄而水止。國俗以爲水寐。占者曰。禱之必有應。公以裳盛水。初曰。願子子孫孫勤勞王家。其熾如火。其續如繩。以忠以孝。永保令名。言訖。以水洒河。河水湍流如初。又嘗盛暑袒跣。臥大樹下。鵝鳴樹上。心惡之。攬衣起。且鞮下爪鞮者三方。怒提之。毒蛇自上墮地。賴鵝免於螫。戒世世子孫勿殺鵝。及死之日。有神人跪請曰。帝詔丞相以劍擊柱。斥之神滅。公以是年卒。葬玉深郡西五里。曰闊爾祿。名之曰辛。子岳弼。襲國相。爲答刺罕阿天都督。太師。大丞相。仍兼通管內外藏事。七子。長曰達林。次曰亞思弼。曰衢仙。曰博哥。曰博禮。曰合刺脫因。曰多和思。亞思弼二子。長曰叱理伽帖。穆爾。次曰岳璘。帖穆爾。叱理伽生而敏慧。年十六。襲國相。答刺罕。時西契丹方強。威制高昌。命太師僧少監來圍其國。恣睢用權。奢淫自奉。王患之。謀於叱理伽。曰。計將安出。叱理伽對曰。能殺少監。挈吾衆歸大蒙古國。彼且震駭矣。遂率衆圍少監。少監避兵于樓。升樓斬之。擲首樓下。以功加號。叱理傑。忽底。進授明別吉。妻赫思迭林。子弟以噉欲谷之後。世爲其國大臣。號之曰設。又曰沙爾。猶漢言威晚也。未幾左右有疾其功者。譖于王曰。少監珥珠。先王寶也。叱理伽匿之。蓋急索勿失。王怒。誅寶甚急。叱理伽度無以自明。乃亡附國朝。我太祖皇帝。賜以金虎符。獅紐銀印。金螭椅。各一衣。金直孫校尉四人。飲食供帳。殆擬王者。仍食二十三郡。尋又賞銀五萬兩。以弟岳璘爲質。叱理伽沒高昌諸部。塗哭巷弔。歲時祠之。岳璘精於偉兀書。慷慨以功名自許。賞算悉以畀兄子。身無私焉。年十五。以質子從太祖征討。多戰功。皇弟幹真奏求師傅。上命公公訓導諸王子。以孝敦睦。仁厚不殺爲第一義。上聞嘉之。中原諸路。悉命統治。旣而從平

河南徙鄆縣民萬餘戶入樂安。以便徭拊。尋授河南等處軍民都達魯花赤。佩金虎符。并賜宮女四人。所得尙方賞賚。悉輦歸故郡。以散親舊。且盛陳漢官儀衛。以激礪之。國人聚觀。咋咋豔慕。道山河西。所過榛莽。或時乏水。公爲鑿井置墩。居民使客相慶稱便。太宗皇帝卽位。以中原多盜。選公充大斷事官。從幹眞出殿順天等路。公布德化。寬征徭。盜遁。姦革。州部清整。尋復監河南等處軍民。年六十七。卒于保定。今贈宣力保德功臣。山東宣慰使。諡曰莊簡。多和思。二子。次曰撒吉思。風儀魁岸。識度宏廓。澁事。寬猛適宜。初爲諸王幹眞。必閣赤領王傅事。王薨。長子質卜早世。嫡孫搭察幼。庶兄脫忒狂恣。欲廢嫡自立。撒吉思與火魯和孫。馳白皇后帖列聶氏。乃授塔察。以皇太弟寶。襲爵爲王。撒吉思以功。與火魯和孫。分陝黑山以南。撒吉思理之。以北。火魯和孫理之。從憲宗攻釣魚山。建言乘勢定江南。必有峻功。上嘉納之。命世祖取武昌。王取武昌。王取淮安。東西並進。未幾上崩。班師集闕。阿里下哥。睥睨神器。諸王多附之。王亦首竄。進退撒吉思聞之。馳見王。力言世祖寬仁神武。中外屬心。宜專意推戴。若猶豫不決。則失幾非計也。王從之。世祖卽位。授撒吉思北京宣撫。賜宮人甕吉刺眞氏。及金帛章服。聚至鎮。鋤強。翦姦。革邪除穢。遼東以寧。會高麗有異意。上遣使究切。則委罪於弼臣。洪察忽。械送京師。道遼東。撒吉思訪知。洪以直諫忤意。故卽奏疏。爲直前諷。上命釋洪。俾討叛黨。平之。山東李璫反。奉詔偕諸王。哈必赤等東征。應會決機。轉戰數十合。生得璫。戮于市。復濟南益都等五十餘城。哈必赤欲屠之。力爭曰。王者之師。誅止元惡。罔治脅從。於是釋囚繫。返流逋。歸剽掠。吹枯蘇。簡節疎目。傳檄四封。輿情大悅。授資德大夫。山東行省大都督。遷經略統軍二使。兼益都達魯花赤。辭不拜。上言山東重鎮。宜別選貴戚臨之。上不許。因賜京城宅一區。益都田

千頃。及李瓊馬羣、園林、水磴、海青、銀鼠、裘等。嘗慕古人舉親舉仇之節。惟才是用。或以子姪爲幕僚。或以里閭知舊爲文學官。或以叛帥舊卒爲部曲將。不顧身嫌。專爲國計。公論多之。兵後民有田乏牛具。爲之上聞。驗民丁力。官給以牛。人得肆耕。李瓊故將毛璋。率諸部謀執之以附江南。璋黨禿劉懷其恩。以璋謀上變。乃魏璋斬之。統軍抄不花。畋遊無度。害稼病民。元帥野速答爾等。豪據民田。以爲草地。隨事表聞。得旨執抄不花。滅死杖之。勒野速等還故土。山東諸郡與宋人接壤。時見侵掠。乃拔膠與密等州。丁壯屯沂莒。以逼連海。宋邊帥丁某懼。以所統來降。其爲民捍患。爲國拓土。類如此。推賢讓能。知人善任。名臣宿將。多出其門。傾望雄名。餘五十載。忽一夕星殞于舍。年六十四。卒于京師之南城。山東父老相與刻石紀勳德焉。今贈安邊經遠宣惠功臣。資德大夫。河南江北等處行中書省右丞。上護軍。追封雲中郡公。諡曰襄惠。岳璘十子。長曰益。彌勢普華。次曰都督。彌勢普華曰懷來普華。曰都爾彌勢。曰八撒普華。曰旭烈普華。曰和尙。曰合刺普華。曰獨可理普華。曰脫烈普華。都爾彌勢初從撒吉思討李瓊。以功奏爲行省郎中。繼除博興沂州監郡。會丞相伯顏督諸軍取宋。慨然曰。吾世受上恩。此立功報國之秋也。吾其從戎乎。撒吉思嘉其志。謁丞相舉以自代。乃與從子撒里蠻俱隸丞相麾下。與攻襄樊。進兵陽邏堡。順流至丁家洲。宋相賈似道出視師。迎戰奔潰。都爾彌勢爲前鋒。引大軍乘勝逐北。與宋殿帥孫虎臣戰于焦山。破之。陞蔣安撫翼監戰。復攻常州。得雋陞斷事官。江南旣平。擢安豐路達魯花赤。行省以其廉能。署處州路達魯花赤。時新附之民。懷攜阻兵。每單騎招降。兵不血刃。人以四哥佛子稱之。後見平章阿合馬竊榷張甚。恥爲詭隨。居閑養晦五年。日本之役。以爲征東都元帥。又與丞相阿答海、李牢山等異議。辭行。已而阿答海等

果敗。運使盧懋以言利擢中書右丞。欲引爲參知政事。知懋不可以共事。亦辭不拜。後懋果以罪誅。遷同知浙東宣慰使。司事東陽。賊楊震龍作亂。鄉民或爲賊應。卒討平之。朝廷以江浙財計至重。命爲行省。郎中及桑葛當國。屢欲援爲助。固謝不就。遷太平路達魯花赤。同時平南大臣如丞相蒙古臺高。興國公史弼。河南王卜隆吉台。皆以兄禮事之。一時善辭命。都爾彌勢與阿里齊名。行省凡有入奏。必命之往。每至上前。開陳是非得失。披析解駁。如指諸掌。上嘉賞曰。惟卿及阿里言事。能稱朕意。爾阿里後秉鈞衡。而都爾彌勢官止廣西憲使。卒。合刺普華。倜儻有節概。好義如嗜欲。恤窮若姻戚。恤危蹈難。循國忘身。兒時父以斷事官治保定。留之侍母。奧敦氏居益都。一日忽作而歎曰。幼而不學。有不墮吾宗乎。卽趨父所。自白父奇之。俾習偉兀書。及授語孟史鑑文字。記誦精敏。出於天性。李瓊之亂。奧敦氏挈季子脫烈普華。辟地登萊間。音問隔絕。號泣徹晝夜。尋從撒吉思平亂山東。卒購獲。奉以歸。人以爲孝感所致。撒吉思深加器重。自謂才具不及。言於世祖。召給宿衛。嘗以王事至益都。於四脚山中置廣興商山二冶。以勞授金符。除商山鐵冶都提舉。未及代。以職讓厥弟。天兵南向。饋運繁興。被選爲行都漕運使。帥諸翼兵萬五千人。從事飛芻輓粟。夜警晨嚴。軍資以濟。南北混一。與有功焉。事平。上封事大要。言親肺腑。禮大臣。以存國家之體。興學校。獎名節。以勵天下之士。正名分。嚴考課。以定百官之法。通泉幣。卻貢獻。以厚生民之本。又言江南新附。宜招舊族。振滯賞懋。力穡通商。弛征薄入。以撫馴其民。不然。恐尙煩宵旰之慮。廟堂多采用其言。屬糴米二十萬。由邗溝達于河。舟覆□□損十之一。而又每斛視都斛爲虧五十分斛之三。時阿合馬秉政。責償舟人。合刺普華伏闕抗言。量之畸贏。出於元降。而水道之虞。非人力有弗戒。彼雖罄其家。不足以

償若朝廷必不任虧損。臣獨當其辜而已。上命勿治。政柄者。憤無所泄。則誦公監寧海路。後遷江西宣慰使。未之官。改除廣東轉運鹽使。兼領諸蕃市舶。時盜梗鹽法。陳良臣等。扇東莞香山惠州負販之徒萬人。撞搪相和。江西行省命與招討使答失蠻討捕之。先驅斬渠魁。以訊誠告。躬抵賊巢。招誘餘黨復業。仍條言鹽法之不便者。悉祛其害。按察使脫歡大爲姦利。劾奏罷之。羣盜歐南。僭王號。僞丞相招討衆號十萬。因圖上其山川形勢。及攻取之策。三十餘條。建言揃刈弗亟。其勢長聲生。蔓延未已。遂與都元帥課兒伯海牙。宣慰都元帥白佐。萬戶王守信等。分兵搃之。功最諸將。無何。右丞唆都督兵征占城交趾。素多其知勇。屬餉道比至東莞博羅二界中。遇劇賊歐鐘等。橫絕石灣。其鋒銳甚。於是怵怵語其下曰。軍饑重事也。望風退縮。以誤國計。吾弗爲也。卽身先士卒。且戰且行。矢竭馬創。徒步格鬪。踣數十人。勇氣益厲。以衆寡不敵。爲所執。賊欲奉之爲主。罵曰。吾方岳重臣。肯從汝爲逆耶。正有死爾。遂遇害于中心岡。時至元甲申二月之十九日也。年三十有九。是夕。夢夫人希台特勒氏曰。廣寇之亂。吾死矣。言已乘雲而升。天矯如龍。徑西北而去。知事劉閏。張德亦夢城門有金榜。合刺普華衣金甲。指麾其中。謂吾死。今治此。煩若二人。爲功曹。翌日凶訃至。俄而閏德相繼死。時羣寇未息。官軍追捕。邦人往往見其乘雕督戰。或聞空中隱隱金鼓聲。咸驚異以爲神。繪像祠之。生平將兵理財。部分明。禁令嚴。凡所施設。後爲法程。敷歷中外。以才幹稱。以死節著。中朝罕儔也。贈通議大夫。戶部尙書。上輕車都尉。賜號守忠全節功臣。諡曰忠愍。希吉特勒。封高昌郡太夫人。盛年寡居。貞操凜凜。義方有嚴。二子長曰僂。文質。次曰越。倫質。文質甫十歲。割股以愈母疾。粵之人士。謂忠貞孝三節備于一家。故相與繪爲圖。而傳觀之。旣長名迹。獵獵稱其家。延祐初。守

廣德治法風聲爲諸郡最。會朝廷經理江浙田糧。行省以番陽官吏不稱職。委訊其事。至則用法外意。治貪猾吏爲民害者。闔郡稱快。改授通議大夫。潭州路總管。潭爲大郡。既至。興利除害。執法不阿。當道嫉其軋己者。搆誣以罪。事既白。遷贛州路總管。尋佩金虎符。同知廣西宣慰司事。副都元帥。會柳州慶遠賓州徭民叛。領兵數千進。以策誘賊黨。擒其渠魁。十九龍半天等一十三人以歸。賊衆望風奔潰。降者幾萬人。復置屯田爲守備計。開通故道。以絕其負固之念。省垣憲府交章論薦。謂其有文武才略。如古良將。遷正議大夫。吉安路達魯花赤。中書嘗檄往廣西北審斷。所至明決。旣而引年休致。家于豫章東湖之上。子五人。曰偈玉立。登延祐戊午第。今翰林待制。朝請大夫。兼國史院編修官。曰偈直堅。登泰定甲子第。今承務郎。宿松縣達魯花赤。曰偈哲篤。登延祐乙卯第。今中順大夫。僉廣東道肅政廉訪司事。曰偈朝吾。登至治辛酉第。今承務郎。同知濟州事。曰偈列麗。登至順庚午第。今從仕郎。河南府路經歷。越倫質。早歲警敏篤學。無子弟之過。未仕而歿。贈從仕郎。山東東西道宣慰使司都事。一子曰善著。登泰定丁卯第。今承務郎。天臨路同知。湘潭州事。文質嘗謂玄曰。吾宗肇基偈輦。今因以偈爲氏。蓋木本水源之意也。且高曾以來。勤瘁王家。詡興大業。而俛仰陳迹。非托之文字。大懼湮沒。無以示來者。謹具世次。復歷以請。玄惟太史公論贊夷齊顏跖。反覆致意於天道報施。蓋甚惑焉。每讀之輒廢書而歎。以爲古今同一轍也。及觀偈氏世磊砢相望。勳節在國。利澤在民。雖汗簡所書。何以尙此。諸季起家擢科。如射命中。異時以涵演迤頌大顯融。無落於其世。識者已有以覘之。則是漑根而食實。售物而取償。天之於偈氏。獨昭昭不忒。如是異□□聞矣。使造物報施。每率是道。天下有不樂爲□□□□別生分類。古之道也。偈氏遠稽前聞。遡

□□□□□來綿延百世。遂爲中州著姓。實自今啓之厚之至也。凡此皆予所嘉稱而樂道者。敬撮其實。爲作家傳。後之秉筆。紬金匱石室之書者。則或有徵於斯文。

元文類跋

右國朝以來詩文七十卷。右司都事趙郡蘇伯修父所類也。守誠在胄館時。見伯修手抄近世諸名公及當代聞人逸士述作。日無倦容。積以歲年。今始克就編。不以微而遠者。遂泯其實。不以顯而崇者。輒櫟其善。用心之公溥也。如是。夫古者以言名家。則有集傳。其別而敘之於史傳者。非發明乎學術之說。則關繫乎世道之文也。不然。君子無取焉。是則伯修豈無意而爲之者乎。伯修方以政事嚮用。所集名臣事略及是書。皆將刊布天下。天下之士得攬焉者。孰不美國朝文物之盛。嘉伯修會萃之勤矣。伯修名天爵。以國子高等生。試貢入官。力學善文。多知遼金故事。亦有論著。他書無所不闕。予之敬交也。故題文類後。元統三年三月三日。太原王守誠書。

